

Yúsán Shiir Chichamēn

RÚKAS

aarmia nu

¹ Nekas iiní Jesus túramia nuna “ímiatrusan áartajai” untsurí aents tiarmiayi.

² Yámankamtaikniumiañ ísarmia nú shuar, tura Yus-Chichaman etserkatniun yáinkíarmia nusha in unuitiamprarmia nútiksaran áartinian wakeriarmiayi.

³ Wisha núnisnak esetsaran enentáimsan, yámankamtaikniumiā nuna nekaamjai. Tuma asan túrunamia nuna ímiatrusnak amincha áatratajtsan wakerimjiame, winia úuntur Tiupiru.

⁴ Jintintramawarma nú nankaamas nekaata tusan wakerakun áatjame.

Imiakratin Juanka akiiniatniurin ujakmiania nu

⁵ Jutía nunkanam uunt akupin Erutis akupkamia nú tsawantin Israer-shuar Yúsnan pujurin ámiayi, ni naari Sakarías. Niisha Aptías weeauyayi. Ni nuwēsha Irisapít Aruñ weeauyayi. Irisapítia úuntrisha Israer-shuar Yúsnan pujurin ármiai.

⁶ Yúsjaisha Sakaríassha Irisapítcha mái-metek péñker ármiai. Yus akupkamia nunasha umirin ármiai. Tuma asamtai péñkesha chíkich nin yajauch chicharkatin atsuarmiayi.

⁷ Yusjai péñker wekainiayat Irisapít júrechuyayi. Túrasha mai úuntach ármiai.

8-9 Israer-shuar Yúsnan pujurin chíkich weenamaya nuyá chíkich weenam, ankant ankant Yusa jeen takáu ármiai. Chíkich tsawant, Sakarías weeá takastin amia nui, Sakaríaska kunkuinian ekeemaktaj tusa inít wayatniuyayi.

10 Inít kunkuinian ekeemai untsurí aents aani matsamsar Yúsan áujtak pujuarmiayi.

11 Sakarías inít pujaí kunkuin ekeematainiam untsuurnumaani aya aneachma nayaimpinmaya suntar wajamiayi.

12 Nuna wajan wáiniak Sakaríaska purushnairmiayi.

13 Túrasha nayaimpinmaya suntar chicharuk tímiayi “Sapijmiakaip Sakarías. Nekaata. Ame seamna nuna Yus anturtamkayi. Tura ame nuwem Irisapít uchin takustatui. Nii akiiniamtai, “Juan” anaikiata.

14-15 Ame uchiram akiiniattana nuka Yusjaisha nankaamantu átatui. Tuma asantai akiiniamtai, amesha shiir enentáimsam warastatme. Tura chíkich aents untsurí warasartatui. Ame uchirme-sha karía ainia nuna umarchattawai. Tura áetak akiinchanak Yusa Wakaní pimiutkattawai, tímiayi.

16 Tura ni shuarin Israer-shuar áiniana nuna, ii Uuntrí Yusjaí ataksha nawamtikiartatui.

17 Uunt Yúsaiya akatramu átatui. Yaunchu Yúsnan etserin Erías kakaram etserkamia núnisan niisha etserkattawai. Nujai shuaran ni uchiríjiaí nawamtikiartatui. Tura umichu áinia nuna eseer enentáimtikrartatui. Ni Uuntrí taakui ni enentái iwiaramu arti tusa etserkattawai” tímiayi nayaimpinmaya suntar.

18 Nuna takui Sakarías nayaimpinmaya suntaran tímiayi “¿Nunasha warijjain paant nekaataj? Wisha nuarjai mái-metek ti úuntchichukaitiaj” tímiayi.

19 Tutai nayaimpinmaya suntar tímiayi “Wikia Kapriiraitjai, Yusa suntarintjai. Nii akattur-matai chichastájam tusan tura nu shiir chichaman ujaktájam tusan tarijme, tímiayi.

20 Túrasha wi tájamna nu “nekasaiti” tu enentáimprachume. Tura asam uchiram akiintsain muut ajastatme. Chichastin penké tujinkiattame. Tura wi tajana nu, tsawant jeamtai túrunattawai.”

21 Nuna tumaj Yusa jeen aani pujusar, Sakaríasan nákas pujuarmiayi. “¿Urukamtaik init we imiá menkaka?” tu enentáimprarmiayi.

22 Nuyá Sakarías jiinkimtai, áuj sartaj tukamá tujinkiarmiayi. Sakaríaska, muut ajasu asa, aya úwijmiasan chichamiayi. Túmakui, Sakarías init pujus Yúsaj wáimiakun nekaawarmiayi.

23 Yusa jeen takastin tsawantri amuukamtai Sakaríaska ni jeen waketkimiayi.

24 Nuyá ukunam ni nuari Irisapít ajaprukmiayi. Tura senku nantutin aya jean pujusmiayi.

25 Jeá pujus, “Aents wishikruiniakui natsantan jurutkitiaj tusa uchi takustinian Yus tsankatrukai” tu enentáimpramiayi Irisapít.

Jesusa akiiniatniurin nayaimpinmaya suntar et-serkamiania nu

26 Nu senku nantu nankaasmatai Yus ni suntarin Kapriiran Nasarét péprunam akupkamiayi. Nu pepru Kariréa nunkanam pujawai.

27 Nasarénumiã nuwan, naari Marí, iyutí tusa akuptukmiayi. Nu núwaka áishmanjai pujuchuyayi. Niisha Jusejai nuatnaikiatsa anajmanair pujumiayi. Juseka uunt Tawit weeauyayi.

28 Wats, nayaimpinmaya suntar Marí pujamunam wayá tímiayi “Yus péñker enentáimturma asamtai, ámin winitjiame, Mariya. Yuska ámin nemartamuk ashí nuwã nankaamas péñker awajtamui” tímiayi.

29 Tura Marisha nayaimpinmaya suntaran wáiniak, chichaamun nékatsuk “Urukamtaik tu chicháa” tu enentáimpramiayi.

30 Nuyá nayaimpinmaya suntar chicharuk tímiayi “Mariya, sapijmiakaip. Yus shiir enentáimturmawai.

31 Antukta. Amesha ajapruktatme. Túram Uchi takustatme. Nusha “Jesus” anaikiata.

32-33 Niisha uunt átatui. Nincha “Uunt Nankaamaku Yusa Uchiri” tiartatui. Tura Uunt Yuska yaunchu Tawitian uunt akupniuri awajsamia núnisan ame Uchirmin ame shuárumin Israer tutain Uunt akupin awajsattawai. Ni akupeamurisha Yus susamu asa penké amuukashtiniaiti” tímiayi.

34 Nayaimpinmaya suntar nuna tutai Marí tímiayi “Nusha winia áishur atsaisha, ¿itiurak túrunataj?”

35 Tutai nayaimpinmaya suntar Marín tímiayi “Yusa Wakaní tarutramtatui. Tura yuranmia núnisan Uunt Yusa kakarmari ijirmattawai. Nu tuma asamtai Uchi akiiniattana nu Yúsaiya asamtai, “Yusa Uchirinti” tiartatui, tímiayi.

³⁶ Tura Irisapít ame kaná kaimia nusha núnisan weamtanam ajaprukai. Iis, “júrechuiti” tiarmia nu, yamaikia sais nantu pujawai ajamtin.

³⁷ Yúsjaĩnkia itiurchatka penké atsawai” tímiayi.

³⁸ Tutai Marí tímiayi “Yus wakeramun túriniaitjai wikia. Ame tame nuna Yus wakerana nuna túrutati, tajai” tímiayi. Nuna tímiatai nayaimpin-maya suntarka wémiayi.

Irisapítian Marí iyumiania nu

³⁹⁻⁴⁰ Nu tsawant Marí wárikmas muranam Jutía nuñkanam ni kaná kaĩn Irisapítian iyutaj tusa wémiayi. Sakaríasai jeá, ni jeen wayá, Irisapítian áujsamiayi.

⁴¹ Marí áujeamun antukmatai Irisapítia ampujén uchirĩ muchitkamiayi. Tumai Yusa Wakanĩ ni enentáin pimiutkamiayi.

⁴² Nuĩnkia kakantar chichaak Marin tímiayi “Yus amincha ti shiir awajtamsaiti. Tura Uchiram aki-iniattana nusha Yus shiir awajsamuiti.

⁴³ Kairua, ame winia Uuntru nukurĩ áminin, Yus winia ti waitnentra asa, áujsata tusa ámin akup-tamkachaik, tímiayi.

⁴⁴ Warí, wisha ame áujtamna nuna ántakui ampu-jruĩ uchi waras muchitrukayi.

⁴⁵ Amesha Yus turámiania nu umikiu asam shiir pujame. Yus tímia nu túrunattawai auka” tímiayi.

⁴⁶ Nuna tinia iniaisamtaí Marí juna tímiayi:

“Wikia tuke enentairjai “Yus timiá úuntaiti” tajai.

⁴⁷ Tura Uunt Yuska winia Uwemtikruru asamtaí ti waraajai.

⁴⁸⁻⁴⁹ Wisha péejchach aĩn ni wakeramurĩn umik-tajtsan wakerakui winia enentáimturayi. Tuma

asamtai ashí aents, “Marincha Yus shiir awajsaiti” tuke turutiartatui. Yuska imiá penker tura imiá kakaram ana nu winia ti uuntan túrutaiti. Tuma asamtai ashí aents “Marincha Yus shiir awajsaiti” turutiartatui. Núnaka yamáí nan̄kamamunak tuke turutú ajartatui.

⁵⁰ Tura Nin umirkatniun wakerana nunasha Yus tuke waitnentrartatui.

⁵¹ Ti itiurchatan páchitsuk túraití Nii. “Nan̄kaamantuitjai” tu enentáimtumainia nuna nupetkaiti.

⁵² Ashí akupin ainia nuna awakkaruiti. Tura íksan̄ péjchach ainia nuna uunt awajsaruiti.

⁵³ Péñker ana nuna kitiainiakui Yus péñkeran súsaruiti. Tura antsu “ashí takakjai” tuinia nuna aya júnik awajsaruiti.

⁵⁴ Israer-shuar Niiniu ájinia núnaka waitnentratniun kajinmattsuk yáinmákuítji.

⁵⁵ Yaunchu ii Uuntrí Apraáman tura ní shuarnasha “túrattajai” timia nuna ímiatrusan̄ tuke túraití.” Nuní tímiayi Marí.

⁵⁶ Marikia Irisapítjai menaintiú nantu pujus ni jeen waketkimiayi.

Imiakratin Juan̄ka akiiniamurí

⁵⁷ Nuyasha ni jurertin tsawantrí jeamtai Irisapítcha uchin áishman̄kan takusmiayi.

⁵⁸ Tura ni shuarísha, ni írutramurísha “Irisapítian Yus ti shiir yáinmiayi” tuíniak, nin iyuwearmiayi. Tura máí-metek warasarmiayi.

⁵⁹ Israer-shuar túrutai júnisaiti: uchi akiiniamurí uchu tsawant jeamtai, shunichirí nuapen tsupiktin awai, sirkunsisiún tutai. Yus nuna

tú tiniu asamtai tuke túrin ármiai. Wats, Iris-apítia uchiṛi akiiniamurṛiniṇiṇi uchu tsawant jeamtai tsupirkatai tusar ni jeen jearmiayi. Nuṇkia ni aparṛi naarṛi Sakarías anaikiataitsar wakeriarmiayi.

⁶⁰ Tura ni nukurṛi tímiayi “Atsá. Antsu ni naarṛi Juan átatui.”

⁶¹ Tutai tiarmiayi “¿Nusha urukamtia? Amée shuarumsha nu náartincha áwak’ tiarmiayi.

⁶² Nuṇkia uchi aparṛin “¿Warṛi anaikiatajtsam wakeram?” tusar aya úwejejaiṇ iniasarmiayi.

⁶³ Tutai uchí aparṛisha “Nakash surusta; áartaj tusan wakerajai” tusa aya úwejejaiṇ iniakmamiayi. Takui nakash susam, ni naarṛi Juánkaiti, tu áarmiayi. Nuna wáinkiar “Ayawa urukakun ta” tu enentáimprarmiayi.

⁶⁴ Nú chichamaik Sakarías chichatsuk pujamun chichakmiayi. Tura nuṇ Yusa náarincha shiir awajsamiayi.

⁶⁵ Nuṇkia ni írutramurṛisha ashamkarmiayi; tura ashí Jutía nunka murá amia nuṇ nu túrunamun ujakam ashí nekaawarmiayi.

⁶⁶ Nu túrunamun antukar ti enentáimsarmiayi. Tura “juṇ uchin Yus nekas pujurtsuk. Tuma asamtai uunt ajas ¿urukuk ati?” tu enentáimprarmiayi.

Sakarías Yus jintintiam tímiania nu

⁶⁷ Uchí aparṛi Sakarías, Yusa Wakaní pimiutkam tura Yus jintintiam, juṇa tímiayi:

⁶⁸ “Israer-shuartí ii Yusṛi naarṛi shiir awajsatniuitji. Ii Yúsṛisha tarutmaitji. Tura uwentikrampraitji.

69 Yaunchu ii uuntri Tawit Yusa wakeramurijjai uunt akupin áchamkia. Tura ni ukurin ti kakaram Uwemtikkiartinian suramsaitji.

70-72 Yuska ii nemasriya tura in nakitramaini-ajnia nuyá uwemtikrampratniun enentáimsamia nuna, yaunchu ni etserniurin penker armia nuna ujakmiayi. “Winia ti penker chichamprun tájana nuna yapajitsuk umirkan tuke wáitnentratajrume” yaunchu ii úuntrin tímiania nunasha ni etserniurin ujakarmiayi. Yaunchu nu ujakma yamá iisha wainji.

73-75 Nu ujakman Yuska yámankamtaik imiá yaunchu ii uuntri Apraáman tíchamkia. Apraáman ujakmia nu júiti: “Wi wakeraj nútiksaran, Winia umirtukar penker wekainia nuna ni nemasriya uwemtikrattajai. Sapijmiatsuk winia tuke takartusarat tusan túrattajai” Yus tímiayi Apraáman. Iisha ni shuari asakrin, nuna taku incha túramaji.

76 Tura amincha, uchiru, “Uunt Yusna etserniuiti” turamartatui. Amesha ni tátintri iwiarataj tusam Uuntai émkim wétatme.

77 Ni shuari, ni tunaari tsankurnar uwemprarat tusam túrattame.

78-79 Yuska ashí shuaran anea asa, incha wáitnentramak ni pujamunmaya ni tsáapnintrin suramsaitji. Ni enentáin kiritniunam wekainia nuna, mesertinnium jeatemá ásarmatai, ni tsáapnintri jeat tusa túraiti. Tura ashí incha ii enentáin imiatkinchanum wekasarmí tusa túraiti.” Nuní tímiayi Sakarías.

80 Uchisha tsakarmiayi. Tura Yúsan nekaki-nekaki wémiayi. Israer shuarum etserkatin

tsawantri jeatsainkia atsamunam pujuyayi.

2

Jesusa akiiniamuri

(Mateu 1.18-25)

¹ Wats, Juan akiiniamia nú uwitin uunt akupin Akustu ashí nuñkanam áentsun nekapmarartí tu chichakmiayi.

² Nu nekapmartinian yaunchu túrushtain yamá túriarmiayi. Siria nuñkanam Seriniu akupin pujái túrawarmiayi.

³ Ni naari áartaj tusa ashí shuar ni nuñkenin wétin ármiayi.

⁴ Tuma asamtai José Nasarét péprunmaya Kariréa nuñkanam amia nuyá jünki Pirin péprunam Jutía nuñkanam amia nuí wémiayi. Juseka Tawit weeanam akiinia asa, ni nekas nuñkenka Pirinkauyayi.

⁵ Nu asamtai, ni náarin áartaj tusa José wémiayi Marijiai. Marisha José núweyayi. Tura tsaniñcharuyayi. Túmaitiat Marisha Yusa Wakaní kakarmarijiai ajamtiniuyayi.

⁶ Tura nuí Pirinnum pujuiniaí Marí takustintri jeamiayi.

⁷ Nuí iwiairin uchin áishmankan takusmiayi. Tura uchi penutaijiai penuar, waaka yurumtainiam áepsamiayi. Írar kanutainiam pujustin ankant atsa asamtai túrawarmiayi.

Murikiun wáinniun nayaimpinmaya suntar Yus akatar akuptukmia nu

⁸ Tura Pirinnum tíjiuch murikiun wáinin kashi murikrin wáiniuk pujuarmiayi.

9 Túmainiai nayaimpinmaya suntar murikiun wáinin matsatainian wantintiukmiayi. Tura Yúsnumiá tsáapnin ni matsatainiamunam etsantramiayi. Túrunamtai murikiun wáinniuka ti ashamkarmiayi.

10 Túrasha nayaimpinmaya suntar tímiayi “Ashí áentsnum ti warastin atí tusan ti penker chichaman itiarjiarme.

11 Júiti: yamá tsawantaj uunt Tawitia péprurin Piriñnum yaunchu Yus anaikiamu KRISTU tu-tai, uwemtikramprataj tusa akiintiurmarme. Nu Uchisha ashí áentsun akupniuiti, tímiayi.

12 Tura jujai nekaattarme: uchi penutaijjai pen-uarma waaka yurumtainiam tepá wáinkiattarme. Nu wáinkiarum nekas júiti, tu nekaattarme.”

13 Nu chichamaik nayaimpinmaya suntar ti untsurí, nayaimpinmaya káunkarmiayi. Túrawar Yusa naarin shiir awajainiak juna tiarmiayi:

14 “Nayaimpinmasha Yus nañkaamantuiti tu enentáimtusarti. Tura ju nunkanmasha Yusjai nawamnaikiaru ainia nu imiatkinchanum pu-jusarti.” Tu tiarmiayi.

15 Tura Yusa suntari nayaimpiniam waketkiar-matai murikiun wáinin tiarmiayi “Wats, Piriñnum wárik wetái. Nu túrunamu Yus turamajnia nu iyumi” tiarmiayi.

16 Nuna tiar wárik wearmiayi. Tura Marincha Jusencha wáinkiarmiayi. Tura uchincha waaka yurumtainiam tepan wáinkiarmiayi.

17 Wear nuna wáinkiar, nayaimpinmaya suntar uchi túrunamurin timia nuna etserkarmiayi.

18 Tura murikiun wáinin tiarmia nuna an-tukaruka ti enentáimtusarmiayi.

19 Túrasha Marikia ashí túrunamia nuna ni enentáijiainkia enentáimtu pujumiayi.

20 Tura murikiun wáinniuka antukarmia nuna enentáimtusar, tura ísarmia nunasha enentáimtusar “Nayaimpinmaya suntar ujatmakmajnia tímiatrusan túrunayi” tiarmiayi. Tuma ásar Yusa náarin shiir awajsar kantampruawar waketkiarmiayi.

Uchin Jesusan Yusa Uunt Jeen itiarmania nu

21 Tura uchi akiiniamu uchu tsawant jeamtai, ni túrutairin túrin ásar, ni shunichiri nuapen tsupirkarmiayi. Túrawar Marí ajapratsain nayaimpinmaya suntar tímia nútiksai “Jesus” anaikiarmiayi.

22 Tura Muisais akiiniatniunam akupkama núnisan, tsawantri jeamtai, Yusa Uunt Jeen Jerusarénum uchin Yus iiktustai tusar júkiarmiayi.

23 Kame Yus-Papinium ju aarma awai:

“Ashí uchi iwiairi áishman akiinkiuŋka Yusna átatui.”

24 Tuma asamtai, Marí Yusa Uunt Jeen wáitsuk pujamu wayatniuri jeamtai, uchin Yus iisti tusa Yusa Uunt Jeen Jerusarénum pujana nuji itiarmai. Tura yampitsan jímiaran súsarmiayi. Muisáis akupkamun umiiniak nuna túrawarmiayi.

25 Nu túmai Semeún naartin áishman Jerusarénum pujumiayi. Semeúnsha Yusa Wakaní pujurma asa péŋker áishmankauyayi. Yúsan nekas enentáimtiniuyayi. Yusa anaikiamurijiai Israer-shuar ankant ajastin jeati tusa nákauyayi.

26 “Winia anaikiamur KRISTU tutai wáintsuk jákashtatme” uunt Yusa Wakaní tu jintintiamiayi.

27 Nú Semeún̄ Yusa Wakani “wetá” tutai, Yusa Uunt J̄een wémiayi. Tura nú tsawantai Muisáis tímia núnisan̄ umirkatai tusar Marisha Jusesha uchin Jesusan Yusa Uunt J̄een itiariarmiayi.

28 Itiariarmatai Semeún̄ uchin jusa miniakas Yús̄an áujuk̄ j̄una tímiayi:

29 “Yamaikia, Uunta, Am̄ijn̄ wi jeatin an̄kant atí. Turutmiamna nu ímiatrusmek umikiume.

30-31 J̄u Uchi ashí aents uwemtikrartá tusam susamna nuna yamáí imia winia j̄iirujai wáinkiajai.

32 Israer-shuarcha ainia nu tsáapninium wekasarat tusa akuptukmaiti j̄u Uchi. Tura Israer-shuar Áminiuram ájiniá nuna ashí aents shiir enentáimtikrartí tusam j̄u Uchi akuptukmaitji. Nuna wáinkian shiir enentáimsan̄ jákatniuitjai.”

33 Tura Semeún̄ Uchiniun tu chicharkui Jusesha Jesusa nukurísha ti enentáimprarmiayi.

34 Semeún̄sha chichaak “Yus shiir enentáimturmasartí” nin tímiayi. Nuyasha Marin chicharuk tímiayi “Nekaata. J̄u Uchin Israer-shuartisha untsurí nakitrar iniarartatji. Tura chíkich Israer-shuartikia j̄u Uchin shiir enentáimtusar ti wararsartatji. Tura Uchiram Yusa kakarmarin̄ ti paant iniakmastatui. Tuma ain̄ untsurí Aun yajauch chichariartatui.

35 Nujai shuar ni enentáin̄ warinia enentáimia nu, paant átatui. Maaj, ashí nu túmakui, ijiumua núnismek ame enentáimin̄ ti wáitsattame, Mariya.” Tu chichasmiayi Semeún̄.

36 Nuwasha Ana naartin̄ nuj̄ Yusa Uunt J̄een pu-jumiayi. Niisha Yús̄nan etserniuyayi. Ni aparísha

Panuíruyayi tura Aser shuarauyayi nu nuwa. Ni-isha ti úuntchiyayi. Niisha yama nuatnaikiamujai siati uwi ni áishrijjai tsaniñ pujusarmiayi.

³⁷ Tura wajemamiayi. Tura uchenta kuaru uwi takakuyayi. Tura nin^ñia Yusa Uunt Je^ñia jíintsuk káshisha tsawaisha tuke Yúsan áujniuyayi. Tura yurumtsuk Yúsan áujniuyayi.

³⁸ Semeún^ñ tuasua amikmatai Anasha taa, Uchin wáiniak Yúsan yuminsamiayi. Tura Jerusaré^ñnum Yus uwemtikrampratai tusa ná^ñkarmia nuna áujku^ñka uchin áujmat wémiayi.

Nasaré^ñnum waketkiarmiania nu

³⁹ Nuyá Yus tímia nuna ashí túrawar amikiar Kariréa nun^ñkanam, kame nii pujumia nú peprunam Nasaré^ñnum Jusesha Marisha Uchisha waketkiarmiayi.

⁴⁰ Uchi Jesus tsakaki, kakaram ajaki tura nú nan^ñkaamas nekaki wémiayi. Tura Yus Nin ti shiir awajsamiayi.

Jesus Yusa Uunt Je^ñ túrunamuri

⁴¹ Jusesha, Jesusa nukurísha tuke uwitin paskua námper jeakui Jerusaré^ñnum weu ármiayi.

⁴² Ni túrutairi túruiniak, Jerusaré^ñnum weak Jesusan tuse uwi jeamtai júkiarmiayi.

⁴³ Námper amuukamtai ni nukurísha Jusesha nékachmanum Jesuska Jerusaré^ñnum juákmiayi.

⁴⁴ Marisha Jusesha “wí shuarjai winiawai” tusa, núnaka e^ñatsuk chikichík tsawant wekasarmiayi. Nuyá wáinkiat^ñ tukamá, ni shuari^ñin tura ni nékamunam e^ñakarsha,

⁴⁵ wáinkiacharm^ñayi. Nuin^ñkia Jerusaré^ñnum ataksha waketrukiarmiayi, e^ñaktai tusar.

46 Tura menaintiú tsawant eakar Yusa Uunt Jeen Yus akupkamun jintinnian anturak anintrú pujan wáinkiarmaiya.

47 Tura nuj ashí Jesusan anturkarmiania nu, niisha ti nékakui tura áimtanash ti pénker áimkiui, ti enentáimturarmiayi.

48 Ni aparísha nukurísha tumáa pujan wáinkiar, ti enentáimprarmiayi. Tura ni nukurí chichaak tímiayi “Uchiru, ¿ausha urukamtai itiurchat enentáimtikrurmam? Ame apasha wisha urukayik tusar ti eakjame” tímiayi.

49 Tutai Jesus tímiayi “¿Urukamtai eattrum? Winia Aparnan túratniuitjiana nuka nékatsrumek” tímiayi.

50 Tura timia núnaka penké nekaacharmiayi.

51 Nuyá Jesus niijjai Nasarétnum waketkimiai. Ninkia tuke umiriarmiayi. Ashí nu túrunamun Marikia tuke enentáimtu pujumiayi.

52 Jesuska tsakaki, tura nekaki wémiayi. Yussha tura aencha Nin shiir enentáimtiarmiayi.

3

Imiakratin Juanka etserkamuri

(Mateu 3.1-12; Márkus 1.1-8; Juan 1.19-28)

¹ Tipiriu uunt akupin pujamu kinse uwí jeamtai, Jutía nunkanam Punseu Piratu akupin pujumiayi. Tura Kariréa nunkanam Erutis akupin pujumiayi. Itiurea nunkanmasha Trakuniti nunkanmasha ni yachí Jiripi akupin pujumiayi. Tura Apirinia nunkanam Risanias akupin pujumiayi.

² Tura nu uwitin Anassha Kaipíassha Israerpatri uuntri pujuarmiayi. Nu uwitin Sakaríasa

uchirí Juan atsamunam pujan Yúsaiya chichaman antukmiayi.

³ Nuyá Jurtañ entsanam supichik matsamarma nuna Juan wekaatusar juna tímiayi “Winia tunaarun Yus tsankurturat tusarum, enentai yapajiárum imiantiarum.” Tu ujakmiayi.

⁴ Nu ujakman Isayas yaunchu juna áarmiayi:

Atsamunam wekaana nu untsunmun ántuiniawai.
Nii untsunuk juna tawai: Atumí enentái
Uunta jinti iwiarturtarum; naka awajsatarum.

⁵ Jápaaka ainia nusha áimkiamu arti. Naint ainia nusha paka awajsamu arti. Jintia apijiaru ainia nusha naka jiikmia arti. Tura pujutrin ainia nusha métekrak paka awajsamu arti.

⁶ Túrunamtai ashí nunkanmaya aents Yúsaiya uwempratin aan nekaawartatui.

⁷ Untsurí aents imiatit tusar tariarmia nuna Juan chicharainiak tímiayi “Napia áaniutirmincha, ti asutniátin jeatemáttana nuyá uwemprataram tusa ¿ya ujatmakuram? tímiayi.

⁸ “Iikia Apraám weeitji, tuma asakrin Yus shiir enentáimturmají” tu enentáimtumasairap. Antsu enentáim yapajiámuitkiuinikia péñker wekaamurmijíai paant iniakmatarum. Warí, Yus wakerakka, ju kayan Apraáma shuarin páchitsuk najankainti, tímiayi.

⁹ Aneartarum. Numi ajaktinian kampuwarin jacha atuttsamuiti. Numi péñker nereatsna nuka ajakar jinium apeamu ártatui” tímiayi.

¹⁰ Tutai aentska enentáimprar “¿Nuiñkia itiurkatjik?” tiarmiayi.

11 Tutai Juan tímiayi “Jimiará pushin takakna nu, takaktsuna nuna chikichan súsatniuiti. Yurumkan takakna nusha takaktsuna nuna ajamsatniuiti” tímiayi.

12 Uunt akupniu kuítrín juu armia nú shuar imiantiaj tusar Juánkan weriar aniasarmiayi. “Uunta, ¿iisha warí ititurkatjik?” tiarmiayi.

13 Tutai Juan tímiayi “Kuit uunt akupin tana nu iniankasrum achikiairap.”

14 Suntarsha aniasarmiayi “Uunta, ¿iisha warí ititurkatjik?”

Juansha tímiayi “Ame kakarmarmijiai chikichna jurukip. Tura nin tsanumpruraip. Tura uunt akupin akirmana nújain warasta” tímiayi.

15 “Ju Juan Yusa anaikiamurinchuashit” tu enentáimsar paant nekaataitsar nákararmiayi.

16 Tumaj Juan tímiayi “Wikia aya ayashmin entsanam imiajrume. Tura wijiai nankaamas ana nu tátatui. Ni sapatrì jinkiamurinkisha atitrachminiaitjai. Niisha taa, imiantinia áanis tura jíiya áanis Yusa Wakanin enketramprattarme.

17 Shuar aruusan awajtia núnisan, nusha yajauch ana nuna ajapa aya pénkernak júuktatui. Neren ikiustatui tura yajauchinkia ji tuke kajinchatainiam apeattawai” tímiayi.

18 Juan nu arant shiir chichaman áentsun ti núkap ujakarmiayi.

19 Tura nuyasha akupin Erutisan chicharkamiayi. Ni yachi Jiripi nuarin Jirutíasan kasaraku nuatkui tura chíkich yajauchincha túrakui chicharkamiayi.

20 Tura Erutis núnaka ántutsuk chíkich yajauchin túramiayi. Juánkan achik sepunam enkeamiayi.

*Jesusa imianmiari**(Mateu 3.13-17; Márkus 1.9-11)*

²¹ Nu túruntsain, Juansha ashí nú nunkanmaya áentsun imiak pujurainaj Jesussha imianmiayi. Ni-isha Yúsan áujuk pujaj nayaimpisha uranmiayi.

²² Tura Yusa Wakaní yámpits najanar paant tarurmiayi. Tura Yus nayaimpinmaya chicharuk “Amek winia aneamur Uchiruitme; Ámin ti warar-jame” tímiayi.

*Jesukrístu shuari**(Mateu 1.1-17)*

²³ Jesus trainta (30) uwí takaku asa ni takatrín nankamamiayi. “Jusé uchirínti” tiniu armiai. Jusésha Iría uchiríyayi.

²⁴ Irísha Matata uchiríyayi; Matat Riwí uchiríyayi; Riwí Mirkía uchiríyayi; Mirki Jana uchiríyayi. Jana Jusé uchiríyayi;

²⁵ Jusé Matatíasa uchiríyayi; Matatías Amusa uchiríyayi; Amus Najuma uchiríyayi; Najum Esrí uchiríyayi; Esri Nakaia uchiríyayi;

²⁶ Nakai Maata uchiríyayi; Maat Matatíasa uchiríyayi; Matatías Semái uchiríyayi; Semái Jusé uchiríyayi; Jusé Jutáa uchiríyayi;

²⁷ Jutá Juana uchiríyayi; Juana Resa uchiríyayi; Resa Surupapira uchiríyayi; Surupapir Saratiira uchiríyayi; Saratiir Nerí uchiríyayi;

²⁸ Neri Mirkí uchiríyayi; Mirki Atí uchiríyayi; Atí Kusama uchiríyayi; Kusam Irmutama uchiríyayi; Irmutam Ira uchiríyayi;

²⁹ Ir Jusué uchiríyayi; Jusué Irieséra uchiríyayi; Iriesér Jurema uchiríyayi; Jurem Matata uchiríyayi;

³⁰ Matat Riwi uchiríyayi; Riwí Semeúnka uchiríyayi; Semeún Jutáa uchiríyayi; Jutá Jusé uchiríyayi; Jusé Junańka uchiríyayi; Junań Iriakímia uchiríyayi;

³¹ Iriakím Mirea uchiríyayi; Mirea Mainiánka uchiríyayi; Mainián Matata uchiríyayi; Matata Natańka uchiríyayi;

³² Natan Tawitia uchiríyayi; Tawit Isaí uchiríyayi; Isaí Upitia uchiríyayi; Upit Puusa uchiríyayi; Puus Saramúnka uchiríyayi; Saramún Naasunka uchiríyayi;

³³ Naasun Aminiatapa uchiríyayi; Aminiatap Arama uchiríyayi; Aram Esruma uchiríyayi; Esrum Paresa uchiríyayi; Páres Jutáa uchiríyayi;

³⁴ Jutá Jakupa uchiríyayi; Jakup Isaka uchiríyayi; Isak Apráama uchiríyayi; Apráam Tarea uchiríyayi; Taré Nakura uchiríyayi;

³⁵ Nakur Seruka uchiríyayi; Seruk Rakaua uchiríyayi; Rakau Pirikia uchiríyayi; Pirik Epera uchiríyayi; Eper Sará uchiríyayi;

³⁶ Sara Kainiánka uchiríyayi; Kainián Arpaksata uchiríyayi; Arpaksat Sema uchiríyayi; Sem Nuaia uchiríyayi; Nuai Ramikia uchiríyayi;

³⁷ Ramik Matusarínkia uchiríyayi; Matusarín Euka uchiríyayi; Euk Jaritia uchiríyayi; Jarit Maararíira uchiríyayi; Maararír Kainiańka uchiríyayi;

³⁸ Kainiań Enusa uchiríyayi; Enus Seta uchiríyayi; Set Atańka uchiríyayi; tura Atań Yus najanamuyayi.

Jesusa nekapsamuri
(*Mateu 4.1-11; Márkus 1.12-13*)

¹ Jesusa enentáin Yusa Wakaní pimiutkamiayi. Jesussha Jurtañ entsanmaya waketkimtai Yusa Wakaní aents atsamunam jukimiayi.

² Tura nuñsha kuarenta tsawant pujusmiayi. Tura íwianch Nin tunaanum ajuaraintiajtai tusa pujurmiayi. Nu kuarenta tsawantin Jesus yurumsuk pujá asa ti tsukammiayi.

³ Nuñkia íwianch chicharuk “Amesha nekas Yusa Uchiríntkiumka ju kaya apatuk najanata” tímiayi.

⁴ Tutai Jesus tímiayi “Yus-Papí tawai: “Aya apatukujain shuar iwiaaku pujuschamniaiti. Antsu ashí Yus-Chicham tana nujañ nekas iwiaaku pujusminiaiti,” tawai” tímiayi.

⁵ Tura nuyá íwianch naint yakí wájakmanum jukí, ashí nuñka ainia nuna ju chichamaik iniaktusmiayi.

⁶⁻⁷ Tura chicharuk tímiayi “Ashí ju nuñka wáinmena nu wíniaiti. Tura wi wakerajna nú shuaran súsatniuitjai. Tuma asamtai tikishmatrurakminkia ju nuñkanam ashí akupkatniun susattajme. Tura nuñ ni warirí ainia nusha áminiu átatui” tímiayi.

⁸ Tutai Jesus tímiayi “Yus-Papí tawai: “Aya Niñki Yus ame Úntrum tikishmatram enentáimtustiniaitme.” Tau asamtai, werumta, iwianchi” tímiayi.

⁹ Ataksha íwianch Jesusan Jerusarén péprunam jukimiayi. Tura Yusa Uunt Jee yakiini iwiak tímiayi:

10 “Yus-Papí tatsuk:
“Yuska ni suntar_{in} wáinkiatá tusa akupturmaktatui.

11 Kayanam ajintra_{in} tusa wen_{kur}maktatui.”
Tuma asamtai nekas Yusa Uchir_{ink}iumka juyá akaikim iniaata” tímiayi.

12 Tutai Jesus ámiuk tímiayi “Yus-Papí junasha tawai:

Yus ame Úntrum nekapsataj tiip.”

13 Tuma asamtai íwianch pen_{ké} tujintiak ishichik tsawant Jesusan iniaisamiayi.

Kariréa nun_{kan}am Jesus ni takatr_{in} nan_{kan}amiania nu

(Mateu 4.12-17; Márkus 1.14-15)

14 Jesus ni enentá_{in} Yusa Wakan_í kakarmari_{in} pimiutkamu ajas Kariréa nun_{kan}am waketkimiayi. Nu nun_{kan}am nan_{ka}amantu túramur_{in} áujmatiarmiayi.

15 Nu nun_{kan}am ashí péprunam Israer-shuar iruntai je_a armia nu_j unuiniarmiayi. Tura an-turkarmia nuka ni náar_{in} shiir awajsarmiayi.

Jesus Nasarétnum pujumiania nu

(Mateu 13.53-58; Márkus 6.1-6)

16 Ni tsakarmari_{in} Nasarétnum Jesus wémiayi. Tura Israer-shuar ayampratin tsawantin iruntai je_{an}am way_{am}iyayi, tuke turin asa. Tura wayá Yus-Papin áujsat_{aj} tusa wajakmiayi.

17 Nu_{in}kia Yúsnan etserin Isayasa áarman_{in} súsar_{mi}ayi. Nuna urak, nu_j ju_{na} áarman wáinkiamiayi:

18 Yusa Wakan_í winí pujurtawai. Shuar warainiachun shiir chichaman ujaktinian

anaitiukuiti. Kúntuts enentáimiar wake mesek pujuinian tsuártinian akuptukuiti. Tura ji kusuruncha ímtiktinian, tura yajauch awajsamu ainia nuna pé_nker awajsatniuncha,

19 tura Uunt Yus, shuáran yain_tin tsawantri_i jeán etserkatniuncha akuptukuiti.

20 Nu áarman aujsua amik papin nukukmiayi. Tura iruntai je_nam yáimin pujan susa iniais Ni_nkia etserkataj tusa pujusmiayi. Tura ashí shuar pujuarmia nu é_mamkes ii pujuarmiayi.

21 Jesussha chicharuk tímiayi “Yus-Chicham yamáí antukurmena nu yamáí tsawantin túrunayi.”

22 Jesusan ashí pé_nker áujmatiar_miayi. Tura Jesus ti shiir chichaakui ti enentáim_prar “Juka Jusé uchir_inchukait” tiarmiayi.

23 Tu enentáimiainiakui, Jesus chicharuk “Atumsha shuar tuke tuinia núnisrumek, “tsuákratniuitkiúmka amek tsuámarta,” turuttiatrume. Kapernáum péprunam aentsti túrachmin túramamna núnismek ju_isha túrata tusarum nu turuttiatrume.

24 Túrasha nekas tájarme, Yúsnan etserniun ni nu_nkenkikia nii tana nuna anturainiatsui.

25 Nuyasha tájarme, Irías pujumia nú tsawantin, menaintiú uwí nan_kaamas yumi yutukcha asamtai ashí Israer nún_kanam ti tsuka amia nu_i ti untsur_i waje irunmiayi.

26 Tuma ai_n nu wajen yain_ti tusa Yus Iríasan akuptukchamiayi. Antsu chíkich nu_nkanmaya wajen Sarepta péprunam pujumia nuna yain_ti tusa

akuptukmiayi. Sarepta pepru Sitiún péprunam tíjiuch pujawai.

27 Núnisan ii nunkesha Iriséu pujumia nu tsawantin ti untsurí tunamaru iruniarmiayi. Tura núnaka tsuárcharmiayi. Antsu chíkich nunka, Sírianmayá Naamankan tsuármiayi” tímiayi Jesus.

28 Israer-shuarsha iruntai jeen pujuarmia nu, nuna antukar ti kajerkarmiayi.

29 Tura wajatkiar Jesusan jiiki péprunmayá akupkarmiayi. Tura pepru amia nuí naint yakí nánkatkamunam, nuyá akaki ajuatai tusar júkiarmiayi.

30 Túrasha Jesuska irunar matsatainiamunman etempraktak jiinki wémiayi.

*Iwianchrukun Jesus tsuármiania nu
(Márkus 1.21-28)*

31 Nuyá Jesus Kariréa nunkanam Kapernáum pepru amia nuí wémiayi. Tura Israer-shuara ayampratin tsawantriin tuke etserki wémiayi.

32 Yusa kakarmarin takaku asa nujai etserkamiayi. Tuma asamtai “Yusa kakarmarijjiai unuiti-antsujik” tiar ti enentáimprarmiayi.

33 Chíkich tsawantai áishman iwianchruku Israer-shuar iruntai jeanam pujumia nu untsukumuk tímiayi,

34 “Inikiartusta. Iikia Áminkia pachistin nakiti-aji. ¿Warí, incha amukratkataj tusam táchamek? Wikia nékajme. Ámeká ti penker Tunaarincha núitme” tímiayi.

35 Tutai Jesus iwianchin kakantar chicharuk “Takamatsata. Ju áishman ikiuktia” tímiayi.

Tutai nu chichamaik íwianch áishman_{numi}ã jinki weaknun_{ká} ajuant ikiukmiayi. Túrasha nekas yajauch awajtsuk ikiukmiayi.

³⁶ Ashí pujuarmiania nu ti enentáimiar mai tunai ajarmiayi. “¿Jusha warí chichamait? Ju áishman Yusa kakarmari_{jia}i iwianchin jiki awe-matsuk” tiarmiayi.

³⁷ Tura ashí nú nun_{kanam} Jesusa túramur_{in} áujmatiar_{miayi}.

Semun Pitru tsatsar_{in} Jesus tsuármiania nu
(Mateu 8.14-15; Márkus 1.29-31)

³⁸ Jesussha Israer-shuara iruntai jeeniã jinki Semun_{ka} jeen wémiayi. Semun_{ka} tsatsari _{tsuer} ti jáamiayi. Ti jaakui Jesusan “tsuárturtá” tiarmiayi.

³⁹ Jesussha jaa tepan tsunsumprua tsuemun “michatrata” tímiayi. Tutai nú chichamaik nuwasha michatramiayi. Nú chichamaik nantaki nincha ayurawarmiayi.

Untsurí jaan Jesus tsuármiania nu
(Mateu 8.16-17; Márkus 1.32-34)

⁴⁰ Etsa akaikin aj ni shuari nán_{kamas} sunkurjai jaarmia nuna Jesusan ikiaatkarmiayi. Jesussha jáinian chikichiniak chikichiniak uwejéj_{ai} antin_{kiar} tsuárrarmiayi.

⁴¹ Ti untsurí iwianchr_uku armia nunasha iwianchr_{in} jír_{kiar}miayi. Jíinkiar íwianchkia unsumainiak “Ámeka Yusa Uchir_{in}me” Jesusan tiarmiayi. Tura niisha “Jesuska Yusa anaikiamur_{inti}” tu nékainiakui Jesus kakantar chicharak itiatmamtikiarmiayi.

*Kariréa nunkanam Jesus etserkamiania nu
(Márkus 1.35-39)*

⁴² Kashin káshik tsawaak Jesus péprunmaya jiinki atsamunam Ninki wémiayi. Tura shuarsha eakiar ni pujamunam jeariarmiayi. Tura iijiai tuke pujusat tusar emetataitsar wakeriarmiayi.

⁴³ Túmain Jesus tímiayi “Yus ii enentáin akupkatajtsa wakera nú shiir chichaman chíkich péprunam matsatainia nunasha ujaktiniaitjai. Nu túrata tusa akupkamuitjai” tímiayi.

⁴⁴ Tuma asamtai Kariréa nunkanam Israer-shuar iruntai jeanam Jesus tuke etserki wémiayi.

5

*Namakan ti untsurín achikiarmiania nu
(Mateu 4.18-22; Márkus 1.16-20)*

¹ Chíkich tsawantai Jesus Jinisarít antumianka tutainium káanmatkari pujai ti untsurí shuar, Yusa chichamen antuktai tusar wakeruiniak Jesusai káunkarmiayi. Antuktai tusar wakeruiniak kaē ajattsarmiayi.

² Tura jimiará kanun antumiankan káanmatkariin tepan wáinkiararmiayi. Ni nérenniurinkia jinkiar ni nekarin nijia pjuinia asamtai kánuka ankant ármiayi.

³ Tuma asamtai Jesus Semunka kanurín enkempramiayi. Tura Semunkan chicharuk “Ishichik ajapén juruktía” tímiayi. Nuiñkia kanunam enkemas áentsun káanmatkanam pujuinian unuñiamiayi.

⁴ Unuñiasua amik Semunkan chicharuk “Kanu kunanam jukim neka ai ajunkatarum” tímiayi.

5 Tutai Semuṅ tímiayi “Túrasha, Uuntá, káshisha tuke aju-junkuar tsawarji. Túrasha penké achikchaji. Kame áankisha Ame támajaj ajunkatjai” tímiayi.

6 Tura ajunkar namakan ti untsurín achikiarmiayi. Túram nekasha jaanaki wémiayi.

7 Tuma asamtai ni írutkamurín chíkich kanunam pujuinian uwejéjaj “winitia, yáintkiamniuram” tusar untsukarmiayi. Niisha táarmiayi. Túrawar jimiará kanunam métej awajsarmiayi. Tura kanusha init wayastatuk ajamiayi.

8 Nuna túramtai Semuṅ Pítur Jesusan tikishmatar tímiayi “Uuntá, wikia ti tunaitjai. ¿Wíjiaisha itiurak pujustam?”

9 Semuṅsha ni írutkamuríjjaj namakan timiá untsurín wáinkiar ashamkarmiayi. Tuma asa Semuṅsha nuní tímiayi.

10 Tura Sepetéu uchirí Jakupusha Juañsha Semuṅjaj pujuarmia nusha ashamkarmiayi. Tura Jesus Semuṅkan tímiayi “Ashamkaip. Yamaikia namaka-achinia áintsamek aents-eau ajastatme.”

11 Nuyasha kanurín kukar júkiar, ashí takakmaríncha ikiukiar Jesusan nemarki wearmiayi.

*Tunamaru áishmankan Jesus tsuármiania nu
(Mateu 8.1-4; Márkus 1.40-45)*

12 Ukunam Jesus chíkich péprunam pujaj tunamaru áishman taa Jesusan wáiniak tikishmatar nunká shushuma pankái Jesusan tímiayi “Uuntá, wakerutakmeka páchitsuk tsuáramniaitme.”

13 Nuna tutai Jesus antin tímiayi “Wakerajai. Tsuaajme.” Tura nú chichamaik tunamarusha péñker ajasmiai.

14 Túrasha Jesus chicharuk “Ámeka nu etserkaip, tímiayi. Antsu Israer-shuar Patrij werim ame pénker ajasmanum Muisáis akupkamia núnismek susata. Nujaj ashí shuar ame pénker ajasmarmin nekaawartatui” tímiayi.

15 Tura Jesusa túramurj ti etsernamiayi. Túmakui untsurj aents anturkataj tusar káutkarmiayi. Tura ni sunkurincha tsuámartaj tusar káutiarmiayi.

16 Núnisan Jesuska aents atsuiniamunam we ni Aparin áujmiayi.

*Emearun Jesus tsuármiania nu
(Mateu 9.1-8; Márkus 2.1-12)*

17 Chíkich tsawantaj Jesus unuiniak pujaj Pariséu aents tura Israer-shuara jintinniurisha Kariréa péprunmayasha, Jutía péprunmayasha tura Jerusarénumiasha káunkarmia nu antúu pujuarmiayi. Jaa tsuártinian Yusa kakarmarin takakuyayi Jesus.

18 Nuinkia emearun tampumpua kuaru shuar itiararmiayi. Jesus pujamunam init awayattsar wakeriarmiayi.

19 Tura shuar ti untsurj piaku asantai wayamnia atsumiayi. Túmaitkui yakiinj wear jean urakar, aents kaé ajas matsatmanum Jesus pujamunam emearun tampunam nená itiararmiayi.

20 Nin itiarmania nu, Jesus Yusa kakarmarin takakui, tú enentáimtamun Jesus nekáa emearun tímiayi “Ame tunaarum tsankuramuitme.”

21 Nuinkia Israer-shuara jintinniurisha, Pariséusha ni enentáin enentáimsar “¿Jusha yait

Yúsa náarín yajauch awajtin? Warí, aya Yúsak tunaan tsankurachminkiait” tu enentáimsarmiayi.

²² Tura Jesus ni enentáimsamurín nekáa tímiayi “¿Urukamtai tú enentáimprarum átum?

²³ Nuínkia ¿warí imiá yúpichuchit, tsuártiniak, ni tunaari tsankuratniuk?

²⁴ Wats, Aents Ajasu tutai Wisha tunaan tsankuratniun Yusa kakarmarín takakjai. Jujai nekaatarum tusan wats itiurchat tárumna nuna túrattajai.” Nuyá emearun chicharuk tímiayi “Amesha wajakim, tampuram achikiam ame jeemiin wetá.”

²⁵ Nú chichamaik emearu niisha íimiainiamunman tampurín achik wajaki ni jeen Yúsan wararki wémiayi.

²⁶ Túmakui ashí shuar ti enentáimprar Yusa náarín shiir awajsarmiayi. Tura ashamainiak “aentsti tujinkiamu yamá wáinkiaji” tiarmiayi.

*Riwin Jesus untsukmiania nu
(Mateu 9.9-13; Márkus 2.13-17)*

²⁷ Ukunam Jesus wekas akupniu kuítrín-juu, naari Riwí, ni chíkich naari Mateu, akupin akitiai jeanam pujan wáinkiamiayi. Wáiniak “nemartusta” tímiayi.

²⁸ Tutai Riwí wajaki takakmarínkia ikiuak Jesusan nemarsamiayi.

²⁹ Nuyá ukunam Riwí namperan Jesusan najatamiayi. Tura untsurí akupniu kuítrín-juu tura chíkich shuarsha káunkar misanam pujuarmiayi.

³⁰ Tura Pariséusha Israer-shuara jintinniurisha Jesusan tsanumpruiniak Jesusa unuiniamurín tiarmiayi “¿Maaj, urukamtai atumsha akupniu

kuítrín-juu ainia nújaisha tura chíkich yajauch shuarjaisha iruntrarum yurumprum?”

³¹ Tutai Jesus áimkiamiayi “Shuar jaachu péñker ainiana nu ¿tsuákratniun atsumainiawak? Antsu jaa ainia nu tsuákratniun atsumainiawai.

³² “Wikia péñkeraitjai” tuinia nuna untsuktajt-san táchaitjai. Antsu yajauch shuar ni enentáin yapajjá Winia ajasat tusan untsuajai” tímiayi.

Yurumtsuk Yus áujatniun Jesusan aniasarmiana nu

(Mateu 9.14-17; Márkus 2.18-22)

³³ Nuyá Jesusan aníak tiarmiayi “Juanka unuini-amurisha, Pariséu unuiniamurisha yurumtsuk Yúsan áujainiatsuk. Tura ame unuiniamurmeka ¿urukamtai ijiarma Yúsan áujainiatsu?” tiarmiayi.

³⁴ Tutai Jesus tímiayi “Nuatma nampernum, ¿ip-iaamu ainia nu ijiarmamniakait, yamá-nuatu pu-jai?”

³⁵ Atsá. Wats Wisha ukunam junaktiatjai; nuñkia ijiarmatin átatui” tímiayi.

³⁶ Tura junasha nujai métek-taku unuiniamiayi: “¿Yamaram pushí tsupikiar nujai arut pushiniam anjtu kminkiait? Nu túramka yamaram pushí yajauch ajasaintiui; túrasha shiir anujkamu arut pushijjai mai metek yamaram wáinkiachminiaiti.

³⁷ Núnisan nijiamanch yamá nawamu nuap najanamu arutnum yaraachminiaiti. Túramka nijiamanch kariak ijiakratniuiti; túmak nijiamchisha nuap najanamusha mai metek menkainiawai.

³⁸ Tuma asamtai nijiamanch yamá nawamu yamaram nuap najanamunam yaraatniuiti. Nu túramka mai metek péñker átiniaiti.

³⁹ Yaunchu nawamu úmana nuka yamarman nakitrattui. “Yaunchu nawamu imiá penkeraiti” tiártatui” tímiayi Jesus.

6

Ayampratin tsawantaj trikiu neren achikiarmiania nu

(Mateu 12.1-8; Márkus 2.23-28)

¹ Ayampratin tsawantaj Jesussha unuiniamurjjaj araamunam wekasar, unuiniamurisha trikiu neren majurkutak wekainiarmiayi; tura tishisar neren yuawarmiayi.

² Nuna túruiniakui Pariséu tiarmiayi “Maaj, atumsha ayampratin tsawantaj takaschatniua nu, ¿urukantai takaarum?”

³ Takui Jesus ayak tímiayi “Yaunchu uunt akupin Tawitcha tura nemarniusha tsukamainiak túrawarmia nu ántichukaitrum.

⁴ Tawit Yusa Jeen wayá, Yus iniaktusma tantan yuámiayi; tura nemarniuncha ajamsamiayi. Tura nu tantanacha aya Israer-shuara Pátririj yúatin ármiai. Tuma ain Tawitcha yajauchin túrutsuk achikmiayi, tímiayi.

⁵ Wisha Aents Ajasuitkiun ayampratin tsawantan Nérenniurintjai” tímiayi Jesus.

Shuara uweje jakaan Jesus tsuármiania nu

(Mateu 12.9-14; Márkus 3.1-6)

⁶ Chíkich ayampratin tsawantaj Israer-shuar iruntai jeenam Jesus wayá ununiartasa nan kamamiayi. Nu shuar uweje untsuuria nu jakaa pujumiayi.

⁷ Tura Israer-shuara jintinniurisha, Pariséusha Jesusan “yajauch túrayi” titiai tusar wakeruniak,

“ju ayampratin tsawantai nu shuaran tsuartimpiash” tusar ii pujuarmiayi.

⁸Túrasha Jesuska ni enentáimmiarin nekariarmiayi. Túmayat uweje jakaan chicharuk “Juı ajapén wajasta” tímiayi. Tutai áishmanı ajapén wajasmiayi.

⁹Nuınkia iruniarmiania nuna Jesus tímiayi “Enentáimpratarum. Ayampratin tsawantai yajauch túratin, péıker túratniujai ¿tuá péıkerait? ¿Uwemtikratin, máatniujajısha tuá péıkerait?” tímiayi.

¹⁰Nuyá téntakarmia nuna iis áishmanıkan tímiayi “Uwejem takuitia.” Áishmanısha uwejen takuımtai nú chichamaik péıker ajasmiayi.

¹¹Tura chíkichkia ti kajerkarmiayi. Túrawar “Jesus warı itıurkamniakit” tusar aniniaisarmiayi.

*Tuse unuiniamun Jesus anaikiamiania nu
(Mateu 10.1-4; Márkus 3.13-19)*

¹²Nuyá Jesus Yúsan áıjsataj tusa náinnium wakamiayi. Tura nu kashi Yúsan au-aujkua tsawarmiayi.

¹³Tsawarmataı unuiniamurın ikiankar tuse anaikiamiayi. “Winia akatramurıitume” tímiayi.

¹⁴Ju ármiayi: Emka, Semuı chíkich naarı Pıtiur apujtusmia nu; tura nuyá ni yachi Antres, Jakupusha, Juanısha, Jiripisha, Parturumısha,

¹⁵Mateusha, Tumassha, Arpeu uchiri Jakupusha, Ásump Semuısha,

¹⁶Jakupu yachi Jıtassha, tura Jıtas Iskariúti Jesusan ukunam surukmia nu. Nu tuse achikma ármiayi.

*Untsurı shuaran Jesus yáııkiarmiania nu
(Mateu 4.23-25)*

17 Niijjai Jesus náinniumia pakanam taawarmiyai. Nuí pujusarmiyai. Nuisha untsurí unuiniamurisha, tura Jutía nunkanmaya, tura Jerusarénumia tura nayaantsanam ayamach Tiru, tura Setuñ péprunmaya ti untsurí aents antuktaitсар pujuarmiyai. Jesus tsuarati tusar káunkarmiyai.

18 Iwianchrukusha tsuámararmiyai.

19 Jesus tsuártinian tujinkiachu asamtai ashi shuar antintaj tusar wakeriarmiyai.

*Náinnium Jesus etserkamu
(Mateu 5.1-12)*

20 Ni unuiniamurin Jesus iis juna tímiyai: ““Yusan atsumajai” tárumna nu, Yus akupeamunam páchitkiaitrume; tuma asamtai warasminiaitrume.’

21 ‘Yamáí tsukamarmena nu ukunam ejemartatrume. Tuma asamtai warasminiaitrume. Yamái úutrumna nu, ukunmañka wishirtatrume. Tuma asamtai warasminiaitrume.’

22 ‘Atumin nakitramprarmatai, ajapramawarmataisha, tura Winia Aents Ajasu tutaiya nú shuar ajasuiti tusar tsanumprutmak katsekkramkarmataisha warasminiaitrume.’

23 ‘Túramtai nayaimpiniam ti shiir ana nu núkap sunastin átatui tu enentáimsarum ti warastarum. Warí, ju shuara uuntri yaunchu Yúsna etserniun nútiksaran yajauch awajsacharmakia.’

24 ‘Tura kuítrinniutiram atumsha atumí waratairi aya yamaik waintrume. Ukunmañka waraschattarme.’

25 ‘Atsumatsjai, tu enentáimprumna nu, ukunmañka atsumattarme. Nuñkia waraschattarme.

Yamáí wishíarmena nu, ukunman̄ka wáitiakrum úuttiatrume. Nuin̄kia waraschattarme.'

26 'Ashí aents atumin shiir awajtamkurmin aneartarum. Nujai waraschatniuitrume. Warí nuna uuntri ántar-yusnan etserin armia nuna nútiksaran̄ yaunchu shiir awajsarmiayi.'

*Ii nemasri aneatniun Jesus unuiniamiayi
(Mateu 5.38-48; 7.12)*

27 'Winia anturtarmena nuna juna tájarme: Ame nemasrum aneata, nakitramainia nusha shiir awajsata;

28 yajauch chichartamainia nusha shiir enentáimtusarta; katsekramainia nusha Yus áujtusarta.

29 Ame yapimin ijiutmamtai áatú yapiruisha ijiuti tusam iniaktusta; ame pushirmin jurutramkitiaj tuíniakuisha sákurmencha jukiti tusam iniaisata.

30 Seatmana nu susata, tura áminiun jurutramainiakuisha ataksha awanturkitia tiip.

31 Chíkich winia túrutati tusam wakeramna nútiksamek chikichcha túrata.'

32 'Iista, aya atumin anenmainia nuke aneakmesha, ¿nusha warí péñkera túrarum? Yajauch shuarsha nuna túrin ániawai.

33 Tura atumniasha péñker awajtamainia nuke péñker awajkurmasha ¿nusha warí péñkera túrarum? Yajauch shuarsha nuna túrin ániawai.

34 Awanturkimniaiti tu enentáimtarum nuke íkiakrumsha ¿nusha warí péñkera túrarum? Yajauch shuar nuamtak yajauch shuarjai awanturkimniaiti tu enentáimsar ikianainiawai.

35 Tura atumsha nemasrum aneatniuitrume, tura pé_ñker túratniuitrume, tura awanturkittiawai tu enentáimtsuk ikiastiniaitrome. Túrakrumniñkia Uunt Yus pé_ñker akirmaktatrume; tura ni uchiríntjai tu iniakmastatrume. Yuska, “yumiñsajme” ticha nunasha tura yajauch shuarnasha shiir awajeawai.

36 Ii Aparí waitnentrarniua nútiksarmek atumsha waitnentratarum.’

*Chikicha túramurí ti enentáimtusairap
(Mateu 7.1-5)*

37 ‘Chikicha túramurí ti enentáimtusairap. Núnisan Yuska atumí tunaarín iirtamsashtatui. Chikicha tunaarín “nuka asútñiatniuiti” tiirap. Núnisan Yus atumin sumamtikramashtatrume. Tsañkurnairatarum. Núnisan Yus tsañkurtamprattawai.

38 Chikichcha susata. Núnisan Yus atumin suramsattarme. Niisha pé_ñker nekapma, tura núkap ati tusa teeka awajas tura patas núkap enkea emetsaj amastatui. Atum chíkich túrarmena nútiksaj atumniasha túrutmattarme.”

39 Tura nuyasha juna métek-taku chichaman ujakarmiayi: “Jíi kusurusha ¿itiurak chíkich kusuruncha jukimniait. Mai metek wañanam iniaash-tatuak?”

40 Unuiniamua nu unuiniana nuna nankaamas áchatniuiti. Túrasha niisha ti unuimiatar unuiniana nujai métek nekaamniaiti.’

41 ‘¿Itiurtsuk atumi jíin numi enketna auk íitskesha atumí yachí jíin tsuat enketusha iiyarum?

42 Ame jíimíin numi tuke enketaisha ¿itiurtsuk ame yatsumi jíiyya tsuátan jurustajme tame?

¡Antraitrume! Emka ame jiimiin numi enketna nu jusata. Nuin_ukia paant wáinkiaattame yatsumi jiin tsuat enketna nu jurustin.'

Nerejai numi nekaatainti

(Mateu 7.17-20; 12.34-35)

⁴³ 'Pénker numi yajauchin nereatsui; tura ya-
jauch numi pé_nkeran nereatsui.

⁴⁴ Numisha ni neren nékanui. Tsachikniu-
miasha kushin_ukiap júukchamniaiti. Tura naran-
maya shuinia júukchamniaiti.

⁴⁵ Núnisan pé_nker shuar ni enentái pé_nker asam-
tai pé_nkeran chichaawai; tura yajauch shuar,
enentái yajauch asamtai yajauchin chichaawai.
Páantchakait. Enentáin pimiutkamu ana nuyan_u ni
wenejai chichaawai.'

Jimiará jea ukurtin

(Mateu 7.24-27)

⁴⁶ 'Wi tájana nu túrachiatrumsha ¿urukamtai Winia,
Uunta, túrutrum?

⁴⁷ Shuar winia chichamprun ántuinia nu jea
jeammajai métekete. Winia anturtuk umiana nu
jujai métekete:

⁴⁸ Shuar jean jeamuk emka init taur kayanam
ukurmai. Tura yumi ti yutuk, entsa nujan_ukrua
tukummaitiat pukukachmai kayanam ukuamu
asa.

⁴⁹ Antsu Winia anturtukiat umiatsna nuka jujai
métekete: Shuar jean jeamuk aya naikminiam
jeammai. Tura entsa nujan_ukrua tukumpram nu
jeaka pukukamai. Tura mash sáantramai." Tu
unuiniamiayi Jesus.

7

*Suntara yáintrin Jesus tsuármiania nu
(Mateu 8.5-13)*

¹ Jesus áentsun unuinasua amik Kapernáum péprunam wémiayi.

² Nuḷ Rúmanmaya suntara kapitiántri pujumiayi. Nu kapitiáni takarniuri, ti aneamuri, jakamnia jaamiayi.

³ Tura Jesusan pachis áujmatainian antuk, ame shuarum Jesusan itiantiti tura winia takarniun tsuárturti tusa Israer-shuara úuntrin akupkamiayi.

⁴ Niisha Jesusan weriar, umirtukat tusa ti seainiak tiarmiayi “Ju kapitián nekas yáintin péñkeraiti.

⁵ Niisha yajaya apachitiat in shiir enentáimturmaji. Tura iruntai jean jeamtinniasha ninḷki chicharkaiti, tura yayawai.”

⁶ Nuyá Jesus niijiai wémiayi. Tura ni jean jeas-tatuk jatemsantai kapitiáncha ni amikrin akatar ju titiarum tusa Jesusan akuptukarmiayi. Niisha Jesusan chicharuk juna tiarmiayi “Uuntá, ántram wayataj tu enentáimsaip. Ame ti nanḷkaamaku asam winia jearuḷ wayachminiatme.

⁷ Tuma asakmin imia wiki Amiin jeatniun arantukjame. Ayatik “péñker ajastí” tákumin winia takarniusha péñker ajatrustatui.

⁸ Wi nékajai. Winia úuntur winia akuptuiniawai. Tura wisha suntaran akupenajai. Nunasha wi “wetá” takui wéawai. Tura chikichnasha “winitiá” tutai winiawai. Tura winia takartinian “ju túratá” tutai umíawai.” Tu tímiayi.

9 Jesus nuna antuk ti enentáimias ni nemarainian tímiayi “Nekas tájarme Israer-shuar Yúsan tímiatrus enentáimtinian wáinchaitjai.”

10 Tura kapitiani akatramuri jeá waketkiar, takarniuri péñker ajasun wáinkiar miayi.

Wajé uchirín Jesus iniantkimiania nu

11 Nuyá ukunam chíkich pepru Naín tutainium ni unuiniamurijiai tura chíkich untsurí aentsjai Jesus wémiayi.

12 Tura péprunam nuntumas jakaan iwarsatai tusar juńian wáinkiamiayi. Jakáa nukurí wájeyayi, tura uchirí jakamia núchikiyayi. Tura ti untsurí nu peprunmaya nin nemarsarmiayi.

13 Jesus nu wajen wáiniak tura waitnentar “úutip” tímiayi.

14 Nuńkia Jesus jakaa eńkerman tarunt antinmiayi; nuna juńiasha wajasarmiayi. Nuńkia Jesus jakaan chicharuk “Umpa nantaktia, tájame” tímiayi.

15 Tutai niisha nantaki pujus chichaamiayi. Tura Jesus ni nukurín “Jujú uchiram” tímiayi.

16 Tura matsamiarmia nu, nuna wáinkiar ashamkarmiayi. Tura Yusa náarín shiir awajsarmiayi. Tura chichainiak, “Yúsnan etserniuchukait Niisha. Ataksha Yúsnan etserin uunt ana nu tarutramji” tiarmiayi. Tura “Israer-shuarti Niiniu ájinia nuna yáinmaktai tusa Yus tarutramji” tiarmiayi.

17 Tura ashí Jutía nunkanmayasha tura ni írutkamu nunka ármia nuyasha Jesus túramia nuna nekaawarmiayi.

Imiakratin Juan sepunam pujak ni amikrīn akatar Jesusan akuptukarmiania nu (Mateu 11.2-19)

18 Juan ni írutkamurī ujakam Jesus túramun nekaamiayi. Nekáa ni írutkamurīn jímiarān untsukmiayi.

19 Tura Jesusaī akupkarmiayi. “Atumsha Jesus aniastarum. ¿Amesha nekas Kristu Yus akupkamu tátinia núkaitiam. Kame chikichak nákastataj? titiarum. Nu nekáa ikiuutarum’ tímiayi.

20 Tutai niisha Jesusan werí jeariar tiarmiayi “Incha imiakratin Juan akatar akuptamkaji. ¿Amesha nekas tátinia núkaitiam. Chikichak nákastataj? Nu nekaatai tusar wakeraji” tiarmiayi.

21 Wats, nii jeawarmia nuī Jesus untsurī jaan tsuártasa pujurmiayi. Iwianchrukuncha iwianchrīn jīirki akupkatasa pujurmiayi. Tura kusuruncha íimtikmiayi.

22 Tuma asa Jesus akatramun juna tímiayi: “Waketkirum ashí átum antukurmena nusha, wáinkiarumna nusha ujaktarum. Kusurusha wáinmainiawai; shutuap ainia nu péñker wekainiawai; tunamarusha tsuámainiawai; empekusha ántuiniawai; jakaasha atak iwiaaku ajainiawai; tura kuítrinchānumsha uwempratin chicham ujakmaiti. Juan nu ujaktarum.

23 Yawetsuk Winia tuke shiir enentáimturna nú shuar shiir átatui” tímiayi Jesus.

24 Waketkiarmatai Jesus Juánkan pachis áujmatman antuk shuar matsarmia nuī juna tímiayi: “Shuar atsamunmasha ¿warí werimiarum. Pintiu nase umpúam atúu we juní we ajana nu iistai tusarmek wémarum? Juan núnischaiti.

25 Nuikia ¿warí werimiarum. Shuar péñker iwiarmampra ístai tusarmek wémarum? Warí, péñker iwiarmampraka uunt akupniu jeen pujuiniatsuk.

26 Nuinkia ¿warí werimiarum. Yúsnan etserniuk werimiarum? Maa, nú nankaamas wáinkiarne.

27 Yaunchu Yus-Chichamnum ju áarmaiti:
 “Winia akatramurun amjini emka akupeajai ame jintimin iwiarat tusan.”

Juan nu akatramuiti.

28 Nekasan tájarne, Yúsnan etserin imiakratin Juanjai nankaamas uunt atsuwiti. Túmaitiat Yus akupeamunam páchinia nu shuarka nekas imianchaitiat, Juanjai nankaamas átatui” tímiayi.

29 Penké shuarsha, kuítian-juusha, Juan imiaimujai imianiarmia nu, Jesus timian antukar Yusa náarín shiir awajsarmiayi.

30 Túrasha Pariséusha Israer-shuara jintinniurisha Yus yáintaj támaitiat Juan imiaamujai imiancha ásar nakitrarmiayi.

31 Nuinkia Uunt Jesus tímiayi “Yamaiya áentstiram, warijjain métek árum nuna paant títiatjarne.

32 Uchijjai métek árum. Ni aijjai iruntrar nakurustaj tukamá tuńiawai “Námpera áinis nakurustaitsar peem umpuarji, túrasha jantsemáchureme. Nuyá iwiarsatniua áinis nakurustaitsar íwiareakur kantamtai kantamáaji, túrasha átum úutcharme.” Tu tuńiawai.

33 Atumsha núnisaitrume. Kame Juan núkap yurumsuk úmutsuk wekaimiayi. Túmakui átumka “iwianchrukuiti” tímiarme.

34 Nuyá Wisha Aents Ajasan támajai. Tura yurumá úmakuisha “ti yurumin tura ti nampenaiti; kame

ashí yajauch shuaran tura kuítian-juu amikrinti” túrutru me.

³⁵ Wats, nekas neka ainia nu, Yusa nekatair̄in iniakmainiawai.” Tu tímiayi.

Pariséu Semun̄ náartin Jesusan ni jēen ipiaamia-nia nu

³⁶ “Winí yurumáitia” tusa Pariséu Jesusan ipiaamiayi. Tutai Jesus ni jēen werí misanam pujusmiayi.

³⁷ Nuinkia nu péprunmaya yajauch nuwa, Jesus Pariséu jēen yurumáttsa weyi táman antuk, kayá mutinium kunkuin asuiti áimkiamun takukí jearmiayi.

³⁸ Tura úutki Jesusa nawen pujuras nēajkīj̄iāi nīj̄armiayi. Tura intiash̄j̄iāi japirmiayi; nuyá nawenam mukuta kun̄kuinian ni nawen uka-tramiayi.

³⁹ Pariséu Jesusan ipiaamia nu, nuna wáiniak juna enentáimsamiayi: “Ju nekas Yúsnan etserniuitkiun̄ka, ju yajauch nuwa ántiana nuna nekaawainti. Warí, niisha netse nuwachukait” tu enentáimsamiayi.

⁴⁰ Nuinkia Jesus Pariséun chicharuk tímiayi “Semun̄ká, ámin titiaj tusan wakerajai.”

Tutai Pariséu chichaak “Turuttiá, Uuntá” tímiayi.

⁴¹ Tutai Jesus tímiayi “Kuítian ikiamniun jimiará áishman̄ tumashmakarmiayi. Chíkich kiniantus (500) tura chíkichka aya sen̄kuentak tumashmakarmiayi.

⁴² Akiktin tsawant jeamtai mái-metek takakcha áirmiayi. Tuma asamtai kuítian ikiamin ni tumashr̄in mái-metek asakátrarmiayi. Wats, turuttiá ¿tú áishman̄ka ikiamniun nekas aneamia?” tímiayi.

⁴³ Tutai Semun t́imiayi “Enta, núkap tumashrín tsankuramia nu.”

⁴⁴ Tutai Jesus t́imiayi “Nekas tame.” Nuínkia nu nuwan iis Semunkan t́imiayi “Ju nuwá wáintsumek. Ame jeemjin wayamtai winia nawer nihartin entsa suruschamame; antsu ju nuwaka nawerun neajkijiai niharturai, tura intiashijiai japirturai.

⁴⁵ Mukutam áujtuscamame; antsu ninkia nawerun tuke mukutui.

⁴⁶ Winia muukaruisha asuiti ikiurtuscamame; antsu ninkia naweruı kunkuin asuitin ukatrurai.

⁴⁷ Nu tuma asantai tájame, niisha Winia ti anentu asantai ni tunaariı untsurı ana nu tsankuramuiti. Tura tunaar ishichik awai tau tsankuramu ana nuka ishichik anekratniuiti.” Tu t́imiayi Jesus.

⁴⁸ Nuínkia nuwan t́imiayi “Ame tunaarum tsankuramuitme.”

⁴⁹ Tura chíkich ipiaamu Jesusjai misanam pujuarmiania nu “¿Jusha ya asan tunaancha tsankurea?” nuamtak tunainiarmiayi.

⁵⁰ Tura Jesus nuwan chicharuk ““Uwemtikiar-tiniaiti” tu enentáimturu asam uwempraitme. Shiir wetá” t́imiayi.

8

Nuwá Jesusan yáinkiarmania nu

¹ Nuyá untsurı péprunam Jesus wekaráktak Yus akupeana nuna shiir chichaman etserkini wekaimiayi. Tura ni unuiniamurı tuse ármia nu nemarsarmiayi.

² Yaunchu untsurı nuwá jaa armia nuna tura iwianchruku armia nunasha Jesus tsuáarmiayi.

Nu nuwasha Nin nemarsarmiyai. Nusha ju ármiyai: Maktaranmaya Marí, siati íwianch jírkimiuyania nusha

³ tura uunt akupin Erutisa takarniurí Chusa nuwé Juancha, tura Susancha; tura chíkich untsurí ni takakmarin súsar Jesusan yáinkiararmiyai.

Atsaamin atsaampramun Jesus unuiniamiania nu

(Mateu 13.1-9; Márkus 4.1-9)

⁴ Untsurí péprunmaya Jesusan iistai tusar jíinkiararmiyai. Tura untsurí káunkarmatai ju métek-taku chichaman Jesus unuiniamiyai:

⁵ “Atsaamin atsaamprataj tusa jíinkimiyai. Atsaamki wesa jinkiái jintiá iniaararmiyai. Túrunamtai weenak najakarmiyai. Nuyá chiniki tariar yuawarmiyai.

⁶ Chíkich jinkiái kaya írunmanum iniaararmiyai. Nu jinkiái tsapainiar, wárik nantu sukuam káararmiyai.

⁷ Chíkich jinkiái jan_kiniam iniaararmiyai. Tura jan_kisha jinkiáisha mái-metek tsapainiar, jan_ki kan_kar ajakramiyai.

⁸ Tura chíkich jinkiáisha pé_nker nu_nkanam iniaararmiyai. Tura tsapainiar, pé_nker nerekar chíkichkia sian_sha (100) nerekararmiyai.” Tuasua amik kakantar chichaak Jesus tímiyai “Kuishim ákuin_kia antuktatum.”

(Mateu 13.10-17; Márkus 4.10-12)

⁹ Nuyá ni unuiniamurí Jesusan aniak tiarmiyai “Ju métek-taku chicham tamena nu ¿warintkumea tame?”

¹⁰ Tutai Jesus tímiayi “Atumnia Yus ni akuptairin nekaachma ana nuna nekantikramprume. Tura chikichnaka, wáiniainiyat kusurua núnin ártí tusan, tura ántuiniayat nekaacharat tusan aya métektaku chichamjaj̄ jintintiatjaj̄,” tímiayi.

Atsaampramu chichaman Jesus paant jintintiamiania nu

(Mateu 13.18-23; Márkus 4.13-20)

¹¹ ‘Wats, ju nekaatarum, tímiayi. Jinkiáisha Yusa chichamen nakumui.

¹² Jintiá iniaaru tana nuka shuar aya ántana nuna nakumui. Yúsan nekas enentáimtus uwempracharti tusa íwianch wárik taa nu chichaman ni enentáiyān júawai.

¹³ Kayanam iniaaru tana nuka shuar antuk waras umiana nuna nakumui. Tura nú shuar kaṅkape atsá asantai, ishichik tsawantiniṅ umikiar itiurchatan wáinkiar wárik kanainiawai.

¹⁴ Jaṅkiniam iniaaru tana nuka tuke enentáijjaj̄ umíatsna nuna nakumui. Nu shuarsha ántuiniawai, túrasha ni wakeramurijjaj̄ wekainiawai. Ju nuṅkanman ana nuna ti páchiniakui, tura kuítian ti wakeruiniakui, warastinniak enentáimtuiniakui, Yus-Chicham ni enentáin takaatsui. Nujaj̄ kaṅkarma ásar nerektinian tujintiainiawai.

¹⁵ Tura jinkiái péṅker nuṅkanam iniaaru tana nuka shuar antuk umiinia nuna nakumui. Niisha antukarmia nuna péṅker enentáimtusar, yawetsuk umirkar ti péṅker nerenawai.’

Ashí iwiaiiniakma átatui
(Márkus 4.21-25)

16 ‘¿Shiripkin ekeemak nukuktinkiait? Peaknum waaptak ikiuschatniuiti. Antsu jeanam wáiniana nu paant wáinkiarat tusa yakí ekentsatniuiti.

17 Núnisañ ashí nekaachma ana nu paant átatui. Tura úukma ana nu nekanattawai. Tura iwiainiakma átatui.

18 Tuma asamtai anearum péñker antuktarum. Shuar takakna nu patatsamnia átatui. Túrasha takaktsuna nu, takakjai tu enentáimtumana nuka jurunkíttiawai.” Tu timiayi.

Jesusa nukurí, Jesusa yachi
(Mateu 12.46-50; Márkus 3.31-35)

19 Jesus pujamunam nukurí ni yachisha tariarmiayi.

20 Turamtai Jesusan tiarmiayi “Ame nukusha yatsumsha aa wajasar untsurmainiawai.”

21 Tutai Jesus tímiayi “Ee, nukuruiti, yatsuruiti, tura Yus tana nuna antuk umiana nusha winia nukuruiti, winia yatsuruiti.”

Nasesha entsasha Jesusan umirkarmiania nu
(Mateu 8.23-27; Márkus 4.35-41)

22 Chíkich tsawantai Jesus ni unuiniamurijjai kanunam enkemprar “Antumiañ amaini wetai” tímiayi.

23 Entsanam wesar Jesus kanarmiayi. Tura aya aneachma nase ti kakaram násentkui chíchimi tampá tukumar kanun inít awayastatuk awajmiayi.

24 Túram nuñkia Jesusan ishintiainiak “Uuntá, iisha entsá wayaaji” tiarmiayi. Nuñkia Jesus nantaki nasencha entsanacha chicharkamiayi.

Nú chichamaik nasesha menkakamiayi, tura entsasha miaaku ajasmiayi.

²⁵ Nuyá ni unuiniamurin chicharuk “¿Urukamtai Winia enentáimtursachuram?” tímiayi.

Tura niisha ashamainiak, ti enentáimprar “¿Ausha warí áishmankait? Nasesha entsasha Nii chicharkam umirainiatsuk” tiarmiayi.

Jatara nunkanam Jesus iwianchrुकun tsuármiania nu

(Mateu 8.28-34; Márkus 5.1-20)

²⁶ Kariréa nunka amaini Jatara nunkanam jeawarmiayi.

²⁷ Kanunmaya Jesus jiinkimtai nu péprunmaya áishman Nin taruntamiayi. Nu áishmansha yaunchu iwianchrुकuyayi. Misú wekas, jeá pujutsuk aents iwiansamunam pujuyayi.

²⁸⁻²⁹ Íwianchkia nu aishmankan ti kakaram nupet wémiayi. Tura emetatai tusar uwejencha nawencha jirujai jinkiá wearmiayi. Túrasha tujinkiarmiayi. Niisha jiruncha tsurí wémiayi. Tura íwianch aents atsamunam útsuk awemamiayi. Nu aishman Jesusan wainiak tikishmatar kakantar chicharuk “¿Urukamtai winiisha tarutnium, Uunt Nankaamaku Yusa Uchiri Jesusa? Winia wáitkiarsaip tusan seajme” tímiayi. Íwianch nin pujurun Jesus jiki akupeam tu tímiayi.

³⁰ Jesus nu áishmankan anias “¿yáitiam?” tímiayi.

Tútai nii chichaak “Wikia Untsurintjai” tímiayi. Untsurí íwianch nin pujurma asa nuna tímiayi.

³¹ “In uunt wáanam ii jiinkimiai nuiñ akup-tukam amutkaip” íwianch seawarmiayi Jesusan.

32 Nui ishichik arantach náinnium untsurí kuchi shushunmak yujaarmiayi. Tura íwianch chichainiak, “Antsu kuchiniam wayatin tsankatrukta” tiarmiayi.

Tutai Jesuska “Ayu, wetarum” tímiayi.

33 Nuna takui íwianch áishmannumia jíinkiar kuchiniam wayawarmiayi. Túram kuchisha nánatanam akaiki iniaawar entsanam utsanawarmiayi. Túrunawar jakekarmiayi.

34 Kuchin wáinniusha túrunan wáinkiar, ashamkar, péprunmasha tura arantcha etserkatai tusar tseke wearmiayi.

35 Etserkarmatai, iyutai tusar untsurí shuar wearmiayi. Tura Jesus pujamunam jeawar, íwianch jíintiukiarmia nú áishman kan pénger ajas pushí entsar Jesusa nawen pujan wáinkiararmiayi. Tura ashamkarmiayi.

36 Íwianchruku áishman tsuárman wáinkiarmania nu yama taan ujakarmiayi.

37 Tura ti ashamainiak Jatara nunkanmaya aents ashí Jesusan “Wetá” tiarmiayi. Tutai Jesus kanunam enkemar wémiayi.

38 Íwianch jíintiukiarmia nú áishman Jesusan, wisha ame wéamunam winitiaj tusa seamiayi. Tutai Jesus nuna suritiak,

39 “Antsu ame jeemjin weme Yus ámin túrutma nu ashí etserkata” tímiayi. Tutai áishman we Jesus nin túramia nuna ashí nu péprunam etserkamiayi.

*Jairu nawantrincha tura chikich nuwancha Jesus tsuármiania nu
(Mateu 9.18-26; Márkus 5.21-43)*

40 Tura Jesus katiṅki Kariréanam tatí tusa nákas pujuarmiayi. Tuma ásar Nii waketki katiṅki támatái nu aencha warasar áujsarmiayi.

41 Tumai Israer-shuara iruntai jeá uuntri Jairu naartin támiayi. Nii taa, Jesusa nawen tikishmatar “Winia jearuṅ waitneasam winítrítía” tímiayi.

42 Ni nawantri chikichik amia nu, tuse uwí takaku, jakatasa pujakui nuna tímiayi.

Jesus “ayu” tinia weakui ti untsurí aents nemariarmiayi. Tura untsurí shuar kaē ajas weena ásar chanuawarmiayi.

43 Nui nuwá páchitkia wémiayi. Niisha tuse uwí numpa ajapeak wáitias pujuyayi. Tsuákratniua nuísha ni kuítriṅ ashí ajapaitiat tsuámarchauyayi.

44 Jesusa úkuriini winiá weantuk ni pushirí náṅkatramurṅ antinmiayi. Nuna tura nú chichamaik numpé ájapeamuncha péṅker ajasmiai.

45 Nuiṅkia Jesus chichaak “¿Ya Winia antintkia?” tímiayi.

Tura “penkesha antinḅhajme” tuíniakui Pítur ni tsaniakmarijjai Jesusan chicharuk “Uuntá, ti untsurí antinmasha, tura ti untsurí chanunmaini-asha ¿itiura “ya Winia antintkia” tame?” tíarmiayi.

46 Tútaisha Jesus tímiayi “Nekas Winia antintki-ayi. Winia kakarmarjai tsuárajna nuna nékajai” tímiayi.

47 Nuyá nu nuwasha, nekarayapi tusa kuranki taa Jesusa nawen tikishmatramiai. Tura ashí aents ántuiniamunam urukaku antinḅkia tura itiura wárik péṅker ajasmia nuna ujakmiayi.

48 Nuĩnkia Jesus nuw̄an tímiayi “Nawantrú, shiir wetá. Winia nekas enentáimtursa asam péñker ajasume.”

49 Jesus tuke chichas pujaj̄i uunt Jairu jēa, ti untsurí antinmasha, tureniā taa, Jáirun tímiayi “Ame nawantrum jakayi. Unuikiartin tuke itit awajipia” tímiayi.

50 Tura Jesus nuna antuk tímiayi “Ashamkaip. Áyatik Winia nekas enentáimtusata. Túrakmin nawantrum péñker ajastatui” tímiayi.

51 Jeá jeawar Jesussha Niijjaj̄i untsurí wayatniun surinkiamiayi. Antsu aya Pítrun, Jakupun, Juán̄nasha tura nuw̄achi aparín nukuríncha wayatniun tsankatkamiayi.

52 Ashí úutainiak atakka wáinkiashtatjapi tu úutiarmiayi. Túmainiakui Jesus penké jakaan nékayat tímiayi “Úutirpa. Nuw̄achkia jákachai, antsu kanarai” tímiayi.

53 Jakaancha urukaku ta tusar wishikrarmiayi.

54 Nuyá Jesus nuw̄achi uwején achik, kákantar chicharuk “Nawantru nantaktia” tímiayi.

55 Túram niisha jakayat atak iwiaaku ajasmiayi. Tura nú chichamaik nantakmiayi; túrunamtai Jesus “ayuratarum” tímiayi.

56 Nuw̄achi aparí nukurísha ti enentáimprarmiayi. Tura Jesus “Ju túramu penké etserkairap” tímiayi.

9

Jesus ni unuiniamur̄in etserkati tusa akupkarmiania nu

(Mateu 10.5-15; Márkus 6.7-13)

1 Ni tuse unuiniamur_{in} ikiaan_{ak} ni chichamej_{ai} iwianchrukun enentáiy_{an} iwianchin j_{iir}ki akupkatniun tura sunkurj_{ai} jaa tsuártinniasha ni kakarmar_{in} súarmiayi.

2 “Yus akupin ajastin ujaktarum, tura jaa tsuártarum” tinia akupkarmiayi Jesus.

3 Nuyá tímiayi “Wéakrum áyatik wetarum. Ushukrustincha, uyuncha, yurumkasha, kuitcha penké jukiirap. Aya chikichík pushí jukitiarum.

4 Nánkamas jeanam jearum wayarmeka nuin pujustarum. Nuin pujusrumek chíkich péprunam wéakrum jíinkitiarum, tímiayi.

5 Tura atumin awaintiamatniun nakitiana nú péprunmaya jíinkirum nawemiya nunka akakekrum ikiuktiarum. Awaintiamachma paant ati tusarum nu túratarum” tímiayi.

6 Nuyá jíinkiar ashí péprunam uwempratin chichaman ujakiar wearmiayi; tura ashí péprunam jáiniancha tsuákiar wearmiayi.

*Erutis “Jesusan ístaj” tímiania nu
(Mateu 14.1-12; Márkus 6.14-29)*

7-8 Uunt akupin Erutis Jesus túramun antukmiayi. Nu túramun chíkich shuarka “Juan jakamunmaya nantaki túrawai” tu wearmiayi. Chíkichkia, “yaunchu Yúsnan etserin Erías wantiniak túrawai” tu wearmiayi. Chíkichkia, “chíkich yaunchu etserin nantaki túrawai” tiarmiayi. Tuma asamtai Erutis penké nekaachmiayi.

9 Tura tímiayi “Wiki, Juanka muuke tsupirkatarum, tíchamkaj. Tuma aisha, ¿ju shuar, ni túramur_i ashí shuar chichainia nusha yátsukait?” Tu enentáimiuk “iistaj” tímiayi.

*Senku mir áishmankan Jesus ayuramiania nu
(Mateu 14.13-21; Márkus 6.30-44; Juan 6.1-14)*

¹⁰ Atak Jesusa akatramurí waketki taar ni túramurín Jesusan ujakarmiayi. Nuñkia aents atsamunam Petsaitia péprunam tíjiuch weak nui júkiarmiayi.

¹¹ Tura penké shuar nuna nekaawar nemari-armiayi. Túram Jesus nin shiir áuj samiayi. Tura Yusa akuptairí pachis unuiniamiayi. Tura jaa armia nuna tsuárarmiayi.

¹² Tura kíakui, tuse unuiniamu Jesusan wérior tiarmiayi “Uuntá, shuar akupkachminiashit. Tíjiuch péprunmasha, shúarnumkesha wear ni yurumátniurín sumarmakarti, tura kanartintrín wáinkarti. Juí pujajnia juñkia penké atsawai” tiarmiayi.

¹³ Tutai Jesus tímiayi “Atumsha ayuratarum.”

Tutai chichainiak “Iisha aya senku tanta tura namaksha jímiarchik takakji. Ju shuar ayuratin sumaktai tusar wétiniaitji” tiarmiayi.

¹⁴ Áishmansha ti untsurí senku mir (5000) jeeá ámiayi. Tura Jesus ni unuiniamurín chicharainak ““senkuenta senkuenta kanaarum ankant ankant pujustarum,” titiarum” tímiayi.

¹⁵ Túrawarmatai ashí pujusarmiayi.

¹⁶ Nuyá senku tantan tura jimiará namaknasha Jesus achik, yakiini íimias Yúsan yuminsamiayi. Nuyá ajamsarat tusa ni unuiniamurín súsarmiayi.

¹⁷ Ashí yurumáwar ejemararmiayi. Tura ampirman tuse chañkinnium áimkiarmiayi.

*Jesus Yusa anaikiamurinti ujakma amia nu
(Mateu 16.13-19; Márkus 8.27-29)*

18 Jesus ni unuiniamurijjai áentsnumiã kanaki pujuarmiayi. Jesus Yúsan aujsua umik ni unuini-amurin tiarmiayi “¿Yáiti turutainia Winia?”

19 Niisha áimkiarmiayi, “Chíkich “Imiakratin Juánkaiti” turamainiawai; chikichcha “Iríasaiti” tura chíkichkia “yaunchu Yúsnan etserin nantakniua núiti” turamainiawai” tiarmiayi.

20 Tutai “Tura atumsha ¿yáiti túrutrum?” tiarmiayi.

Takui Pítieur chichaak “Ámeke Yusa Anaikiamuri, Kristu tutai, núitme” tímiayi.

21 Tutai Jesus “Peñké etserkairap” tímiayi.

*Ni jákatniurin Jesus ujakmiania nu
(Mateu 16.20-28; Márkus 8.30-9.1)*

22 Nuyá Jesus tímiayi “Wi Aents Ajasuitjiana ju ti waitsatniuitjai. Wíi shuara uuntri, tura ni Pátriri úuntrisha tura ni jintinniurisha nakitrurar maantuáwartatui. Túrasha iwiartusarmatai menaintiu tsawant jeamtaí nantaktiatjai.”

23 Nuyá ashí áentsun chicharuk juna tímiayi “Shuar Winia nekas nemartustajtsa wakerakka ni wakeramurinkia iniaisati. Tuke tsawant ni krusri yanaki nemartusti.

24 Kame shuar ju nunkanam aya péñker pujustaj tákuñka nu shuar uwemtsuk jakattawai. Antsu Winia anentu asa péñker pujustinniak enentáimtsuna nú shuarka nekas iwiaakman wáinkiatstawai.

25 Iimiata, shuar ashí ju nunkanam ana nuna súmerakui tura jinium wétin ákuisha ¿itiurak péñker pujusat?

26 Wi Aents Ajasuitjiana ju Winiasha tura winia chichampruncha shuar natsantraitkuinãkia,

winia wincharujai, winia Aparu wincharijiai tura nayaimpinmaya péñker suntara wincharijiai atak táakun shuar natsantrurmia nuna natsantrattajai Wi.

27 Tura shuar Yusa akuptairin wáintsuk jákachartatna nu juí pujuiniawai. Nuna nekas tájarme” tímiayi.

*Jesus nusháa iira ajasmiania nu
(Mateu 17.1-8; Márkus 9.2-8)*

28 Nuna tuasua amik nuyá chíkich semanatin Yúsan áujсатаj tusa Jesus náinnium wakamiayi. Pítiur, Jakupu, Juanjai nemariarmiayi.

29 Jesus auju pujus nusháa iira ajattsarmiayi. Ni pushirisha ti puju jíitsumir ajasmiayi.

30 Nuñkia jimiará áishman Niiijai chicháa wajarmiayi. Nuka Muisáis Eríasjai ármiayi.

31 Níincha wincha jíitsumir téntakarmiayi. Tura Jesus wáitias Jerusarénum jákatniurin amia nuna áujmatiarmiayi.

32 Pítiur ni tsaniakmarijiai kari ti pujainiajn iwiáa pujuarmiayi. Tuma ásar Jesusan tura jimiará áishmanjai jíitsumir ajas wajainian wáinkarmiayi.

33 Tura nu áishman Jesusan ikiuki weenaj Pítiur Jesusan chicharuk “Uuntá, iisha ti shiir pujat-sjik. Menaintiu áakmaktai, Áminiusha, Muisais-nasha, Eríasnasha áakmaktai” tímiayi. Tura Pítrusha enentáimtsuk nuna tímiayi.

34 Nuna chicháa pujai yuran kim tarí kaput amuawarmiayi. Tura yuran kim amuam ti ashankarmiayi.

³⁵ Nuin̄kia yuran̄minmaya ju chichaamun antukarmiayi: “Juka winia aneamu Uchiruiti. Nii anturkatarum.”

³⁶ Chichaamun antasua amikiar Jesus nin̄ki wajan wáinkarmiayi. Nuin̄kia takamtak pujuarmiayi. Tura wáinkarmia nuna pen̄ké etserkacharmiayi.

*Uchi iwianchrukun Jesus tsuármiania nu
(Mateu 17.14-21; Márkus 9.14-29)*

³⁷ Kashin tsawantai, náinniumiá táarmatai, ti untsurí shuar Jesus in̄kiuntai tusar wearmiayi.

³⁸ Nu shuarnumiá chikichik áishman̄ Jesusan untsuak tímiayi “Uuntá, waitneasam uchir írtústá. Uchirsha júchikiiti.

³⁹ Íwianch achik núpeteam niisha nán̄kamas untsumui. Tura chichichiptu ajas wenunmasha saun kaput apaawai. Íwianch nin tuke yajauch awajas an̄kant awajsatniun nakitiawai.

⁴⁰ Túmakui ame unuiniamurmin iwianchin júrtukit tusan seamjai. Túrasha tujinkiarmai” tímiayi.

⁴¹ Tutai Jesus tímiayi “Yus enentáimtichutirmin, tutupnik wekaichatirmin ¿urutmá tsawanttsuk atumjai pujustaj. Urutmá katsuntratjatsuk? Uchiram juí itiatá” tímiayi.

⁴² Tura uchi winiaj íwianch nun̄ká ajuant chichichiptu áepsamiayi. Tura Jesus iwianchin kakantar chicharkamiayi. Tura uchin pen̄ker awajas ni aparin awantuki susamiayi.

⁴³ Tura ashí pujuarmia nu ti enentáimprar “Yuska imiá úuntchakait” tiarmiayi.

*Jesus ni jákatniur̄in ataksha ujakmiania nu
(Mateu 17.22-23; Márkus 9.30-32)*

Jesus túramun ti enentáimtu pujuiniaj̄ Jesus ni unuiniamur̄in tímiayi

44 “Wi tájarmena ju pénker antuktarum. Winia Aents Ajasu tútain surutkartatui.”

45 Tura Nii timia nuna unuiniamur̄i nekaacharmiayi. Nekaawar̄aṅ tusa paantcha awajsamuyayi. Tura war̄iṅkit tusa anintrustinniaasha arantukarmiayi.

“¿Yaki imiá nan̄kaamantuit?”

(Mateu 18.1-5; Márkus 9.33-37)

46 Nuyá ni unuiniamur̄i, yaki imiá nan̄kaamaku ati tusa, nuamtak mai tunai ajarmiayi.

47 Tura ni enentáimsamur̄in Jesus nekaamiayi. Tuma asa uchin achik ni pujamunam itiamiayi.

48 Itiá tímiayi “Winia anentuk ju uchin shiir awajeana nuka Winiasha shiir awajtawai. Tura Winia shiir awajtana nuka Winia akuptana nunasha shiir awajeawai. Kame átum nan̄kaamantuchu tárugna nu ti nekas nan̄kaamantuiti’ tímiayi.

(Márkus 9.38-40)

49 Nuyá Juan̄ tímiayi “Uuntá, shuar ame náarmin pachis iwianchin j̄iki akupea nu wáinkiam̄ji. Tura in páchitkiachu asamtai nuka suritkiam̄ji.”

50 Tutai Jesus tímiayi “Antsu suritkiairap. Shuar in nakitramachkuṅka in páchitkiawai.”

Jesus Jakupun Juán̄nasha chicharkarmiania nu

51 Jesus, nayaimpiniam waketkitniur̄i jeatemamtai, enentáimmia ímiatrusaṅ Jerusaréṅnum we-wémiayi.

52 Wesa, kanartinian wáinkiarat tusa akatar émtikiarmiayi. Tura niisha Samaria péprunam jeawarmiayi.

53 Tura Samarianmaya aentska, Jerusarénum wéenan nekaawaru ásar itiaatniun nakitrarmiayi.

54 Jesusa unuiniamuri Jakupusha Juansha nuna nekaawar, Jesusan tiarmiayi “¿Uuntá, Eriás yaunchu túramia núnisrik iisha túrat tusam wakeramek. Nayaimpinmaya ji tara Samarianmaya aentsun amukarti, títiatjik?”

55 Tutai Jesus nin ísar kakantar chicharuk tímiayi “Atumsha atumi enentái urukukit nuka nekamatsrume.

56 Wi Aents Ajasu áentsun emesrattsan táchaitjai. Antsu uwemtikratajtsan táwitjai” tímiayi. Nuyá chíkich péprunam wearmiayi.

Jesus nemarsatin
(Mateu 8.19-22)

57 Jintiá weenai, chíkich áishman Jesusan chicharuk “Uuntá, tuí wétatam nuisha nemarsatjame” tímiayi.

58 Tutai Jesus tímiayi “Kujanchmasha ni wáarin takaktsuk. Chinkisha pasunken takaktsuk. Tura Wi Yusa Uchiríntiatan tepesan ayampratniur at-sawai.”

59 Chíkich áishmankan Jesus “Nemartusta” tímiayi.

Tutai nii chichaak “Antsu, Uuntá, winia apar jakamtai, iwiarsa ikiuakun nemarsatjame. Nu tsankátrúktá” tímiayi.

60 Tutai Jesus tímiayi “Jakaa ainia nu ni shuarin iwiarsatniunka enentáimtusarti. Tura ámeká weme Yus-shuar átin urukukit nu etserkata” tímiayi.

61 Nuyá chíkich tímiayi “Uuntá, nemarsataj tusan wakerajme. Túrasha wíi shuaran emka áujsan iki-uweartaj tsan_kátrúktá” tímiayi.

62 Tutai Jesus tímiayi “Shuar arayát ukunmaanĭ apajas iimna nu, Yus akupeana nuĭ takaschamni-aiti.”

10

Ni unuiniamurĭn setenta armia nuna Jesus et-serkatarum tusa akupkarmiania nu

1 Nuyá ukunam chíkich unuiniamurĭn setenta anaikiarmiayi Jesus. Tura jímiar jímiaran apatak émkitiarum tusa ashí péprunam ashí nun_kanam ni wétin amia nuĭ akupkamiayi.

2 Akupeak tímiayi “Nekas tájarne, Yus-Chicham étserkum, júuktinia núnisan, aents Yus-shuar awajsatin ti awai. Tura ¿yaki júukat, aya ishichik takainiasha? Tuma asamtai ni takarniurĭ akupkat tusarum Nerentĭn seatarum.

3 Wetarum. Átumka murikiua núninaitrume. Uunt yawá yujamua núninnium tsuumai ámunam akupeajrume.

4 Yurumkasha, kuitcha, sapatcha júkiirap; shuarjai jintiá áujmamsatai tusarum wajasairap.

5 Jeá wayakrum emka ju titiarum: “Ju jeanam pujuinia nuna Yus shiir awajsarti.”

6 Nérentin “Ee, nuna wakerajai” tákuĭkia túrunattawai. Tura “Atsá, wakeratsjai” tákuĭkia, “nuĭkia túrunashti” titiarum.

7 Jeá wayattarmena nú jeanman pujustarum. Tura ajampramsattarmena nu yuatarum. Warí, takaana nu akinkiashtinkiait. Chíkich jeanam nuĭ werum nuĭ werum ajairap.

⁸ Awaintiamawartatna nú peprunam jearmeka ajampramsartatna nu yuatarum.

⁹ Jaa ainia nu tsuártarum. Túrarum “Yus ju nuṅkanam akupin ajastin ishichik ajatemsai” nu peprunmaya shuar titiarum.

¹⁰ Íksarmek itiaarmachartatna nú peprunam jearum, jintiá wajasrum ju titiarum,

¹¹ “Yusna nakitra asakrumin, atumi pépruriniḡ nuṅka ii nawen peema japirar akakekji. Túrasha ju paant nekaatarum: Yus ju nuṅkanam akupkatin ishichik ajatemsai.”

¹² Yusa nekapsatin tsawantri jeamtai nu peprunmaya shuaran ti asutiáttawai. Yaunchu Sutumanmaya shuaran asutiámia nujai naṅkaamas asutiáttawai. Núnaka paant tájarme tímiayi.

(Mateu 11.20-24)

¹³ ‘Wáinkiatá, Kurasín péprunmayatiram. Wáinkiatá Petsaitia péprunmayatirmesha. Atumí pépruriin aents tujintiamun ti túraitjai. Warí, yaunchu Tiru péprunmasha, Setuṅ péprunmasha nu tujintiamu túramuitkuinḡkia yaunchu ni enentáin yapajiáwaraayi. Túrawar kúntuts pujutai pushin entsarar yuṅkunim ajakiaraayi.

¹⁴ Tura atumsha aents tujintiamu túramu wáinatrum yapajichu asakrumin Tirunmaya tura Setuṅnumiḡ aentsjai naṅkaamas asutniáttarme.

¹⁵ Tura atumsha Kapernáumnumiḡatirmesha, “ti naṅkaamantu ajarar nayaimpiniam jeattaji” tu enentáimtsurmek. Maaj, antsu jaka matsamtainium jeattarme, auka” tímiayi.

16 Tura Jesus ni unuiniamurin junasha tímiayi: “Atumin anturtamainiakka Winiasha anturtuiniawai; atumin nakitramainiakka Winiasha nakitruiniawai; tura nú arant, Winia nakitrakka Winia akuptukua nunasha nakitiawai.” Tú áujas Jesus nin akupkarmiayi.

Setenta unuiniamu waketki táarmiania nu

17 Ukunam nu setenta unuiniamu warasar waketki táarmiayi. Tura chichainiak “Uuntá, ame náarmiin íwianch jiki akupeam umirtamkamji” tiarmiayi.

18 Tutai Jesus tímiayi “Ee, Wisha nayaimpinmaya peem peetna núnisan, uunt iwianch Satanásan akaiki iniaan wáinkiamjai.

19 Atumniaka winia kakarmarun susamjarme, napi najarmasha titin najarmasha yajauch awaj-tamsairum tusan; tura ii nemasri kakarmari nu-petkatniuncha susamjarme.

20 Túrasha íwianch umirtamkui nu enentáimsam warasairap. Antsu atumi naari nayaimpiniam aarma aa asantai warastarum” tímiayi Jesus.

Jesus warasmiayi

(Mateu 11.25-27; 13.16-17)

21 Nuinkia ni enentáin Yusa Wakaní waramtiksam Jesus juna tímiayi: “Aparú, ashí nayaimpijiai nunka Úntrinme; tuma asam ju túrunamu ti unuimiaru enentáimtumainia nuyá úukuitme; antsu uchichia núnis nankaamantuchu enentáimtumainia nú shuar paant awajtusuitme. Ee, Aparú, núnik wakerichmakum. Tuma asantai shiir enentáimtajme, Aparú” tímiayi.

22 “Winia Apar ashí surusuiti. Wisha ni Uchirí asamtai Winia nékarui. Tura chíkich Winia nekas nekarainiatsui. Yus Apancha Wiki nékajai. Tura Wi wakeraj nú shuaran winia Aparun paant awajtajai. Nú shuarsha winia Aparun nékainiawai.” Tu tímiayi Jesus.

23-24 Nuyá ni unuiniamurin iis tímiayi “Wi tájarme, untsurí Yúsnan etserniusha tura uunt akupniusha átum yamáí wáintrum nuna wáinkiatniun wakeruiniayatan wáinkicharmiayi. Tura átum yamáí ántarme nuna antuktinian wakeruiniayatan antukcharmiayi. Tura Yus achirmaku asakrumin, wáintrumna nu ti péñkeraiti” tímiayi.

Samarianmaya áishman katsumkamun yainmia nuna Jesus unuiniamiania nu

25 Nuyá akupkamun jintinkiertin Jesus warintiak chichakat tusa wajatki werimiayi. Werí iniimiayi “Uuntá, wi tuke iwiaaku átaj takun ¿warinia túratniuitiaj?” tímiayi.

26 Tutai Jesus ayak “¿Yús-Papinium Muisáis áarmanum waritia áarmait. Waritia enentáimiam?” tímiayi.

27 Akupkamun jintinkiertin ayak tímiayi “Juna tawai: Ti enentáimsam, tuke enentáimjai Uunt Yus aneeta. Ame kakarmaram, iwiaakmarmesha Yus íiktusta. Tura ame ayashim aneamna núnismek ame írutramurmesha aneeta. Núchakait” tímiayi.

28 Tutai Jesus tímiayi “Pénker áimsame. Nu túrakmeka tuke iwiaaku átatme.”

29 Tutai akupkamun jintinkiertin ni anintramun kíishtumaktajtsa wakerak “Winia írutramursha ¿ya ainia?” tímiayi.

30 Takui Jesus tímiayi “Jerusarénnumiã jintia Jirikiú péprunam jeana nú jintianam áishman wean, kasa áishman tariar ni waririn, pushirincha kasarkarmiayi. Tura katsumkar mayái ashirak ajuantar ikiukiarmiayi.

31 Tura Israer-shuar Patri ukunman winis nu áishman kan wáiniak aya íkian iis ikiukmiayi.

32 Nuyá ukunam Patri yáintrisha nu jintianam wesa, nu áishman kan wáiniak, áyatik iis ikiuak wémiayi.

33 Tura nuyá Samaria nun kanmaya áishmansha nu jintianman wesa, nu áishman kan wáiniak ní shuárinchunak wáitnéntramiayi.

34 Nuyá nu áishman kan weantuk ni numpamnamurin asuitijiai tura wíniujai tsuar jaanchjiai penuarmiayi. Tura ni kawairiin ekenak jukimiayi. Tura írar kanutainiam jukí ejé nu áishman kan pénger wáinkiamiayi.

35 Tura kashin tsawarmatai Samarianmaya áishman weak jimiará kuítian jusa jeá nérenniurin susamiayi. Susa tímiayi “Ju áishman pénger wáitrukta. Tura wi amaajna ju táasmataisha wi wáketkun akiktajme” tímiayi.

36 Ayu, ámijiaisha, nu menaintiu áiniana nu, ¿tuá imiá nekas katsumkamun waitnentramia?” tímiayi Jesus.

37 Takui akupkamun jintinkiertin chichaak “Entá, katsumkamun wáitnentramia núa” tímiayi.

Tutai Jesus tímiayi “Amesha weme núnismek túrata.”

Marta ni kajijai Marí jeen Jesus pujusmiania nu

³⁸ Nuyá Jesus jintiá wesa chíkich péprunam jeamiayi. Nu péprunmayá nuwá naari Marta ni jeen itiaamiayi.

³⁹ Marta kaj ámiayi ni naari Marí. Marisha unuiniamun anturkataj tusa Jesusa nawen pujur-samiayi.

⁴⁰ Tura Mártaka ni takatrın ti enentáimtak Jesusan weantuk tímiayi “Uuntá Jesúsá, ¿winia kair takatan winiak íktursainia nuka enentáimtsumek? Winia yáintá turuttia” tímiayi.

⁴¹ Tutai Jesus tímiayi “Maaj Martá, untsurı́ túratin ana nu ti enentáimsam itit awajtamui.

⁴² Tura aya chikichik nekas túratniuiti. Marikia nekas péñker ana nuna achikiai. Nusha penké jurunkishtatui” tímiayi.

11

*Jesus Yus áujsatniun unuiniamiania nu
(Mateu 6.9-15; 7.7-11)*

¹ Chíkich tsawantaj Jesus Yúsan áujsatay tusa at-samunam pujumiayi. Áuj sua amikmatai ni unuini-amurı́ chikichik Nin tímiayi “Uuntá, imiakratin Juan ni unuiniamurın unuiniamia núnismek Yus áujsatın unuitiurta.”

² Tutai Jesus tímiayi “Yus áujkuram ju titiarum: Aparu Yus, nayaimpiniam pujamna nu, ii Aparınme. Ame náarmincha shuar ántar pachischarti. Ashı́ áentsnum ame akupkatin tsawantrum wari jeati. Ame wakeramuram nayaimpiniam umikma ana núnisan ju nunkanmasha uminkiatı́.

³ Aparú, ii yurumkarı́ ashı́ tsawant amasta.

4 Tura winia nemasrun tsan̄kurajna núnismek, Aparú, winia tunaaru tumashr̄isha tsan̄kurturta. Tunáa wakeruktin tsan̄katrukaip. Antsu ashí tu-naanumiá uwemtikrurta.”

5-6 Nuyá Jesus juna tímiayi. “Wats, ju titiái. Kashi ajapén amikrum werishtameash. Tura “Winia amikiur yajaya winia jearuí yama tayi. Tura ajam-satniun penké takaktsujai. Tuma asamtai amikru, menaintiu apatuk ajamprustá” tíchatameash.

7 Tura nii init pujusan̄ chichaak “Warí, wáitisha epenmiaiti, tura winia uchirsha wijiaí ashí te-peenawai. Itiur nantakniak amastaj. Itit awa-
jtipia” turamchanpiash.

8 Wats, paant tájarme, niisha amikrum asa, nan-taki ikiatmastinian nakitiayat, itit awajtin̄ tusa nantaki ashí wakeramna nuna suramsattawai.

9 Tuma asamtai tájarme: Yus seatarum; túrakrumin suramsattarme. Eakrumka wáinkiatarme. “Winiajai” tákurmin awaintiamattarme.

10 Seana núnaka suíniatsuk. Eana nuka wáintsuk. “Winiajai” tuinia núnaka awáiniatsuk.’

11 ‘Wats, átum uchirtintiram, ame uchiram ap-atkun seatmakui ¿kayaash súsaintiam? Namakan seatmakui ¿napíash súsaintiam?

12 Nujintian seatmakuisha ¿titiñkiash súsaintiam?

13 Warí, átum imiá yajauchitirmesha atumí uchirj̄ p̄nker ana nu tuke súchakaitrum. Atumí Aparī nayaimpiniam pujana nu, seakrumn̄inkia nú nan̄kaamas ni Wakan̄in suramsattawai.” Tu unuiniamiayi.

*Jesusan “iwianchi kakarmarijjai túrawai” tiarmi-
ayi*

(Mateu 12.22-30; Márkus 3.19-27)

¹⁴ Shuar iwianchruku asa chichachu ámiayi. Nuna enentáiyán nu iwianchin Jesus jiiiki akupkamiayi. Íwianch jiiinkimtai chichachu chichasmiayi. Túramtai shuar nuí pujuarmia nu ti enentáimprarmiayi.

¹⁵ Tura chíkich tiarmiayi “Juka iwianchi kapitiántri Satanásan, ni chíkich naari Pirsepún umirniuiti. Tuma asa nuna kakarmarijjai iwianchin jiiiki akupeawai.”

¹⁶ Tura chíkichkia, nekas Yúsnumiã taawashit tusar “Nayaimpinmaya kakaram ana nu iniakmasam aents tujintiamu túrata” Jesusan tiarmiayi.

¹⁷ Tura Jesus tu enentáimiainian neka asa tímiayi “Núu nunkanmayan shuar nuamtak kajernaiyakuiñkia nú nunka wárik meserchattawak; nuamtak shuarsha ni shuarijjai kajernaiyaksha amunaikchartatuak.

¹⁸ Wíniaka “Pirsepú iwianchi kakarmarijjai iwianchin jiiiki akupeawai” túruttsurmek. Tuma asamtai tájarne, uunt iwianch Satanás naartin, ni suntarijjai kajernaiyaksha ¿itiur tuke kakaram átink’?

¹⁹ Tura Wi Pirsepú kakarmarijjai iwianchin jiiiki akupeakuñkia, atumi shuarisha ¿yana kakarmarijjaiñ iwianchin jiiiki akupena? Niisha “iwianchi kakarmarijjai túrichuitji” tuiniaisha ¿itiura Winiasha, “iwianchi kakarmarijjai túraiti” turutmini-aitrum?

²⁰ Wikia Yusa kakarmarijjai iwianchin jiiikin akupeajai. Nu nekaarum Yús atumi enentáin

akupin ajasuana nu nékarme.’

²¹ ‘Kakaram áishman̄ ḱishtumaktajtsa iwiarnar wajas jeen wáinkui, ni warir̄i inít ana nusha tímiatrusan̄ áiniawai.

²² Antsu níij̄ai nan̄kaamas kakaram ana nu winiakka nupetkashtatuak. Tura ḱishtumaktinian iwiar takakman jurawai. Tura kasamkámun ni amikr̄in súawai. Kakaram áishman̄ iwianchin nakumeawai. Tura nuj̄ai nan̄kaamas kakaram áishman̄ Winia nakumprawai.

²³ Iista. Winia nemartatsna nu winia nemasruti. Núnisan̄ Winia yáintsuna nuka aya itiurchat nájateawai.’

Iwianch j̄iki akupkamuitiat wáketna nuna ujakmiania nu

(Mateu 12.43-45)

²⁴ Nuyá Jesus jun̄a tímiayi: ‘Shuara enentáiȳa íwianch j̄iinki ayamprataj tusa yumi pen̄ké yútatsna nūi wéawai. Tura ayampratniun wáincha asa ataksha waketkitniun enentáimui. “Wi j̄iinkimiaj nūin waketkitjai” tawai.

²⁵ Tura waketki pen̄ker iwiamun tura an̄kant aan wáiniui.

²⁶ Nuna wáiniak, ni ain siati iwianchin níij̄ai nan̄kaamas yajaunchin itiā en̄kemáwartatui. Túrnamtai nu shuar nuiki nuna nan̄kaamas ya-jauch ajastatui.” Tu tímiayi Jesus.

Nekas warastin

²⁷ Shuar iruniarmia nūi Jesus nuna chichaa pu-jai, nuw̄a untsumuk “Ame nukun Yus ti yáinkiai. Ni ampujén ame pujuschamkam. Ámin amuntstamachmakam” tímiayi.

28 Tutai Jesus tímiayi “Antsu ni chichamen an-tukar umirainia nuna, nukurjai nankaamas Yus ti yáinkiaru áiniawai, tajai” tímiayi.

(Mateu 12.38-42; Márkus 8.12)

29 Shuar untsurí Nijn káunkarmatai Jesus tímiayi “Yamaiya shuarka yajauch áiniawai. Yajauch ásar, chichartuiniak “Nekas Yúsnumiaitkiumka aents tujintiamua nu túram Yusa kakarmari iniakmasta” turutainiawai. Túrasha áyatik yaunchu Junas túrunamujai iniakmasmia nujain nekaatin áiniawai.

30 Kame Junas túrunamujai Níniwi péprunmaya shuaran yaunchu Yus ni kakarmarin iniakmasmia núnisan yamaisha Aents Ajasu tutainjiana nu Wi túrunamujai Yuska ni kakarmarin iniakturmas-tatrume.

31 Yaunchu Sarumún uunt akupin pujai Sepa núnkanmaya nuwa akupin Sarumunka chichamen nekaataj tusa ti jeashtanmaya támiayi. Tura yamaikia Sarumunjai nankaamas pujai átumka anturtatsrume. Tuma asamtai Wi tájarme, Yus ashí shuaran nekapsattana nu tsawant jeamtai nu nuwa, akupniun pénker anturka asamtai, Yus ímianum pénker átatui. Antsu atumsha Winia anturtukcha asakrumin Yus ímianum yajauch átatrume.

32 Tura Yúsnan etserin Junas Níniwi péprunmaya shuarum Yus Chichaman etserkamtai nu shuar ni tunaarin enentáimtusar enentáin yapajjáwarmiayi. Tura jui yamá Junasjai nankaamas etserin pujajai. ¡Tuma asamtai nekapsatin tsawant jeamtai Níniwinmaya shuar yamaiya shuar árumna nuna sumamtikramattarme!

Ayashi tsáapnintri
(Mateu 5.15; 6.22-23)

³³ ‘¿Shirikip ekeemakar úuktinkiait? Pitiaknumsha enkeashtiniaiti. Antsu shuar jeá wayana nu paant íimsat tusar yakí ekensatniuiti.

³⁴ Ame jímijai wáinkiam nujai wekasatin nekaattame. Tuma asamtai ame jímijai péñker ana nu wáinkiumka péñker wekasattame; antsu ame jímijai yajauch ana nu wáinkiumka, kiritniunam wekasatniua núnisan yajauchiniam wekasattame.

³⁵ Anearta. Enentáimin tsáapin ana nu kiritin ajaschati tusam anearam wekasata.

³⁶ Ame ayashmijn kirit ajatsuk aya tsáapniniaitkiuin^ñkia, shirikip paant awajea núnisan ashí paant wáinkiattame” tímiayi.

Pariséuncha, Israer-shuara jintinniurisha “ya-jauchiitruma” tímiayi Jesus

(Mateu 23.1-36; Márkus 12.38-40; Rúkas 20.45-47)

³⁷ Jesus chichasua amikmatai Pariséu shuar, winia jearuj yurumáitia tusa untsukmiayi. Tutai Jesus wayá misanam pujusmiayi.

³⁸ Tura Israer-shuar ikijmiartin ana nuna túrutsuk aya pujakui Pariséusha nuna wáiniak “maa ¿urukamtia tura?” tu enentáimsamiayi.

³⁹ Tura Uunt Jesus tímiayi “Pariséutirmeka atumí yurumtairi aya pátatek nijiaktin ti wakeriniaitruma. Atumsha nu yurumtaijjai méteketruma. Pátatek péñker túrarme. Tura atumí enentáinkia kasamkatniusha tura yajauchia nusha piakuiti.

40 ¡Enentáimcha! Warí, ashí pátatek wáiniaji nuna Yus najanachmakia; tura init paantcha ana nunasha Yúsak najanachmakia.

41-42 Aneartarum, Pariséutirmesha. Aya nuka méntasha, anissha tura aya apatkusha Yus súsatin ti enentáimprume. Nukasha tsuriasrum apatkusha tias ana nuyá chikichik achikrum, Yúsnaiti táturmek. Tura antsu nu túratin iniaitsuk péñker wekasatniusha, Yus anenmarmena nusha péñker enentáimsatniuitrume. Wats init, enentáimin ana nútiksarmek jusam susarta. Nuñkia ashí chamir átatui.’

43 ‘Tura aneartarum Pariséutirmesha. Yus áujtai jeanam penkeri pujutainium pujustin wakerarme. Tura jintiá aents ímiainiamunam ti shiir áujtusarat tusarum wakerarme.’

44 ‘Jintinniutirmesha, Pariséutirmesha máimetek aneartarum. ¡Antar shiir chichamtinia! Iwiarsamu paantcha núniniaitrume. Shuar nu nankaamaksha nájamiat nékatsui. Núnisan shuar atumi chichame antukar yajauchia nuna nekartamtsurme.”

45 Nuikia Israer-shuara jintinniuri chikichik Jesusan chicharuk tímiayi “Uuntá, nu tákum incha yajauch chichareame.”

46 Tutai Jesus tímiayi “Atumsha jintinniutiram aneartarum. Atumi akupkamurijjai káarak ti kijin entsakchamnia súarme. Tura átumka yáintaj tusarum atumí uwejejaisha penké ántiatsrume.’

47 ‘Aneartarum tájarne. Yaunchu atumí uuntri Yúsnan étserniun máawarmia nuna iwiarsamuri átum jeamniuitrume nu etserin ti péñker ásarmatai kajinmatkishtin.

48 Nu túrakrum atumí uuntri túrawarmia nu, “yajauchichuiti” tarume. Warí, niisha máawarmiayi, tura atumsha máawarai táyatrum niijiai méteketrume. Warí, Yúsnan etserniu iwiarsamurin jeamkuram atumek sumamarme.’

49 ‘Atumí túramurin nekáa Yus juna yaunchu tímiayi: “Winia etserturniun tura winia akatramurnasha niin akuptukartatjai. Túramtai chikichnaka máawartatui, tura chikichnaka pataatukartatui.”

50 Tuma asamtai ashí ni etserniurin maamu ainia nuna, yamaiya áentstirmin Yus sumamtikramattarme. Nunka najanamunmaya jukí

51 yamáí ímiajai maamu ainia nuna, kame Apir maamunmaya jukí yamáí Sakarías maamua tímiajai anintrustatui. Naman maar Yus sutai ámanum tura Yus-jea ámanum ajapén atenkamunam máawarmia nú Sakaríasan tajai. Nu tuma asamtai tájarme, ni etserniurí maantamnawarmia nuna yamáí matsatrumna nútirmin aninmasartatui.’

52 ‘Jintinniutiram aneartarum. Waiti asakatniua núnisrumek nekas nekaatin surimiarme. Atumkesha nékatsrume. Tura nekaataj tana nusha suritiarme” tímiayi.

53-54 Jesus nuna takui Pariséusha, jintinniusha ti kajerkarmiayi. Tura nii tana nujai “yajauch túrame” titiai tusar wakeruiniak untsurí anintriarmiayi.

12

1 Nu tumaj shuar ti untsurí káunkarmiayi. Ti kaunka ásar nawen mai-najatnai ajarmiayi. Tura Jesus ni unuiniamurin tútan juarkimiayi. “Pariséu

ántar chichamtin áiniawai. Nuka wakaprutaiya núnisaiti. Wakaprutaikia nijiamanch yumirniun yama enkeam páantchaiti. Tura ukunam nekaamniaiti.

² Núnisañ ashí paantcha ana nu iwiainiakma átatui. Uukma ana nusha nekaamu átatui.

³ Nu tuma asamtai, kiritniunam tímiarmena nusha tsawái tsáapin ajasmanum antunkattawai. Tura jea inít pujusrum ishishmasrum tímiarmena nusha áa ti paant etsernaktatui.'

Yusak ashamkatniuiti
(Mateu 10.28-31)

⁴ 'Amikrutiram, aya ayashmin main ainia nu ashamkairap, tájarme. Ayashmin maa nú arantka máashtatui.

⁵ Tura ya nekas ashamkatniuitrum, nuna paant jintintiattajrume. Ame ayashmí maa, nuyá ámin jinium akuptamkatniun tujintiatsna nu ashamkatarum. Ee, Yus ashamkatarum, tájarme.'

⁶ 'Jimiará chin̄ki ishitiúpchich ishichik kuitjai surukchatniukait. Túrasha Yussha nu chin̄kin pen̄ké kajinmatkishtatui.

⁷ Wats, ashamkairap. Untsurí chin̄kijjai nan̄kaamas Yuska atumin enentáimturmarne. Warí, ame intiashmin mash Yus nekapmaruiti.'

(Mateu 10.32-33; 12.32; 10.19-20)

⁸ 'Ashí shuar ashí íimiainiamunam Winia Aents Ajasu tutain, Winia natsantruiniatsna núnaka, Wisha Yusa suntarí íimiainiamunam natsantrashatjai;

⁹ antsu shuar íimiainiamunam Winia natsantrana núnaka Wisha Yusa suntarí íimiainiamunam natsantrattajai.'

10 ‘Winia, Aents Ajasu tutain, shuar yajauch chichartakuinkia nusha tsankuramniaiti, tura Yusa Wakaníncha yajauch chicharkuinkia nuka penké tsankurachminiaiti.’

11 ‘Wats, Israer-shuar iruntai jeanmasha, tura Israer-shuar kapitiánniumsha, uuntnumsha juramainiakui, aninmainiakuisa warintiajak tusam ti enentáimsáip.

12 Ame áimkiatin jeamtai, Yusa Wakaní ame títiatmena nuna jintinramattawai,” tu timiayi.

Kuítiak enentáimtuschatniuitji

13 Chíkich áishman Jesusan tímiayi “Uuntá, ii aparí ikiurtamkimiaj nuna yatsur winiasha nakak surustí, titia” tímiayi.

14 Tutai Jesus tímiayi “Áishmanka, atumin nu túratin anaikiamukaitiaj.”

15 Nuyá tímiayi “Pénker enentáimsatarum. Nii takakna nújain shuar iwiaaku, áchatniuiti. Tuma asamtai kuítrintin ajastin aya nuke enentáimsaip.”

16 Nuyá juna métek-taku chichaman unuiniak tímiayi:

“Kuítrintin áishman ni ajaríyan arakan ti nukap juukmai.

17 Tura “¿Ti nukap asamtai tuiñ ikiustaj. Itiurkatjak?” tu enentáimsamiai.

18 Wats, wi nékajai. Winia ikiutái-jearun ashiran nú nankaamas úuntan najanatjai. Tura nuñ ashí ikiustajai.

19 Nuñkia untsurí uwitin shiir pujustinian ikiusman takustatjai. Tuma asamtai, ayampran, yurumán, umaran shiir pujustatjai” timiai.’

20 “Tura Yus nin chicharuk timiai “Netse. Yamái kashi jakattame. Nuñkia imiá núkap ikiusumna nusha ¿yana átata?” timiai” tímiayi.

21 Nuyá Jesus tímiayi “Shuar nin̄ki kuítr̄in iki-auntumna nu, núnisaiti. Túrasha Yusj̄aj̄ íismaka kuítr̄inchaiti.”

*Yus ni uchirín péñker wáinkiaiti
(Mateu 6.25-34)*

22 Nuyá ni unuiniamur̄in Jesus juna tímiayi: “Warí yuarik pujustaj̄i tura war̄in̄ entsartaj̄i tusarum nuke ti enentáimsairap.

23 Yus iwiaaku átinian amasu asa yurumkancha amastatui. Tura ju ayashniasha najana asa entsa-taincha amastatui.

24 Ch̄ink̄isha enentáimsatarum. Niisha arak-mainiatsui. Juuk yurumkan ikiuiniatsui. Tuma aiñ Yuska ni yurumátniur̄in tuke súawai. Atumsha ch̄ink̄ia nú nan̄kaamaschakaitrum.

25 Tura ya shuarak, ti enentáimtana nuj̄aj̄i nú naya ajasminiait.

26 Kame yúpichuch ana nusha túrachminiaitrumsha, ¿urukamtai ch̄íkich ainia nusha ti enentáimtarum?”

27 Íistá, kukujsha takaachitiat tura nájanchitiat ti sh̄íirmach áiniawai. Yaunchu akupin Sarumún̄ ti shiir iwiarmamniuitiat kukujia tímianchayayi.

28 Iis, nupa yamáí tsakaawai tura kashin aents tsupikiar j̄inium apeánawai. Tuma aiñ Yus ti shiir awajeatsuk. Nuna tura asa atumniasha nú péñker wáitmakchattawak. ¿Urukamtai Yus nekas enentáimtatsrum?

29-30 Ju nun̄kanam ana nu ti pach̄iirap. Ch̄íkich shuar, Yús̄an nékainiatsna nu, war̄in̄ yuataj̄i, war̄in̄

umartaji nuna ti pachiiniawai. Tura atumsha tu enentáimsairap. Urukatajak, tiirap. Ame Apa nayaimpiniam pujana nu, ashí atsumarmena nuna nékawai.

³¹ Antsu emka Yusna nu enentáimtustarum. Túrakrumniñkia atsumamna nuna Yus suramsattawai.’

*Kuítian pachis Jesus unuiniamiania nu
(Mateu 6.19-21)*

³² ‘Winia murikrutiram ashamkairap. Untsuríchuitrume. Túrasha atumí Apari ni akuptairiin pachitmaktasa ti wakerutmarme.

³³⁻³⁴ Kuítrum tui aa, nuí tuke enentáimtittiarne. Tume aşamtai takakrumna nu surukrum atsumainia nu susatarum. Nuka enketai arut ajatsna nuí enkeatniua núniskete. Túrakrum nayaimpinmaya kuit amuatsna nu íkiaúwearne. Nuísha kasa nu kuitian kasamkataj tusa wayachminiati, tura kayaasha nu kuitian yúatniun tujintiawai.’

Anearar wekasatniuitji

³⁵⁻³⁶ ‘Ju enentáimsatarum. Ni uuntri nuatnaiki-atin námpernumia taa, “uraitia” takui, takarniuri jinia ekeemakar wárik urattiai tusar nakáa pujuiniawai. Atumsha núnisrumek Wi atumi Uuntri támatai, shiir itiaatai tusarum anearum wekasatarum.

³⁷ Ni uuntri taak iwiáa pujuinian wáinkiarai nuka shiir pujuiniawai. Nu úuntak iwiar, “mis-anam pujustarum” ni takarniurin títiatui tura yurumkan sústartatui.

38 Kashi ajapén taaksha tura tsawaana aī taaksha ni takarñurin iwiáa pujuinian wáinkiuñka, nu takarñ shiir pujuiniawai.

39 Tura jusha nekaatarum. Jeenniuwa nu, kasa tátinian nékaitkiunka, iwiáa pujusaayi. Kasa wayá kasamkatniun suritkiaayi.

40 Atumsha núnisrumek, anearum pujustarum. Wi Aents Ajasu tutai aya aneachmanum tátatjai” tímiayi.

Pénker takarin yajauch takarniujai
(Mateu 24.45-51)

41 Nuyá Pítiur aniasmiayi “¿Aya ínkik unuiniartaj tusam nu métek-taku chicham támek. Kame ashí nekaawarat tusamek tame?” tímiayi.

42 Tutai Jesus tímiayi “Atumsha pénker takatan wáinniuwa núnisketrume. Takatan wáinin ni uuntri takatrin takainia nuna, yurumátin jeamtai, ayurkamna núiti ni úuntrin shiir umirna nu, tura pénker enentáimtana nu.

43 Ni uuntri taa, takatrin tímiatrusan túran wáinkiuñkia nu wáinniusha shiir enentáimsamniaiti.

44 Umirin asamtai, ni uuntri ashí ni waririn wáitrukat tusa apujsattawai. Nuna paant tájarme.

45 Tura nu takatan wáinniusha “úuntur wau táchattawai” tu enentáimias, ni uuntri takarniurin yajauch awajeakuñkia tura niniki ti yurumá, ti umar nampeakuñkia,

46 nuñkia ni uuntri ni nákachmanum aya aneachma taa ti asutiáttawai. Umichu pujuinia nui akupkattawai.’

47 ‘Takarín ni uuntri wakera nuna nékayat, iwiartsuk umitsuk pujakka ti awatramu átatui.

48 Túrasha takarin nékachu asa, asutniámnia túrakka, ishichik awatnartatui. Núkap susamu ana núnaka núkap seawartatui. Núkap ataksamu ana núnaka núnisan̄ nan̄kaamas seawartatui.’

Jesusj̄ai shuar akannartatui
(Mateu 10.34-36)

49 ‘Jij̄iai nekapsatniua nútiksanak nun̄kanam jinia ikiapartaj tusan tamajai. Tura túrunat tusan ti wakerajai.

50 Imiantinia núnisan̄ itiurchat ukatrúktatui. Nusha wárik amuukat tusan ti wakerajai.

51 “Ashí shuar shiir pujusarat tusa táwiti” tu enentáimturumek. Núchaiti. Antsu shuar tesanairat tusan táwitjai.

52 Yamái jukimiutak chikichík shuarnum sen̄ku ainia nu akannakartatui; menaintiu shuar ni shuar̄in̄ jímiar̄an nakitrartatui. Jímiarsha ni shuar̄in̄ menaintiun nakitrartatui.

53 Apasha ni uchir̄in̄ nakitrattawai. Núnisan̄ uchisha ni apar̄in̄ nakitrattawai. Nukusha ni nawantr̄in̄ nakitrattawai, nawantr̄isha nukur̄in̄ nakitrattawai. Tsatsar̄isha ni najat̄in̄ nakitrattawai; najat̄isha tsatsar̄in̄ nakitrattawai.”

(Mateu 16.1-4; Márkus 8.11-13)

54 Jesus áentsun chicharuk junasha tímiayi “Atumsha nantu akaatainmaani k̄iarmatai “yutuktatui” tátsurmek. Nusha nekas tárume.

55 Tura anaaraniã nase násenkamtai “séejik átatui” tárume. Tura nekas tárume.

56 Yuran̄minmasha nun̄kanmasha túruna nu nékarme. Túmaitiatrumsha j̄u tsawantaj̄ túrunattana nusha çitiura nékatsrum? ¡Maaj, ántraitrume!”

Nemasrumjaisha nawamnaikiata
(Mateu 5.25-26)

⁵⁷ “Túrasha péñker ana nusha ¿urukantai atumek enentáimsarum wáintsuram?

⁵⁸ Irutramuram úuntnum júramkuñkia jintia wésamek “nuamtak iwiarartai” titiá. Túrachkumnñkia akupniunam juramkittiame. Tura niisha suntarnum akuptamkattame. Tura niisha sepunam enketmattawai.

⁵⁹ Tura nekas tajai, nui enkemamka ashí rearchisha akikmachkumka jíinkishtatme” tímiayi.

13

Ii enentái yapajiátniuitji

¹ Nu tsawantin chícham ujaktai tusar Jesusan tariarmiayi. Kariréa nunkanam Israer-shuar ni waakarín máawar Yus susatai tusar pujuiniai, Piratu nin maa, nuna numpen waaka numpejai pachimpramun ujakarmiayi.

² Tura Jesus tímiayi “¿Warí enentáimsarum? Kariréanmaya áishman tárumna nu, chíkich Kariréanmaya áishmanjai nankaamas yajauch ásar túrunawarai ¿tu enentáimprumek?

³ Atsá; atumí enentái yapajiáchkurmeka núnisrumek atumsha jakattarme. Nuna paant tájarme, tímiayi.

⁴ Tura tiasiúchu áishman yakí jea Seruí kupiniak iniaak nekenkarmiania nu, ¿warí enentáimtarum? Chíkich Jerusaréñnumia shuarjai nankaamas tunáa ásar túrunawarai ¿tu enentáimprumek?

⁵ Atsá, tájarme. Atumí enentái yapajiáchkurmeka núnisrumek atumsha jakattarme.”

Ikiu numi nereatsna nu

⁶ Junasha Jesus métek-taku chichaman tímiauyi.
Júiti:

Shuar ni ajarin íkiu numin araamun takakuyi. Nerekchiash tusa iyumai. Túrasha nere atsumai.

⁷ Nuinkia ni ajarin wáinniun timiai “Antukta, menaintiú uwitin juna nere átai tusan waketrú pujajai; túrasha penké wáinkiachjai. Ajakta. ¿Urukantai ánt rash wajaštata?”

⁸ Tutai ajá wáinin timiai “Atsá, uuntá; ju uwitin wajaští. Wajamurin takarsatjai tura pénger nunkan matsatkatjai.

⁹ Nujai nerekchampiash. Tura tuke nereachkuiñkia nuiñkia ajakta” timiai”, tímiaiyi.

Nuwan punuá kaarun Jesus tsuármiania nu

¹⁰ Ayampratin tsawantaj Israer-shuar iruntai jeanam Jesus unuiniak pujumiayi.

¹¹ Nuisha nuwa pujumiayi. Nu nuwasha tiasiúchu uwitin tuke jaa pujumiayi. Íwianch nin yajauch awajas apuna tuke ikiaramiayi. Túramu asa pañkái nakuenkataj tukamá penké tujinmiayi.

¹² Jesus nuna wáiniak, chicharuk “Nawantrú, ame jaamurmiya ankant ajasume” tímiaiyi.

¹³ Nuna tinia ni uwejejai antinmiayi. Tura nú chichamaik nuwasha pañkái nakuenkamiayi. Tura Yusa náarin uunt awajsamiayi.

¹⁴ Tura Jesus ayampratin tsawantaj tsuaru asamtai, iruntai jea uuntri kajek iruntrarmia nuna tímiaiyi “Sais tsawantin takaschatniukait; ayampratin tsawantaj tsuámartaj tusarum táchatniuitrume. Sais tsawant ana nui tátiniaitrume.”

15 Tura Jesus tímiayi, “¡Ántar chichamtinia! ¿atumí waakarisha atumí umpuururisha yumi aartai tusarum ayampratin tsawantin atiarum júatsrumek?

16 Tura ju nuwasha, atumí shuari Apraám shuarnumiá akiiniaiti. Nii tiasiúchu uwí Satanás yajauch awajsamujai jinkiamuyayi. Nincha ayampratin tsawant aiñ yajauch awajsamunmayá atíachminkiait” tímiayi.

17 Jesus nuna takui ni nemasrisha natsaararmiayi. Tura penké shuar ni péñker túramuriñ wáinkiar warasarmiayi.

Mustasa jinkiaí

(Mateu 13.31-32; Márkus 4.30-32)

18 Nuyá Jesus tímiayi “¿Yusa akupeamuri warijjain métek-takuit?

19 Mustasa jinkiaíjjai métek-takuiti. Mustasa jinkiaíncha shuar ni ajariín araamiayi. Tsapái, tsakaak, uunt numi ajasmiayi. Ti uunt asantai chiniki ni kanawen pasunmarmiayi.”

(Mateu 13.33)

20 Tura junasha tímiayi: “¿Yusa akupeamuri warijjain métek-takuit?

21 Tanta wakaprutaia métek-takuiti. Arinia núkap ana nuí nuwá wakaprutain ishichik enkeámiayi. Túram ashí wakapruamiayi.” Tu tímiayi.

Yupikiach waiti

(Mateu 7.13-14, 21-23)

22 Jesus Jerusarénum jeattsá weak untsurí peprunam wayá unuiniarkutak wémiayi.

23 Weai chíkich shuar aniasmiayi “Uuntá, ¿uwe-mainia nu ishichkikiai?”

24 Tutai Jesus tímiayi “Yupikiach wáitiniam wayataj tusam ti wakeritiarum. Kame untsurí wayataj tusar wakeriartatui, túrasha tujinkiartatui, tájarme.

25 Jeá nérenniurí wáitin epenmiatai, atumsha aa wajarum nu, wáitiniam wajasrum untsúakrum “Uuntá, uratritia” títiatrume. Túrasha “Nékatsjarme. ¿Tuyantskaitrum?” turamtatrume.

26 Nuyá átum títiatrume “Túrasha, uuntá, iisha ámijiai yurumámji, ámijiai umarmaji. Tura ii pépruríncha unuiniamame.”

27 Túrasha nii títiatui “Tuyantskaitrum, nékatsjarme, tátsujrumek. Yajauch túrintirmeka winiyaŋka kanaktiarum.” ’

28 ‘Nuyá Apraámsha, Isaksha, Jakupsha tura ashí Yúsnan etserin Yus akupeana nuí wayawaru wáinkiarum tura aa ajapam pujusrum ti útkuram naim tásarara ajattarme.

29 Tura Yus akupeana nuí, nantu tatainmaaniyasha nantu akaatainmaaniyasha, arakiasha, nuŋkaaniyasha taar, imia Israer-shuarchaitiat yurumátaí tusar pujusartatui. Tura atumsha, “Apraám shuáraitjai” táyatrume, wayashtatrume.

30 Nuísha yamáí ukunmaani ainia nusha emka ártatui; tura yamáí emka ainia nusha nuísha ukunmaani ártatui.”

*Jerusarénnumaani Jesus wémiayi
(Mateu 23.37-39)*

³¹ Nu tsawantaj̄ Pariséu aents Jesusan tariar tiarmiayi “Erutis mantamattsa wakerutmawai. Tuma asantaī j̄yaṅka wetá.”

³² Tutai Jesus tímiayi “Werum nu kujancham j̄u titiarum: “Ístá. Yamaisha ishichik tsawant iwianchin̄ j̄j̄ikin̄ akupkartajai; túran̄ jaancha tsuárartajai. Tura ukunam amuktatjai.”

³³ Tura Jerusaréṅnumaanī ishichik tsawant tuke wétiniaitjai. Yúsnan̄ etserin̄ aya Jerusaréṅnumaṅ̄ jákatniuiti.’

³⁴ ‘j̄Jerusaréṅnumiaṭiram, Yúsnan̄ etserin̄ máiniaitrume; tura Yus akatar̄ akupturmakmania nusha kayajaj̄i tukurum̄ máiniaitrume! Tumā aṅ̄ atash̄ nī shiampr̄in̄ etektanā núnisnak̄ Wisha weaktasan̄ wakerimjarme, túrasha nakitramarme.

³⁵ Iistarum. Atumniasha Yus ajapramaitrume. Tura “Yusa náariṅ̄ winiana nu, shiir̄ atí” títiatrumnā nú tsawant̄ jeatsaṅ̄ penké wáitkiashtatrume. Nuna tájarme” tímiayi Jesus.

14

Áishmaṅ̄ eaak-jaan̄ Jesus̄ tsuármiania nu

¹ Ayampratin̄ tsawantaj̄ Pariséu uuntrī j̄een̄ Jesus̄ yurumáttsa wémiayi. Tura ch̄íkich̄ Pariséu wariniak̄ túrat̄ tusar̄ iī pujuarmiayi.

² Nuṅ̄ áishmaṅ̄ eaak-jaā Jesus̄ pujamunam̄ nakā pujumiayi.

³ Jintinniunchā Pariséunchā Jesus̄ aniasmiayi “¿Warí tárum? ¿Ayampratin̄ tsawantaj̄ jaā tsuárminkiait. Tsuárchamniakait?” tímiayi.

⁴Tura niisha áimtsuk pujuarmiayi. Nuin̄kia jaan antin̄ tsuármiayi. Tura “shiiir wetá” tímiayi.

⁵Nuyá Pariséun chicharuk, “Atumí umpuunarisha, waakarisha waa táurmanum akaiki ini-antai, ayampratin tsawant ain̄ nu chichamaik júatsrumek” tímiayi.

⁶Takui áimkiatniun pen̄ké tujinkiarmiayi.

Nuátnaikiatin nampernum ipiaamu ármia nu

⁷Ipiaamusha pen̄kerī pujutainium pujustaitsar ti wakeruiniakui, Jesus nuna wáiniak juna jintin-tramiayi:

⁸ “Nuátnaikiatin nampernum pen̄kerī pujutainium pujusaip. Nūi pujakminkia, chíkich ámijjaī nan̄kaamas pen̄kérī táchatpiash.’

⁹ “Tura ipiatmania nu chichartamuk “Chíkich iiktusta” turamchatpiash. Nuin̄kia chíkich nan̄katkamu pujutainium wéakum natsartatme.

¹⁰ Antsu ipiatmakmin, nan̄katkamu pujutainium pujustá. Nuin̄kia ipiatmamnia nu chichartamuk “Amikru, ámeke juī pen̄kerī pujutainium pujustá” turamtatui. Nujaī chíkich ipiaamu ainia nu, “nekas pen̄kerinti” turamartatui.

¹¹ Iimiata, “pen̄kerintjai” tu enentáimtuma nuka péejchach awajnastatui. Tura ímianchach enentáimtúmana nuka waantu ajastiniaiti.”

¹² Nuyá Nin ipiaamua nuna chicharuk tímiayi “Amesha yurumáití tusam untsuktajtsam wak-erakmeke, ame amikrumsha, yatsumsha, ame shuarumsha, írutramuram kuítrintin ainia nusha ipiaawaip. Nii ipiaamka, ataksha íksan̄ ámin ipiat-mashtatuak. Nujaī akikma átatme.

¹³ Antsu yurumáití tusam untsuktajtsam waker-akmeká, kuítríncha, wekaicha, shutuapsha, kusu-rusha ipiaawarta.

¹⁴ Niisha akirmaktinian tujintiainiawai. Péñker shuar nantakiartatna nuĵ akinkiattame. Nu tuma asamtai warastatme” tímiayi.

Unt namperan Jesus nekapmá chichasmiania nu

¹⁵ Nu misanam pujuarmia nuya, chikichik Jesus chichaamun antuk, Jesusan tímiayi “Yus akupeamunam pachiiniak, yurumkuñka ti shiir ainti.”

¹⁶ Nuna takui Jesus juña jintintiamiayi: “Áishman namperan nájanuk, untsurĵ shuaran taartí tusa akatar akupkamai.

¹⁷ Yurumátin jeamtai “Winitiarum, yurumátin jeayi” tu tiarta tusa ni takarniurĵn akupkamai.

¹⁸ Tura winichminiatji tusar ashí ujakarmai. Chíkich timiai “Nunkan yamáí sumarmakjai. Iyutaj tusa wéakun winishtatjai. Tsanĵkurturti” timiai.

¹⁹ Tura chíkich chichaak “Wisha tias waakan sumarmakjai. Nekapsatsan wakerajai. Tuma asan winishtatjai. Tsanĵkurturti” timiai.

²⁰ Tura chíkich chichaak “Yamáí nuatnaikajai. Tuma asan winishtatjai” timiai.

²¹ Takarin waketki ni úuntrĵn ashí nuna ujakmai. Nuna antuk niisha kajekmiayi. Tura ni takarniurĵn timiai “Ju péprunam péñker jintianmasha tura uchich jintiachinmasha weme, kuítríncha tura wekaichasha, shutuapsha, kusu-rusha itiaarta.”

²² Nuyá ukunam ni takarniurĵ taa chicharuk “Uuntá, ame turutmiamna nútiksanak túramjai; túrasha tuke anĵkant awai” timiai.’

23 ‘Tutai ni uuntri chichaak “Jintianam weme, chíkich jintiachiniam weme, wáinmena nu ashí awayawarta. Winia jearui piakat tusan wakera-jai.

24 Emka ipiaawarmajnia nuka penké chikichkíksha winínia yurumáchartatui, tajarme’ tímiayi.”

Kristu nemarsatin yúpichuchichuiti

25 Untsurí aents Jesusjai irunki wearmiayi. Ni-isha nuna apajas iis juna tímiayi:

26 “Shuar ni aparíncha, ni nukuríncha, nuaríncha uchiríncha, yachíncha, umaincha Wijjai nankaamas enentáimtakka, tura shiir pujustinian wakerak Winí winitniun nakitiakka winia unuiniampur ajaschamniaiti.

27 Ni wakeramurin ajakeak ni krusri yanaki ne-martatsna nu winia unuiniampur ajaschamniaiti.’

28 ‘Jea yakí jeamtaj tusam wakerakmek, kuítian urutmak ajapawaintiaj tusam tura urutmajaink’ amukaintiaj tusam emka enentáimsashtatmek.

29 Túrutsuk aya ukura iniaisam amuktin tujinki-akminínia, nuna wáiniainia nu, wishikiainiak juna tiartatui:

30 “Iiskua. Nu shuar jeamtinian nankamamiayi. Túrasha amuktinian tujinkiamiayi.” ’

31 ‘Tura uunt kapitíán chíkich kapitíánjai mesetan najanatin áchatpiash. Emka, niisha pujus, tias mir (10.000) suntarjai painti mir (20.000) suntar winiana nuna nupetkaintjash tusa enentáimsashtatuak.

32 Tujintiakka, chíkich kapitián jeachat pujaanak, nawamnaikiatai tusa akatar akupkashtatuak.

33 Wats, “Kristu unuiniamurí ajastinjai, wi takakjana juna warí winia itiurtawa” tu enentáimsatniuitrume. Túrachkurmeka winia unuiniamur ajastin tujinkiarme.’

Wee michumarka yajauchiiti

(Mateu 5.13; Márkus 9.50)

34 ‘Weeka jeaku péñkeraiti. Tura michumarka ¿itiurak atak péñker atí?

35 Wee michumarka araaakmatniumasha yayaatsui. Tura tsuatnum ikiusmasha ántraiti. Aya ajapatniukete. Kuishim ákuinkia antuktarum” tímiayi.

15

*Jesus murik menkakamu chichaman unuini-
amiania nu*

(Mateu 18.10-14)

1 Akupniu kuítrín-juu tura yajauch shuarsha Jesusan anturkatai tusar tarú wearmiayi.

2 Tuma asamtai Pariséusha, Israer-shuara jintinniurísha Jesusan áujmatainiak “Jusha tunáa shuaran itiaawai tura niijjai yurumáiniawai” tiarmiayi.

3 Nuna tuiniakui Jesus ju métek-taku chichaman jintintiawarmiayi:

4 “Shuar sian (100) murikiun takuschampiash. Nu siánumia chikichik menkakamtai nuwintia nuíwinkia ni matsatmariin ikiuak, menkaka nuna ti eakchattawak. Wáintsuk iniaiashtatui.

⁵ Tura wáiniak yakainium awan_{ke} waras jeen wáketui.

⁶ Tura jeen jeá ni amikr_{in}, írutramur_{in}cha iki-aanak “Wij_{ia}i warastarum. Murikiur men_kkaka nuna wáinkiajai” tawai.

⁷ Wats, nuwintia nuiwi pé_nker shuar akui nayaimpiniam warastin awai. Tura antsu chikichik yajauch shuar ni enentá_{in} yapaj_iámtain_kia, nú nan_kamas warastin átatui, tájarme’ tímiayi.

Kuit emen_kkakman Jesus unuiniamiania nu

⁸ Nuyá chíkich enentáimsatai. Nuwá tias kuítian takakna nuna chikichik men_kkakamtai, wáinkiataj tusa jinia ekeemak, jeen japimiak émamkes eakchattawak.

⁹ Tura wáiniak ni amikr_{in}, írutramur_{in}cha iki-aanak, “Wij_{ia}i warastarum. Kuit men_kkakamia nuna wáinkiajai” tawai.

¹⁰ Núnisan_u yajauch shuar ni enentá_{in} yapaj_iámtai, Yusa suntari_u matsatmanum ti warastin awai” tímiayi.

Uchi ni apar_iin waketkitniun Jesus unuiniamiania nu

¹¹ Nuyá Jesus juna unuiniamiaiyi:

“Áishman_u jimiará uchin takakuyi.

¹² Tura pátatka uchi ni apar_iin timiai “Apawá, surustiniaitmena nu yamá surusta.”

“Tutai ni apar_i ni kuítr_{in} jímiapetek nakak mai uchin susamai.

¹³ Ishichik tsawant nan_kamasaj_i pátatka uchi ni warir_{in} irur jukí jeachat chíkich nún_kanam wémai. Nuisha ná_nkamas yajauchin túrak kuítr_{in} ashí ajapamai.

14 Ni kuitri ashí amuuka aḡ nu nuḡkanam ti tsuka ámai. Niisha núnisaḡ tsukariḡn wáitsamai.

15 Túmak takatan eḡktajtsa nu nuḡkanmaya apachiḡn werimiai. Nu áishmaḡsha kuchiriḡn wáitrukta tusa akupkamai.

16 Uchi ti tsukamak kuchi ukatramun niisha yuátajtsa ti wakerimiai. Túrasha penké súcharmai.

17 Tumáa pujus nuḡkia enentáimpramai. “Winia aparuí takau shuar péḡkeran ti yurumáiniawai. Tura wikia juḡ tsukaruḡ wáitiajai.

18 Wats, aparuí waketkitjai. Tura aparun chicharkun “Apawá Yúsjaisha ámijjaisha tunaan túrajai, titiajai.

19 Ame uchiram áchamniaitjai yamaikia. Ame takarniurmea áantsanak átaj tusan wakerajai” titi-ajai” tu enentáimsamai.

20 Tura wajaki ni aparḡn waketkimiai’ tímiayi.

“Tura ni aparísha jeachat winian wáiniak waitnentramai. Aparí tsékenki inḡkiun miniakak mukunámai.

21 Nuḡkia uchirísha timiai “Apawá, Yúsjaisha ámijjaisha tunáan túrajai. Ame uchiram áchamniaitjai.”

22 “Túrasha ni aparḡkia ni takarniuriḡn chicharuk “Ti penker pushí itiarum áentsratarum, timiai. Tura uwejnun aweetaisha aweemtikiatarum. Tura sapatcha aweemtikiatarum.

23 Túrarum waaka nueram ana nu maatarum. Námpar nájankur shiir enentáimsar yurumámi.

24 Warí, ju winia uchir jakaapitia tu enentáimsamjai. Túrasha iwiaakui. Menkakama nuna wáinkiajai.” Nuḡkia ti warasarmai’ tímiayi.

25 ‘Tumaj iwiáí úchikia takatnum pujumai. Tura wáketuk, jeá nuntumas jantsemáiniak túntuiyamun antukmai.

26 Nuĩnkia yaintri matsatun chikichkiniak untuk “¿Warimpait?” timiai.’

27 ‘Tura nii chichaak “Ame yátsum tayi. Túramtai ame apa waaka nueram maatai tawai, ame yatsum penker tau asamtai” timiai.’

28 ‘Tura iwiaí uchi kajek wayatniun nakitramai.’
‘Tuma asamtai ni aparí jiiintiuki “wayata” timiai.’

29 ‘Tura uchisha aparín chicharuk “Wisha ámin umirkun untsurí uwitin ame takatrumin túraitjai. Nu nékame. Túrasha winia amikrujai námper najanatin chiipiuksha penké surichuitme.

30 Tura ju ame uchiram nuwajai yajauchin túrak ame kuítrumin wasurkania nu támatai, waaka nueram máachumek” timiai.’

31 ‘Takui aparí chicharuk “Uchirú, ámeke wijjai tuke pujame. Tura wi takakjana nusha ashí áminuiti.

32 Tura ame yatsum jákai tu enentáimsamij nu iwiaakuiti. Menkaka nu yamaikia wáinkiaji. Tuma asamtai námper najanar waraschatniukaitiaj” timiai” tímiayi.

16

Takatan wáinin

1 Ju métek-taku chichamnasha Jesus ni unuiniamu⁷ ‘Tura nii chichaak “Ame yátsrin unuiniamiayi.

“Kuítrintin áishman̄ka takatr̄in wáinniur̄i ámai. Tura nérenniun ujainiak “Ame wáinniuram ame kuítumin nán̄kamas ajapeawai” tiarmai.’

2 ‘Nuna antuk ni wáinniur̄in untsuk “¿Warinia jūsha turamainia? timiai. Yamaikia winia wáinniur áchattame. Tuma asamtai winia kuítujai itiurkamea nu iniaktursata” timiai.’

3 ‘Tutai takatan wáinin enentáimsamai. “Maaj, wisha itiurkatjak, timiai. Nūnka táurtinniasha jeat-sjai. “Kuit surusta” títinniasha natsamajai.

4 Winia takatur atsakui yurumkan ajamprusarat tusan túratajna nuna nekajai” tu enentáimsamai.

5 Nuyá nérenniun tumashmaku armia nuna an̄kant an̄kant untsukarmai. Emka tamia nuna chicharuk “¿Winia úuntur urutma tumashmakuitiam?” timiai.’

6 ‘Niisha áimiuk “Asuitin siaṅ taru tumashiitjai” timiai.’

‘Tutai takata wáinin chicharuk “Pai. Papinium tumashrum ana nu juá: wárikmasmek pujusam, nu papí jaakam, chíkich papinium aya sen̄kuentachik aarta” timiai.’

7 ‘Nuyá chíkich tumashmaku támatai “¿Amesha urutmá tumashiitiam?” timiai.’

‘Tutai nii chichaak “Shana siaṅ taru tumashiitjai” timiai.’

‘Tutai “Pai. Papinium tumashrum ana nu júiti. Chíkich papinium aya uchentak aarta” timiai.’

8 ‘Nuyá takata wáinniu uuntri nuna nekáa “Nii yajauch túriniaitiat imiá enentáimniuiti” timiai’ tímiayi.

Nuyá Jesus tímiayi ‘Yus-shuarjaj̄i nan̄kaamas Yus-shuarcha aij̄ij̄aj̄i ni túratniuriniak takainiak imiá enentáimkia áiniawai.’

⁹ ‘J̄u nun̄kanam anan̄katin átsuk. Tura kuitsha aya j̄u nun̄kanmayan̄kete. Tuma asamtai atumsha kuitrumj̄aj̄i “shuaran yain̄taj̄” tu enentáimsatarum. Kuitj̄aj̄i yain̄tin amuukamtai atumsha amuicha j̄eanam ipiaamu átaj̄ tusarum túratarum.”

¹⁰ ‘Shuar ishichik takakna nuj̄aj̄i péñker túrakka, núkap takakna nuj̄aj̄isha péñker túrattawai. Tura ishichik takakna nuj̄aj̄i péñker túrachkun̄ka, núkap takakna nuj̄aj̄isha péñker túrashtatui.

¹¹ Tuma asamtai j̄u nun̄kanmaya anan̄kartin kuitj̄aj̄i péñker túrachkurmeka, tuke átin ana nuj̄aj̄i takastincha ¿itiur takastarumek?

¹² Takakme nuna Yus ikiatmasuiti. Nuj̄aj̄i péñker túrachkurminkia, atumnia átinia nuna ¿itiurak suramsat’?

¹³ ‘Takarniur̄i jimiará úntrintin ajastinian tuj̄intiawai. Warí, chikichnaka aneak chikichnaka nakitrashta túrattawai. Turya sen̄kuentachik aarta” timiaituak. Chikichan umiruk chikichnaka umirkashtatui. Yussha kuitcha mái-metek enentáimtuschnaiatrumek” tímiayi Jesus.

¹⁴ Pariséusha kuítian anen armia nu, ashí ni táman antukar Jesusan wishikrarmiayi.

¹⁵ Túmakui Jesus nin tímiayi “Atumsha aents íimmianum péñker awajmamprume. Túrasha atumí enentáincha Yus péñker nékawai. Kame winia “nan̄kaamantuiti” turutit tusa wakera nuna Yuska nakitiawai.’

Yaunchu etserkamu, yamá etserkamu

16 ‘Juan étserstain Muisáis aar akupkamaia nunasha tura Yúsnan etserin unuiniarmia nunasha antuktin ármiai. Tura yamaisha tímianiaj ti shiir chicham awai. Yus akupeana nuj urukukit nuka paant etserkamuiti. Tura ashí shuar nuj pachiinkiataj tusar ni kakarmarijjain ti takainiawai.’

17 ‘Túrasha yaunchu akupkamu ashí chicham uminkiatniuiti. Nu chicham uminkiashtinkia nayaimpisha nunkasha amukatnujaj nankaamas itiurchataiti.’ *

18 ‘Áishman nuarín ajapa chikichan nuátkunka tsanirmawai. Tura nuwá ajapamu niiniurtakka nusha núnisan tsanirmawai.’

Kuítrintin áishman Rásarujaj

19 ‘Áishman kuítrintin ámai. Niisha imiá shiir pushin ti kuit ainia nujaj iwiarmamniuyi. Tura tuke tsawant yurumak ti kuit amia nujaj namperan najanniuyi.

20 Tura kuítrincha ámai ni naarj Rásaru. Niisha kuchapruku tunamaruyi. Tuke tsawant kuítrinniu wáitiriin pujuyi.

21 Ti tsukamak kuítrinniu misariniá kakekan yuattsá wakerimiai. Tura yawasha ni kuchaprín nukatiarmai.

22 Kuítrincha jakamai. Jakamtaí jaka shiir pujutainium, Apraám pujumia nuj nayaimpinmayá suntar júkiarmai. Kuítrinniusha jakamai. Jakamtaí iwiarsarmai.

23 Jaka pujutainium wáitias pujus, pankái íimias, Rásarun Apraámjaj pujuinian wáinkiamai.

* 16:17 Mateu 19.1 ya senkuentachik aarta” timiai-12; Márkus 10.1-12

24 Wáiniak untsumuk “Apawá Apraamá wáitnentrurta, timiai. Rásaruka tsara uwejejai entsan uchupir winia iniairun imichturat akupturkata. Wisha jui jinium pujusan ti waitiajai” timiai.’

25 ‘Tutai Apraám timiai “Uchirú enentáimpratá. Ame nunká íwiaaku pujusam ti shiir pujumame. Antsu Rásaruka nuí ti yajauch pujumai. Tura ni-isha yamaikia jui áyamui tura ámeká wáitiame.

26 Tura nú arant nánata ti uunt awai. Tuma asamtai juyá ai wétinian wakeruiniayat tujinti-ainiawai. Tura aiyá jui tátinian wakeruinia nusha tujintiainiawai.”’

27 ‘Nuinkia kuítrintin timiai “Nuinkia apawá Apraamá, juna seajme. Winia aparú jēen Rasaru akupturkata.

28 Nuisha winia yatsur senku matsatainiawai. Niisha ju wáitsatniunam tácharat tusa ujákartí, tájame” timiai.’

29 ‘Tutai Apraám timiai “Muisáis áarman tura Yúsnan etserin áarman takakainiawai. Nuna umikiarti.”’

30 ‘Tutai kuítrintin áimkiamai “Túrasha apawa Apraamá, antsu jakamunmayá nantaki, shuar we ujakam enentáin yapajíáwarainti.”’

31 ‘Tura Apraám timiai “Muisáis áarman tura Yúsnan etserin áarman anturainiachkunka jaka nantaki we ujakmasha antukchartatui” timiai.” Tu áujmatsamiayi Jesus.

17

*Yajauch túrumtikiatin ti tsúumainti
(Mateu 18.6-7, 21-22; Márkus 9.42)*

¹ Jesus ni unuiniamurin juna tímiayi, “Aentsun yajauchin túrumtikiattana nu tuke átatui. Tura shuar ni ain tunaan wakerumtikna nu aneartí.

² Ju shuar uchich ainia nuna yajauchinium túrumtikna nuna Yus imiá asutiáttawai. Tuma asamtai nuna túratsain uunt kayajai kuntujnum jinkaí nayaantsanam ajunkam maak ainti.

³ Túrasha atumek ímiastarum. Ame yatsum ámin tunáa túrutmamtainkia chicharkata; tura niisha “tsankurturta” túramkuinkia tsankurata.

⁴ Chikichík tsawantiniñ siati túrutmamtai, tura “tsankurturta, atakka túrashtatjai,” siati túramkuinkia, tuke tsankurata.”

Yus nekas enentáimtakrikia tujinkiashtatji

⁵ Jesusa unuiniamuri Nin chicharuk “Yus enentáimtajnia nú nankaamas enentáimtustin yáinmaktá” tiarmiayi.

⁶ Tutai Jesus tímiayi “Mustasa jinkaí ti ishitiúpchich ana núnisañ ishichkisha Yus enentáimtaitkiurmeka, sikiumuru numi wajana nu, “Wajamurmijanka ukuuniakam nayaantsanam wajasta” tákurmin nú numi umirtamkainti.’

Yusa takatri takasar “ti penker túraitji” tíchatniuitji

⁷ ‘Atumí takarniuri arakmasua amik, waakancha iis támatai, ¿nú chichamaik amesha, “Winitia, yurumáití” tíntmek?

⁸ Atsá. Antsu, “yurumak iwiarturata. Wi yurumáin tura umartincha surusminiam iwiarnarta. Nuyá ame yurumátá.” Nu tíchaintmek.

⁹ Nii túratin ana nunak túratsuk. Tuma asamtai yuminsashtatme.

10 Atumsha núnisrumek Yus túramna nu ashí umikiam “ti penker túraitjai” tíchatniuitme. Antsu “aya ii túratniuri ana nuke tura asar iikia ántraitji” títiniaitme.” Tu tímiayi Jesus.

Tias áishman̄kan tunamarun Jesus tsuáarmiania nu

11 Jesus Jerusarénum wesa Kariréa nun̄ka ik-iuki Samaria nun̄kanam nan̄kaamakmiayi.

12 Tura péprunam jeamtai, tias áishman̄ ripra sun̄kurjai tunamaru armia nu, arant wajasarmi-ayi.

13 Tura untsumainiak “Uunt Jesusá, waitnen-trurta” tiarmiayi.

14 Jesus nin wáiniak, “Pátrī werirum iniaktumastarum” tímiayi.

Tura wésar pen̄ker ajasarmiayi.

15 Nuyá chichik ni tsuamarman nekáa kakan-tar chichiki Yusa náar̄in uunt awajki waketki Jesusan tarimiayi.

16 Yumiṣataj tusa Jesusan tikishmatar pini-akumar tepesmiayi. Nu áishman̄ka Samarian-mayaṁuyayi.

17 Nuna wáiniak Jesus tímiayi “Tsuámaru tiáschakait. ¿Chíkich nuiwisha tui pujuinia?”

18 ¿Ju yajaya áishman̄ nínkik Yusa naar̄i uunt awajsataj tusa waketki tai?”

19 Nuyá áishman̄kan tímiayi, “Winia nekas enentáimtura asam pen̄ker ajasume. Wajakim shiir weta” tímiayi Jesus.

*¿Yusa akupeamuri urutaik ati?
(Mateu 24.23-28, 36-41)*

²⁰ Pariséu aents Jesusan aníak “¿Yusa akupeamurì urutaik ati?” tiarmiayi.

Tutai Jesus tímiayi, “Yusa akupeamurì paant wáinkiachminiaiti. “Yamaí nan̄kamnayi” tichamni-aiti.

²¹ “Jui awai, nuisha awai” tíchamniaiti. Warí, Yusa akupeamurìnkia atumìjn pujawai” tímiayi.

²² Nuyá ni unuiniamurìjn chicharuk juna tímiayi: “Tsawant jeattawai atumsha Winia Aents Ajasu tutain “aya chikichík tsawantkesha Nii wáinkiar̄kia mak” turuttiatrume. Túrasha tujinkiatarme.

²³ Aents Ajasu tutai “jui pujawai, nuisha pujawai” tuñiakui weriirap. Tana nu nemariirap.

²⁴ Wi, Aents Ajasuitjiana nu tátinian tsawantur jeamtai paant wáitkiattarme. Peem péetuk ashí nayaimpin tsáapnin awajna núnisan̄ wi taamu paant átatui.

²⁵ Tura nu túruntsain̄ yamai pujuinia nu Winia nakitruiniakui ti wáitsatniuitjai.

²⁶ Winia atak tátiniur jeamtai, yaunchu Nuái pujumia nú tsawantin̄ túrunamia núnisan̄ túrunattawai.

²⁷ Yurumáwarmiayi, umararmiayi, nuatnaikiarmiayi, ni nawantrī nuatnakat tusa surukarmiayi. Tumáa pujuiniaì Nuái uunt kanunam en̄kempramtai, amarak nu aentsnasha mash amuukarmiayi.

²⁸ Tura Sutuma péprunmasha Rauta írutramurisha núnisan̄ Yusa asutiátniurì enentáimtutsuk pujuarmiayi. Yurumáwarmiayi, umararmiayi, sumakarmiayi, surukarmiayi, ajancha ajamarmiayi, jeancha jeammarmiayi.

²⁹ Tura Raut Sutuma péprunmayā jiinkimtai

asupri tutai kaya keek yútana áintsan̄ nayaimpin-mayā kakeetuk nu áentsun mash máawarmiayi.

³⁰ Núnisan̄ winia atak tátiniur jeamtai enentáimtsuk pujusartatui.'

³¹ 'Nu tsawant jeamtai jeā yakiinī pujana nú shuar ni waririn̄ achiktaj tusa akaikishti. Jeá wayashti. Tura kampunniunam wekaana nú shuar ni jeen waketkishti.

³² Rauta nuarí túrunamu enentáimpratarum.

³³ Aya jū nun̄kanmayān̄ enentáimias "iwiaaku átaj" tana nu ni iwiaakmarin̄ emen̄káktatui. Tura jū nun̄kanam ni iwiaakmarin̄ emen̄kana nu nekas iwiaakma ana nuna wáinkiáttawai.

³⁴ Paant tájarne. Nú káshitin̄ jimiarā áishman̄ nuu peaknuman̄ kanúu tepeartatui. Chikichik junaktiatui, chíkichkia ikiunkittiawai.

³⁵ Jimiarā nuwā mái-metek nekée pujuartatui. Chikichik junaktiatui, chíkichkia ikiunkittiawai.

³⁶ Jimiarā áishman̄ kampuniunam wekainiartatui. Chikichik junaktiatui, chíkichkia ikiunkittiawai." Tu tímiayi.

³⁷ Nuna antukar "Uunta ¿tūi túrunatta?" tiarmiayi.

Tutai ni chichaak "Jaka tepana nūi chuan̄ káutkartatui."

18

Shuar yawętsuk Yúsan tuke áujsatniuiti

¹ Shuar yawętsuk Yúsan tuke áujsatniua nuna unuiniartaj tusa Jesus jū métek-taku chichaman tímiayi:

2 “Chíkich péprunam shuaran akupin amai. Nú áishman̄ Yúsasha ashamchauyi; shuárnasha péñker enentáimtichuyi.

3 Tura nú péprunam waje amai. Niisha shuáran akupniun chicharuk “Áishman̄ winia yajauch awajtusmania nu írtusta” tusa tuke waketrú pujuyi.

4 Yámankamtaikkia nin anturkatniun nakitmiyai. Tura ukunam enentáimias “Wísha Yúsan ashamachiatnak shuárnasha péñker enentáimtichuiatnak ju waje tana nuna túrattajai.

5 Warí niisha tuke taa itit awajtatsuk. Tuma asamtai nin kajerkaj̄ tusan wárik túrattajai” timiai” tímiayi.

6 Nuyá uunt Jesus tímiayi “Shuaran akupin yajauhiitiat nuna timiai.

7 Tura Yus ti péñker asa, ni achikmarin tsawaiasha, káshisha untsuamka nú nankaamas anturkashtatuak. ¿Yaj̄itsuk menkakatuak?

8 Atsá, wárik yáinkiertatui, tájarme. Tura Wi Aents Ajasuitjiana ju atak támatai, ¿shuaran tuke Winia nekas enentáimturainia nuna wáinkiatjash?” tímiayi Jesus.

Pariséusha, kuítian-juuncha Yúsan áuj̄sarmia nu

9 “Péñkeraitjai” tu enentáimtumainiak chikichnaka yajauch enentáimtiarmia nuna Jesus nekapmá chichasmiayi. Juna tímiayi:

10 “Jimiará áishman̄ Yusa Uunt J̄een Yus áuj̄satai tusar wearmai. Chíkichkia Pariséuuyi, chíkichkia kuítian-juuyi.

11 Pariséusha wajaki Yúsan áuj̄juk jún̄is tímiayi: “Yusrú, chíkich áishman̄ kasa, yajauch, tsanirmau

ainia nujai métekcha asan yumı̄nsajme. Tura ju kuítian-juu wajana jújajsha métekchaitjai.

12 Warí, Ame akupkamna nuna iniañkasan wisha chikichík semanatinı̄n jimiará tsawant ijiarman áujeajai; tura wi achiajna nuna tiásnumiã chikichkiniak Yúsnaiti tusan akankan súajai.” Tu tímiái.’

13 ‘Tura kuítian-juusha arant wajas, nayaimpinmaani pankái ímsatniunkesha natsaamak, tsuntsuma, ni netsepen awatí “Yusá, ti tunaitjai. Waitnétrurtá” timiai.’

14 ‘Wats tájarme, nu kuítian-juu shuar Yus íimmianum ni enentái pénker awajnas ni jeen waketkimiai. Tura Pariséuka tamia núnisan waketkimiai. Nekaatarum. Shuar nankaamantu enentáimtumana nuka péejchach awajnastatui. Tura antsu péejchach enentáimtumana nu, nankaamantu awajnastatui” tímiayi Jesus.

*Uchisha Jesusna áminiaiti
(Mateu 19.13-15; Márkus 10.13-16)*

15 Jesus antiñkiarat tusar uchin itiararmiayi. Tura Jesusa unuiniamurı̄sha nuna wáinkiar suritkiarmiayi.

16 Tura Jesus nin untsukar tímiayi “Uchi Winí winitin tsañkamkatarum, surimki-airap. Enentáimsatarum. Uchichia áintsan enentáimtumana nú shuárak Yus ni enentáin akupin ajasminiaiti.

17 Uchi ni úuntrin umira núnisan shuar Yúsan umíachkunka Yus ni enentáin akupin ajaschamniaiti.” Tu tímiayi Jesus.

*Kuítrintin áishman Jesusjai áujmatsamiania nu
(Mateu 19.16-30; Márkus 10.17-31)*

18 Shuara uuntri Jesusan tarí áujсамиayi. “Uuntá, amesha péñkeraitme. Tuma asam, turuttia, ¿warinia túrakna tuke iwiaaku átataj?” tímiayi.

19 Tutai Jesus, “¿Urukamtia Winia, péñkeraitme, túrutam? Aents péñkerka atsawai. Aya Yusak péñkeraiti.

20 Tura Yus akupkamu ana nu péñker nékame. Tsanirmawairap, mankartuawairap, kasamkairap, tsanumprurairap, ame apasha, nukusha shiir enentáimtustarum. Nusha nékame” tímiayi.

21 Tutai áishman tímiayi “Uuntá, úchichik mash umiki tsakaruitjai.”

22 Jesus nuna antuk “Chikichik taatramsai, tímiayi. Ame takakmena nu ashí surukam kuítrincha ainia nu susarta. Nuñkia nayaimpiniam kuítrum átatui. Túram nemartustaj tusam winitia.”

23 Tura nuna antuk, nu áishman ti kuítrintin asa ti kuntuts enentáimpramiayi.

24 Tura kúntuts enentáimprantai Jesus nuna nekáa “Kuítrintin ainia nu Yus akupeamunam pachiinkiatin ti iturchataiti, tímiayi.

25 Kamiriuka, uunt ana nu, auja jijn wayatin itiurchataiti. Tura shuar kuítrin ti enentáimtana nu Yus akupeamunam pachiinkiatin nú nankaamas itiurchataiti.” Tu tímiayi.

26 Tura nuna antukarmia nu tiarmiayi “¿Nuñkia yaki uwempramniait?”

27 Tutai Jesus tímiayi “Aents tujintiainia nuna Yuska páchitsuk túramniaiti.”

28 Nuyá Pítur Nin chicharuk tímiayi “Uuntá, iikia Ámin nemarsataj tusar ii takakmaaka ikiukji.”

29-30 Tutai Jesus tímiayi “Shuar Yus akupeana nuna túrataj tusa ni jeen ikiuakka tura núnisan ni aparíncha, nukuríncha, yachínkisha, nuwenkesha, uchirínkisha ikiuakka ju nunkanmasha núkap wáinkiatstawai nu shuar. Tura tuke iwiaaku pujustinniasha wáinkiatstawai.”

*Ataksha ni jákatniurin Jesus ujakmiania nu
(Mateu 20.17-19; Márkus 10.32-34)*

31 Jesus ni tuse unuiniaturin akanki ikiaanak juna tímiayi:

“Jerusarénum jeatemaji. Juisha Jerusarénum Winia, Aents Ajasu tutain, túrunatniurun Yúsnan etserin yaunchu áatrurarmia nu uminkiatstawai.

32 Apachnium surutkartatui. Túrawar wishikrurar, katsekrukar usukruawartatui.

33 Awatiar mantuáwartatui. Túramaitiatnak menaintiú tsawantaj nantaktiatjai” tímiayi.

34 Tura Nii tímiania nuna nekas túrunattawai, tícharmiayi. Wariniak ta tusar nekaacharmiayi.

*Jirikiúnmayá áishmankan Jesus ímtikmiania nu
(Mateu 20.29-34; Márkus 10.46-52)*

35 Jesus Jirikiú péprunam nuntumsaj, nuj áishman jii kusuru, kuítian surusarat tusa jintiá pujumiayi.

36 Untsurí aents nankaamainian antuk “¿warinkit?” tímiayi.

37 Tutai, “Nasarénumiá Jesus nankaamawai” tiarmiayi.

38 Kusurusha nuna antuk untsumuk “Jesusá, Uunt Kapitián Tawit weeachukaitiam. Tátiniuya núchakaitiam. Winiaja waitnentrurta” tímiayi.

39 Eemak wearmiania nu chicharainiak “takamatsata” tiarmiayi.

Tutaisha nú arant untsumuk “Tawit weeachukaitiam; winiaja waitnentrurta” tímiayi.

40 Nuin_̄kia Jesus wajas “itiatarum” tímiayi. Tura nii támatai,

41 “¿Warí itiurtukat tusamea wakerutam?” tímiayi.

Tutai kusuru áimiuk “Uuntá, ímtiasan wakerajai” tímiayi.

42 Tutai Jesus chichaak “ímtia. Winia nekas enentáimtura asam pé_̄nker ajasume” tímiayi.

43 Nu chichamaik kusuru ímmiayi. Tura Yusa naari uunt awajki Jesusan nemarmiayi. Tura ashí aents nuna wáinkiar_̄mia nusha Yusa náar_̄in uunt awajsarmiayi.

19

Sakíu Jesusjai

1 Nuyá Jirikiú péprunam wayá nu_̄j wekaikini ajamiayi.

2 Nu_̄j kuítrintin áishman ni naari Sakíu pujumiayi. Nu Sakíu kuítian-juu úntriyayi.

3 Aents ti káunkámtai, Sakíu ti sútarach asa, Jesusan ístaj tukamá tujinkiamiayi.

4 Tuma asa Jesus nuke nan_̄kaamaktin asam-tai, eemki tsékin_̄ki sikiumuru numi wajamunam wakamiayi iistaj tusa.

5 Jesus nu_̄j nan_̄kaamak pan_̄káj ímias chicharuk “Sakíu wárik akáikitiá. Ame jeem_̄in yamá kanar-tiniaitjai” tímiayi.

6 Tutai Sakíusha wárik akaiki, shiir enentáimias Jesusan itiaamiayi.

7 Ashí aents nuna wáinkiar “Maaj, Jesus tunáa áishmaṅka jeen pujawai” tusa mai tunaim ajarmi-ayi.

8 Nuyá Sakíu wajaki Jesusan chicharuk “Íistá Uuntá, wi takakjana juna jímiapetek nakakan kuítríncha ainia nuna susartatjai. Tura wáitruan chikichan kasarkaitkiuncha menaintiu patatsan awainkittiajai” tímiayi.

9 Tutai Jesus tímiayi “Ju áishmaṅ Apraáma shuáríntiat yamáí niisha níiniujai uwempra asa nekas Apraáma shuarí ajasuiti.

10 Wisha Aents Ajasu asan menkakarú ainia nuna eakan uwentikrartaj tusan táwitjai.” Tu tímiayi.

Kuítian nekapmá chichasmiayi

11 Nu aents Jesusan anturkarmia nu “Jerusaréṅnum jeawakrin Nii, Yus anaikiamu asa, wárik akupin ajastatui” tu enentáimsarmiayi. Tuma asamtai wésar Jerusaréṅnum nuntumsaraj, nuna enentáimsaráin tusa Jesus juna métek-takun chichasmiayi:

12 “Áishmaṅ penkeri amai. Nu áishmaṅsha jeachat chíkich núnkanam kapitíán náamkan tátaj tusa wemai.

13 Tura wétsuk ni takarniurin tias armia nuna untsukarmai. Tura ankant ankant kuit kurijjai nankaamas péñker armia nuna suíniak “Ju kuitjai wi táatsain takakmá ajatarum” timiai.’

14 “Tura ni nunkéniá shuarka nakitiarmai. Túmainiak “nu áishmaṅ ii kapitíántri ajasain tusar nakitiaji” nu titiá tusar áishmaṅkan akatrar akuptukarmai.’

15 ‘Tuma ain kapitián náamak ni nunkén waketki tamai. Taa “winia kuítrujai warí túrarum” títiaj tusa ni takarniurin kuitia súsarmia nuna untsukarmai.’

16 ‘Ni takarniuri emka chikichik taa “ame kuítrumjai takakmasan tias patasan achikmajai” timiai.’

17 ‘Tutai kapitián chichaak “Pénker túrame. Ishichik susamjamna nújaink’i wi tímiajna tímiatrusmek túrame. Tuma asakmin tias péprun akupin awajsattajme” timiai.’

18 ‘Chíkich taa “Ístá Uuntá, ame kuítrumjai takakmasan señku patasan achikjai” timiai.’

19 ‘Nunasha chicharuk “Amincha señku péprun akupin awajsattajme” timiai.’

20 ‘Nuyá chíkich taa “Uuntá, ame kuítrumin pani-ijjai ijian ikiusmajai.

21 Amesha kakaram chichau asakmin, ikiuschi-atam achin asakmin tura arakmachiatam juu asakmin ashamkamjame” timiai.’

22 ‘Tutai kapitián timiai “Maaj, amesha ti ya-jauchiitme. Ame támena nuke makurmawai. Wi kakaram chichau aisha, ikiuschiatan achin aisha tura araknasha arakmachiatan juu aisha,

23 nuinkia ¿urukamtia kuit-ikiutainiam ikiuschamam? Nuinkia wi atak táakun patasan achikiaajna” timiai.

24 Tura nui wajarmia nuna chicharuk “Kuítian takakmari juruktiarum; túrarum tias takakna núshuar susatarum” timiai.’

25 ‘Tura niisha chichainiak “túrasha Uuntá, tias takakja” tiarmai.’

26 ‘Tutai kapitián chichaak “Takakna nujai takaakuinkia patatnastatui tájarme. Tura takakna

nujai takaachkuĩkia ishichik takakkuisha jurunkittiawai.

27 Tura winia nemasur kapitián ajasaĩn tusar nakitrurarmania nu itiatarum. Tura wisha íimiaĩn máatárum” timiai.” Tu tímiayi Jesus.

Jerusaréñnum Jesus wayamiayi

(Mateu 21.1-11; Márkus 11.1-11; Juan 12.12-19)

28 Nuna tuasua amik Jesus Jerusaréñnumaani wémiayi.

29 Petpajái pepru tura Petania péprusha Uriwiu náinnium tíjiuchiayi; nuĩ jeastatuk ajatemas ni unuiniamuriñ jímiarar chicharuk,

30 “Tíjiuch péprunam wetarum. Túrarum nuĩ umpuuruch ekemtukchamu jĩnkiamu wajaí wáinkiatarme. Nu atíarum itiatarum.

31 Tura “¿urukamtai atíarum?” turamainiakuisha, “ii uuntri wakerawai” títiarum” tímiayi.

32 Tutai unuiniamuri wear, Jesus timia ímiatrusañ wáinkiarimiayi

33 Tura umpuuruchin atíakui nérentin chichainiak “¿Urukamtai umpuuruchsha atíarum?” tiarmiayi.

34 Tutai unuiniamusha “Ii uuntri wakerawai” tiarmiayi.

35 Tura umpuuruchin Jesusan itiarimiayi. Túrawar ni pushiriñ umpuuruchiniam awantkar Jesusan ekenkarmiayi.

36 Tura Jesus wétinnium ni pushiriñ jintianam ayaparar áintrimiayi.

37 Tura Uriwiu naint awankénamunam tíjiuch ajasarmatai untsurí aents Jesusan nemariarmia

nu warainiak kakantar untsumainiak aents tujintiamun untsurí túran wáinkiaru ásar Yusa náarín uunt awajsarmiayi.

³⁸ “Yusa náarín winiana ju ii uunt Akupniuiti. Nincha Yus shiir awajsati. Nayaimpiniam pujuinia nu shiir enentáimsar Yusa náarín uunt awajsarti” tiarmiayi.

³⁹ Tura Pariséu aents nuí páchitra pujuarmia nu Jesusan chicharainiak “Uuntá, nemartamainia nu “takamatsata” tiarta” tiarmiayi.

⁴⁰ Tutai Jesus tímiayi “Nuínkia ju takamatsarmataínkia, kayasha untsumkarainti. Nuna paant tájarne” tímiayi.

⁴¹ Jerusarénum tíjiuch ajatemas péprun wáiniak úutuk júnis tímiayi:

⁴² “Jerusarénumia shuártiram, ju tsawantinksha shiir pujustintrum nekaarmeka maak. Túrasha yamaikia nekaatin nankaamasai.

⁴³ Kame ti iturchat tsawant jeartamtatrume. Atumí nemasri nunkejai aa-tanishan tanishmarar téntatramkattarme. Mesetan najatramattarme, tura áatusha junisha mash árenmaktatrume.

⁴⁴ Túrutma nunká ajunmartatrume. Tura atumiin pujuinia nuna máawartatui. Tura ashí emesrarmatai ishichkisha kaya irumpramusha penké atsuttawai. Wi Yusa anaikiamurín tarijrumna nu nekaachu asakrumin túrutmattarme.” Tu tímiayi.

Yusa Uunt Jeen suruktinian Jesus surimkiamiania nu

(Mateu 21.12-17; Márkus 11.15-19; Juan 2.13-22)

⁴⁵ Nuyá Jesus Yusa Uunt Jēen wayá suruktasa pujuarmia nuna sumaktasa pujuarmia nunasha jūiki awemarmiayi.

⁴⁶ Túrak juna tímiayi:

“Yús-Papinium yaunchu aarma awai: “Winia jēarka Yus áuj̄satin jēaiti” tu áarmaiti. Túrasha átumka kasáa matsamtaiya nútikiarme” tímiayi.

⁴⁷ Tuke tsawantin Yusa Uunt Jēen Jesus uwempratin chichaman unuiniak pujaī Israer-patri úntr̄isha, Israer-shuara jintinniur̄isha, tura pepru úntr̄isha, itiur máamniakit tusar ti enentáimsarmiayi.

⁴⁸ Túrasha ashí aents émamkes anturainiakui máatniun tujinkarmiayi.

20

*Yusa kakarmarijiaī Jesus takasmiania nu
(Mateu 21.23-27; Márkus 11.27-33)*

¹ Yusa Uunt Jēen Jesus uwempratin chichaman unuiniak pujaī Israer-patri úntr̄isha, Israer-shuara jintinniur̄isha, Israer-shuara úntr̄isha táarmiayi.

² Taar Jesusan chicharainiak “¿Yana chichamejai jū túram? ¿Ya jū túratniuncha akuptamkait?” tiarmiayi.

³ Tutai Jesus tímiayi “Wisha aniaštajrum tusan wakerajrume.

⁴ ¿Ya Juán̄nasha imiakrattia tusa akupkamia? ¿Yusak? ¿Aentsuk? Turuttiarum” tímiayi.

⁵ Tútaisha niisha nuamtak warintiajik mai tunai ajarmiayi. ““Yus akupkaiti” tákurn̄kia, “¿urukamtai enentáimtuscharum?” turamtatji.

⁶ Túrasha “aents akupkaiti” tákurnisha ashí aents kayajai tukurmar mantamattaji. Warí “Juan Yúsnan etserniuiti” tuíniatsuk” tiarmiayi.

⁷ Nuiñkia Jesusan ániak “Iisha nékatsji, Juan imi-akratinniasha yátsuk akupkamia” tiarmiayi.

⁸ Tutai Jesus tímiayi “Wisha núnisnak winia akup-tukua nuna tíchattajrume” tímiayi.

*Pénker-takachu armia nu
(Mateu 21.33-44; Márkus 12.1-11)*

⁹ Nuyá Jesus ju métek-taku chichamjai aentsun jintintiamiayi:

“Áishman ni ajariin uwa araa amuk, shuaran takartusti tusa ikiukmiai. Tura niñkia wau táchataj tusa jeachat wémai.

¹⁰ Tura júuktin tsawant jeamtai juukman akanak jurumkit tusa takarniurin takau shuariin akuptukmai. Tura takarniurincha katsumkar áyatik awainkiarmai.

¹¹ Nuyá nérentin chíkich takarniurin akupkamai; tura nunasha núnisañ katsekkar, awatiar, sútsuk akupkarmai.

¹² Nuyá ataksha chikichan akupkamai. Tura nunasha takau shuar katsumkar akupkarmai.’

¹³ ‘Nuyá ukunam ajá nérenniuri “Itiurkatjak, timiai. Winia aneamu uchirun akupkattajai. Nin wáinkiar shiir enentáimtuschartimpiash” timiai.’

¹⁴ “Túrasha takau shuar nuna wáinkiar, nuamtak chichainiak “Juka ajá nérenniuri ajastatui. Maatai. Nuikia aja iiniu átatui” tiarmai.

¹⁵ Nuna tuíniak ajanmaya jiki máawarmai.’

Nuyá Jesus aniasmiayi ‘Wats ¿warí enentáimsarum, ajá nérenniuri itiurkattawa?’

16 Niisha taa, nu takau shuáran máawartatui. Tura núnkanka chikichan susattawai” tímiayi.

Nuna anturkar “Yus núnaka tsan̄katkashti” tiarmiayi.

17 Tura Jesus nin émamkes íisar tímiayi “¿Nuikia Yus-Papinium áarma nu warintiuá? Ju áarmaiti: Kayan pénkernak jeá jeamin “yajauchiiti” tusar ajapawarmia nu ashí kayajaj̄ nan̄kaamas pénker apujsamuiti.

18 Nu kayan tukumainia nuka kupintrattawai. Tura nu kaya shuarnum iniarka nu shuaran tsai tsai awajsattawai. Tu áarmaiti.

*Pariséu achiktai tusar wakeriarmiania nu
(Mateu 21.45-46; 22.15-22; Márkus 12.12-17)*

19 Israer-patri uuntri tura Israer-shuara jintin-niurisha “nu métek-taku chichamjaj̄ in túramji” tu nekaawar nuikⁱ Jesusan achikiar emetatai tusar wakeriarmiayi. Tura untsurí shuar Jesusan wakeruiniakui, ashamainiak túracharmiayi.

20 Tura Kapitiánnium suruktai tusar wakeru-
iniak mamikmau shuaran Jesusan akuptukarmi-
ayi. Nu shuar pénker shuara núnisan̄ jeariar, Jesus
nékatsuk yajauch chichakat tusar, aniastaj tusar
wearmiayi. Ni chichakmarjjij̄ uuntnum suruktai
tusar túrawarmiayi.

21 Tu enentáimsar tíarmiayi “Uuntá, ame tuke
nekas chicham chichaame, nu nékaji. Aents
pátatek íiyatsme, antsu nekas Yusa jinti jintintiamé.

22 Wats turuttia, ¿Rúmanmayá uunt akupin ii
kuitri akiktin pénkerkait? ¿Akiktinkiait? ¿Suritkiat-
niukait? Nu nekaatai tusar wakeraji” tiarmiayi.

23 Tura Jesuska ni yajauch enentáimsamurin nekáa chicharainiak,

24 “Kuit itiatarum. ¿Yana yapi tura yana naari ju áarmait?” tímiayi.

Tutai nii tiarmiayi “uunt akupniunu.”

25 Tutai Jesus tímiayi “uunt akupniunu átinia nu uunt akupin susatarum. Tura Yusna átinia nu, Yus susatarum.”

26 Aents ántamunam ni chichakmarijjai achiktinian penké tujinkiarmiayi. Antsu aya ímprarmiyai tura takamtak pujusarmiyai.

Satusésha achiktai tusar wakeriarmiania nu (Mateu 22.23-33; Márkus 12.18-27)

27 Nuyá Satuséu “jakamunmaya penké nantakchamniaiti” tuinia nu, Jesusan aniastai tusar tariarmiyai.

28 Aniiniak tiarmiayi “Uuntá, Muisáis juna áartampramijai: “Áishman ni nuarí júreatsain jakamtainkia ni yachi nu wajen nuátkatí, yachin yajutmatratsa.” Tu áarmaiti, tiarmiayi.

29 Wats, siati yachi ármai, tiarmiayi. Iwiajri nuwan nuatak yajutmatsuk jakamai.

30 Ni yachi wajen akintiak, nuátak, niisha yajutmatsuk jakamai.

31 Nuna yachisha núnisan nu wajen nuátkamai; tura núnisan ashí siati nuna patainkⁱ nuátkarmai. Yajutmatsuk yajutmatsuk kajinkiarmai.

32 Tura ukunam nuwasha jakamai.

33 Nantaktin tsawantai, nantakiarmatai, ¿yana nuarin ati? Ashí siati nuátkacharmaka” tiarmiayi.

34 Tutai Jesus tímiayi “Ju nunkanman nuatnaiki-atin awai.

35 Tura nantakiar atak iwiaaku ámin ainia nuka nuatnaikiachartatui.

36 Warí, jákashtin ániatsuk. Nayaimpinmaya sun-tara áintsan ajasartatui. Tura nantakiaru ásar Yusa uchiri ajasartatui.

37 Tura jákaru nantakiartin ainia nuna imia Muisáis jintíamiayi. Warí, numichiniam ji wajái keamunan Yus niijiai chichaamun, Yus-Papinium Muisaiska áarmiayi. Nú áarmanum Uunt Yus Apráama, Isaka tura Jakupu Yúsrinti, tímiayi. Nú áishman yaunchu jákaru ain “ni Yúsrinti” tímiayi. Nuna taku nantaktin awai tu jintíamiayi.

38 Kame jaka menkakatniunam pujuinia nuna Yúsrinchuiti. Tuma asamtai jakáa Yúsrinti tíchamniaiti. Antsu iwiaaku ainia nuna Yúsrinti. Ashi Niiniun iwiaarkainiawai” tímiayi.

39 Nuna antukar Israer-shuara jintinniuri “pénker tame, Uuntá” tiarmiayi.

40 Tura nuyánka aniastinian arantukarmiayi.

¿Kristu tutai yana uchirimpiait?

(Mateu 22.41-46; Márkus 12.35-37)

41 Nuyá Jesus tímiayi “Yus anaikiamu Kristu tutaisha, ¿itiura “Aya Tawit weeaiti” tárúm?

42 Warí, Sarmu papinium Tawit niniki juna tátsuk:

“Uunt winia Úuntrun “Akupin pujutainium Winia untsuuruini pujustá, tímiayi.

43 Ame nemasrumin núpeteatsain nui pujustá” tímiayi.” Tú áarmaiti.

44 Kame Tawitkia, Krístun chicharuk, “winia Úuntur” tajisha, ¿itiurak Kristu tutai Tawitia pampanmarí átiñki?” Tú tímiayi Jesus.

Israer-shuaran jintintin ainia nuyá aneartarum
(Mateu 23.1-36; Márkus 12.38-40; Rúkas 11.37-54)

⁴⁵ Ashí aents Nin anturkatasa pujuiniaj ni unuiniamurin Jesus juna tímiayi:

⁴⁶ “Israer-shuaran jintintin ainia nuyá aneartarum. Niisha esaram pushin entsarar wekasataisar wakeruiniawai. Tura jintiá ti shiir áujtusarat tusar wakeruiniawai; tura iruntai jeanam penkeri pujutainium pujustinian wakeruiniawai. Tura nampernumsha uunt pujutainium pujustaj tusa wakeruiniawai.

⁴⁷ Túrasha waje jeencha atantainiawai. Túrawar aents nekaracharat tusar ti esaram chichamjai Yúsan áujainiawai. Nincha chíchichjai nankaamas Yus asutiáwartatui.”

21

Waje ni kuítrin susamia nu
(Márkus 12.41-44)

¹ Yusa Uunt Jeen kuítrintin kuit enketainiam kuítian enkeenan Jesus wáinkiamiayi.

² Tura waje kuítrincha jimiará uchich kuítian, reara áaniun, enkean wáinkiamiayi.

³ Wáiniak tímiayi “Nekas tájarme, ju waje kuítrinchaitiat, ashí enkeena nú nankaamas núkap enkeayi.

⁴ Warí, chikichcha ampirma nuna enkeenawai. Tura niisha aya núchiniak takurmakman ampirmatsuk ashí enkeayi.”

Yusa Uunt Jeen saanaktinian Jesus ujakmiania nu
(Mateu 24.1-2; Márkus 13.1-2)

⁵ Yusa Uunt J_een kaya shírmach armia nuna tura chíkich shírmach susamu armia nunasha chíkich shuar áujmatuk pujuarmiayi. Nuyá Jesus tímiayi:

⁶ “Átum yamáí shiir wáintrumna nu ashí emes-nartatui. Kaya ekenramusha mash yumpuun-trartatui” tímiayi.

*Amuukatin tsawantin uruku átata nu nekaatin
(Mateu 24.3-28; Márkus 13.3-23)*

⁷ Nuyá Jesusan chicharainiak “Uuntá, nusha ¿urutaik túrunatí? ¿Kame j_u túrunatin jeatemam-taisha warij_{ai}n nekaattají?” tiarmiayi.

⁸ Tutai Jesus tímiayi “Aneartarum; anañnawairap. Nekaatarum. Winia náarun pachisar, “wi Krístuitjai” tau ti untsurí j_iintrartatui. “Nuñka amuukatin jeayí” tu etserkartatui. Tuíniakui anturkarum nemariirap.

⁹ Tura meset chichamsha, kapitián mesetan nájanmasha antukrum sapijmiakairap. Nusha emka túrunatniuiti. Túrasha nú chichamaik amuukatin tsawant jeashtatui.’

¹⁰ Nuyá take chicharuk tímiayi ‘Shuar chíkich nuñkanmayá shuarj_{ai} mesetnum ti nekas maani-awartatui.

¹¹ Ti u_urkattawai; untsurí nuñkanam tsukasha, sunkursha ti átatui. Nayaimpinmasha ti ashamai nánkamas túrunattawai. Nuj_{ai} Yus ni kakar-marín iniakmastatui.’

¹² ‘Tura j_u túrunts_{ai}n atumin pataaturmakar achirmakartatui. Iruntai j_eanmasha makurmartai tusar juramkiartatui. Sepunmasha enketmattarme. Tura winia naar páchia asakrumin, akupniunmasha, úuntnumsha juramkiartatui.

13 Nuñkia atumin túrutmakrumin wi túramu etserkatin arutmattarme.

14-15 Tura atumj nemasrj nakitramainiak “wáitiaiti” t̄itinian tujinkiarat tusan, winia nekatairjai chichastinian amastatjarme. Tuma asamtai “Jurakuisha warinia tiniak kíishtumaktaj tusan áetak enentáimsashtatjai” titiarum.’

16 ‘Tura imia atumí aparisha surutmakartatui. Atumí yachisha, atumí shuarisha amikrumsha núnisarañ surutmakartatui. Tura máamunka máawartatui.

17 Tura Winia ajasaru asakrumin ashí aents nakitramprartatui.

18 Tura penké ishichkisha yajauch awajtam-sachartatui.

19 Katsuntrarmeka iwiaaku átin wáinkiatarme.’

20 ‘J̄u pepru Jerusarénka aa tanishriin sun-tar téntakar matsatu wáinkiumeka, emesratin jeá nekaattarme.

21 Nuikia j̄ui Jutía nuñkanam pujuinia nu, náinnium pisartin áiniawai; tura j̄ui Jerusarénnum pujuinia nusha j̄uyanka jiinki wétin ainiawai. Tura ajanam pujuinia nusha, péprunam waketkishtin áiniawai.

22 Nu tsawantincha Yus asutiámun wáinkiertatui. Yús-Papinium nu túrunatin yaunchu aarma nu uminkiatstawai nu tsawantin.

23 Nuñkanam ti wáitsatin átatui. Tura j̄u aents ti asutniawartatui. Tuma asamtai nuwá ajamtin ainia nusha, tura uchi kuírchin takakainia nusha imiá itiurchatan wáinkiertatui.

24 Tura j̄uyá aents mesetnum jákartatui. Tura chikichnaka ashí nuñkanam misaawar júkiartatui; tura yajayá apach, Yúsnan enentáimtuiniatsna nu,

juí Jerusarénum wayawar najakartatui. Nu túratniunka Yus tsan̄katkana nuin̄ túrawartatui.’

Aents Ajasu tutai tátintri

(Mateu 24.29-35, 42-44; Márkus 13.24-37)

²⁵ ‘Nuinkia etsanmasha, nantunmasha, yáanmasha Yúska ni kakarmar̄in iniakmak nusháa túrattawai. Nuñkanmasha ashí aents páchim enentáimprartatui. Tura nayaantsanam chíchimi ti aku tantáa ajakui ti ashamkartatui.

²⁶ Tura túrunatin ana nuna enentáimsar mayáí ashinkíartatui. Warí, nayaimpiniam kakaram ainia nusha peantrartatui.

²⁷ Nuyá Winia, Aents Ajasu tutain, yurañminiam ti shiir ajasan winiaí wáitkiartatui.

²⁸ Nu túrunatin nánkamkui uwempratin jeatemayi tusarum kakaarum shiir enentáimsatarum.’

²⁹ Tura ju chichamnasha nekapmamiayi. ‘Ikiu numi tura nánkamas numisha enentáimsatarum.

³⁰ Ju nuñkanam ni nuké yama puñkakmatai “esat jeatemayi” táturmek.

³¹ Núnisan̄ Wi tájana nu wáinkíurmeka, Wi ju nuñkanam akupin ajastin jeatema nu nekaatarum.’

³² ‘Tura aents yamaí pujuinia nu jáatsain̄ nusha ashí túrunattawai. Núnaka paant tájarne.

³³ Nayaimpisha nuñkasha amuukartatui. Tura winia chichampruka amuukachminiaiti.

³⁴⁻³⁵ Nu tsawant aya aneachma jeattawai. Ashí aents ju nuñkanam pujuinia nu, nuna enentáimtsuk pujuiniaí jeattawai. Tuma asamtai atumsha anearum wekasatarum. Yajauchiniam emetnarum, aya yurumátniuk, aya

umartiniak enentáimtusurum, ju nunkanam ana nu ti wakerakrumninkia péñker enentáimsatin tujinkiattarme. Nu atsutí tusarum tura nu tsawant aya áwaktamkajj tusarum péñker wekasatarum.

³⁶ Anearum wekasatarum. Túrunattana nuj kat-suntrataj tusarum Yus aujsa pujustarum. Túrarum Aents Ajasu tutai íimmianum péñker átaj tusarum túratarum.”

³⁷ Tuke tsawant tsawajsha Yusa Uunt Jeeñ Jesus unuiniamiayi. Tura káshikia Uriwiu náinnium we-wémiayi.

³⁸ Tura tuke tsawant Yusa Uunt Jeeñ Jesus chichaamun anturkatai tusar káshik tariarmiayi.

22

Jesus achiktin chichaman jurusarmiania nu (Mateu 26.1-5, 14-16; Márkus 14.1-2, 10-11; Juan 11.45-53)

¹ Wakaprutai enketaachma tanta yuatin námper, paskua tutai, jeatemamiayi.

² Israer-shuara Pátririsha Israer-shuara jintinniurisha áentsun ashamainia ásar, itiurak máawaintiajⁱ tusar ti enentáimsarmiayi.

³ Nuinkia Iskariúti Jútasan enentáin íwianch wáintiamiayi. Nú Jútaska Jesusa unuiniamuriin páchitkiauyayi.

⁴ Israer-patri úuntrin tura Yusa Uunt Jeeñ kapitián pujuarmia nuna werimiayi. Tura Jesusan tu surukminiaiti tusa niijjaj chichasarmiayi.

⁵ Niisha nuna antukar warasar “kuit amastatji” Jútasan tiarmiayi.

⁶ Niisha “ayu” tinia, aents nékachmanum suruktaj tu enentáimsamiayi.

*Kristu jakamu enentáimtustin námper
(Mateu 26.17-29; Márkus 14.12-25; Juan 13.21-30; 1 Kurintiunam 11.23-26)*

⁷ Wats, wakaprutai enketaachma tanta yúatin námper jeamiayi. Paskua tutainium murikchin máatin ármiai.

⁸ Tura Jesus Pitruncha, Juán̄nasha akupeak “Paskua tutai námper iwiaratarum” tímiayi.

⁹ Tutai niisha chichainiak “¿Tuí iwiarat tusamea wakeram?” tiarmiayi.

¹⁰ Tutai Jesus juna tímiayi “Péprunam wetarum. Jearum áishman̄ yumin takaku wekáa wáinkiatarme. Nú áishman̄ nemarsatarum. Tura jeá wayaakui,

¹¹ nú jea nérenniuri chichareakrum “Uunt chichartamuk unuiniamurjai paskua yurumátin ¿tuí aa? turamui” titiarum, tímiayi.

¹² Tákurmin nu nérentin yakí písunam uunt kuártun ashí iwiamun iniakturmastatrume. Nuí ii yurumátin iwiaratarum” tímiayi.

¹³ Tutai niisha wear Jesus tímiania tímiatrusan̄ wáinkiarimiayi. Tura paskua namperan nuí iwiararmiayi.

¹⁴ Yurumátin jeamtai ni unuiniamurijjai Jesus misanam pujusarmiayi.

¹⁵ Pujusarmatai, Jesus chichaak “Wisha játsuk atumjai ju paskua najanatniun ti wakerimjai,

¹⁶ atakka ju nunkanam atumjai najanashtin asan. Tura antsu Yus akupeana nuí jear atak najanattaji” tímiayi.

17 Nuyá pinin̄kian achik, Yúsan yum̄in̄kias, ni unuiniamur̄in tímiayi “Ju pinin̄ achikrum sunaisatarum.

18 Atakka ju nun̄kanam uwa yumir̄in atumj̄ai umarchattajai, tajarme. Tura antsu Yus akupin ajastin jeamtai atak iij̄ai umartatji” tímiayi.

19 Nuyasha yurumkan achik, Yúsan yum̄in̄kias puuk susarmiayi. Tura chicharainiak “Juka winia ayashruti. Winia ayashur atum pé̄nker pujustinium surunkattana núiti. Winia enentáimtursarum yuatarum” tímiayi.

20 Tura yurumsua amikiarmatai pinin̄kian achik, “Ju pinin̄ winia numparun nakumea asa uwempratin yamaram chicham najanamun nakumeawai. Winia numpar atumnian puartamprattawai’ tímiayi.

21 ‘Túrasha winia surutkattana nu Wij̄ai métek ju misanam pujawai.

22 Kame Wi, Aents Ajasuitjiana ju, Yus iwiaramua nútiksanak jakattajai. Túrasha Winia surutkana nu nekaatí. Ti asutniattawai” tímiayi.

23 Nuna antukar “Wíashitiaj, yákit” tunaim ajarmiayi.

Nañkaamantu ana nu

24 “¿Iij̄ai yaki imiá nañkaamantu aint?” tunaim ajarmiayi.

25 Tura Jesus tímiayi “Ju nun̄kanam akupin ainia nu, waantu enentáimtumasar akupenawai. Tura akupenakui “pé̄nker túrin áiniawai” tuíniawai.

26 Tura atumj̄ainkia nuka atsutí. Antsu nañkaamantu ana nu, uchichia núnik ajastiniaiti; akupeana nusha takarniua núnik ajastiniaiti.

27 Enentáimsatarum. Misanam pujus yurumna nu, yurumkan ajamana nujai ¿tuá imiá nekas nankaamantuit? ¿Yurumna nu nekas nankaamantuchukait? Tura Wisha atumin yurumkan ajamna núnisnak pujajai.'

28 'Winia itiurchatrun wáinmiaj nuĭ atumsha Wijiai tuke pujumarme.

29 Tuma asakrumin akupin ajastinian winia Apar surusu asamtai Wisha nútiksanak akupkatniun súajrume. Wi akupkatjana nuĭ atumsha Wijiai yurumáttarme, tura Wijiai umartatrume, tájarme.

30 Tura akupin pujutainium pujusrum, Israershuar tuse írutkamu akupkattarme tajai." Tu tímiayi.

Pítur "atsá nékatsjai" títinian Jesus ujakmiania nu (Mateu 26.31-35; Márkus 14.27-31; Juan 13.36-38)

31 Nuyá Uunt Jesus tímiayi, "Nekaata, Semunká. Trikiu neré tsatsamátniua áintsan Satanás atumi enentáin páchim enentáimtikramprataj tusa seayi.

32 Tuma ain Yus enentáimtustinian kajinmatkiin tusan Wisha Yúsan seamjai. Tura Yúsnun waketkim ame yatsum ikiakárarta" tímiayi.

33 Tutai Semun tímiayi "Uuntá, sepunam enketmainiakuisha wisha nemarsatajme. Tura mantamainiakuisha métek jakatjai" tímiayi.

34 Tutai Jesus tímiayi "Pitrú, nekas tájame, yamaik atash shiniatsain ame menaintiú natsantrurtatme" tímiayi.

Itiurchat winiawai

35 Nuyá Jesus tímiayi “Wisha yurumkajainchu, kuítjainchu, sapatjainchu akupkamjarmena nuǐ ğtáatramsamkarum?”

Niisha “Atsá penké táatramsachmaji” tiarmiayi.

36 Tutai Nii tímiayi “Antsu yamaikia yurumkan takakkunka takustí, kuítniasha núnisan; tura puniancha takakchakka ni pushirin suruk punian sumakti.

37 Nekaatarum. Yus-Papinium yaunchu aarma ana nu wi túrunamujai uminkiatawai. Juiti aarma: Yajauch shuarnum pachikiarmiayi. Warí, Yus-Papinium ashí Winia aarma ana nu uminkiatniuiiti.”

38 Tutai ni unuiniamurǐ tiarmiayi “Uuntá, jui jimiará puniá awai.”

Tutai Niisha “Asati” tímiayi.

*Jitsemaní ajanam Jesus Yúsan áujsamiania nu
(Mateu 26.36-46; Márkus 14.32-42)*

39 Nuyá Jesus jíinkimiayi. Tura tuke túrin asa Uriwiu náinnium wémiayi. Ni unuiniamurǐsha nemariarmiayi.

40 Ai jeá nin chicharuk “Itiurchat winiakui iniaraj tusarum Yus áujstarum” tímiayi.

41 Tuasua amik arantach, kaya nankimiam jeana núnik Jesus wémiayi. Tura Yúsan áujsataj tusa tikishmarmiayi.

42 Tikishmar juna tímiayi “Apawá, piniñnum yapá umartinia ántsai Wi wáitsattajna nu wakerakmekka jurutkitia. Tura Wi wakerajna nucha antsu Ame wakeramna nu atí, tajai” tímiayi.

43 Nuyá, ikiakártaj tusa Yusa suntariǐ nayaimpinmaya tarimiayi.

44 Tura Jesus imiá wáitias pujak nú kakaram Yúsán áujsamiayi. Tura ni seármarisha numpá ántsán nunká kitiawarmiayi.

45 Yúsán aujsua amik wajaki ni unuiniamurin werimiayi. Tura kúntuts enentáimmiarijjaj ti pimpiki kanúu tepenan tarimiayi.

46 Nuinka chicharainiak “¿Urukamtai kanúu teparum? Itiurchat winiakui iniaraj tusarum nantakrum Yus áujsatarum’ tímiayi.

Jesusan achikiarmiania nu

(Mateu 26.47-56; Márkus 14.43-50; Juan 18.2-11)

47 Jesus tuke chichaa pujaj, untsuri shuar táarmiayi. Tura nuní eemka Jesusa unuiniamuri Jútas naartin winimiayi. Tura Jesusan mukunatajtsa tarunmiayi.

48 Támatai Jesus chicharuk “Jútasá, ¿Aents Ajasu tutai mukunamek surutkattam?” tímiayi.

49 Jesusjaj pujuarmia nu, túmamun wáinkiar “¿Uunt puniajaj ijiuartatjik?” tiarmiayi.

50 Tura chikichik Patri uuntri takarniuri kuishin untsuurin tsupirkamiayi.

51 Tura Jesus tímiayi “Iniaisatarum.” Nuna tinia ni kuishin antin tsuáirmiayi.

52 Nuyá Israer-patri úuntrin, Yus-jea úuntrincha, tura pepru úuntrincha, Nin achiktaj tusa tariarmia nuna chicharuk “¿Wisha kasakaitiaj. Urukamtai puniajaisha numijaisha tarutniuram?”

53 Nuik Yusa Uunt Jeen tuke tsawant atumjaj pujumaj nuj achirkachmarme. Túrasha átum kir-itniumia kakarmajaj nupetkatin yamá tsawantin tsankatkamuitrume” tímiayi Jesus.

*Pítur “Jesusnaka nékatsjai” t́miania nu
(Mateu 26.57-58, 69-75; Márkus 14.53-54, 66-72;
Juan 18.12-18, 25-27)*

⁵⁴ Nuĩnkia Jesusan achikiar emetawar Israerpatri uuntri jeen júkiarmiayi. Tura Pítrusha íkian nemarki wémiayi.

⁵⁵ Tura aach jinia ikiapármiai. Túrawar anamuk pujuarmiayi. Pítrusha niijjai pujusmiayi.

⁵⁶ Tura nuwá, Patri takarniurí amia nu, Pítur jinia anamuk pujan wáiniak “Ju áishmansha Niijjai pujumiayi” tímiayi.

⁵⁷ Tutai Pítur chichaak “Nuwá, Nin nékatsjai” tímiayi.

⁵⁸ Tura árusañ chíkich nin wáiniak “Amesha Niin páchitkaiatme” tímiayi.

Tutai Pítur tímiayi “Atsá. Wikia áinkia páchitkiatsjai” tímiayi.

⁵⁹ Chikichik ura nankaamasmatai chíkich apach chichaak “Nekas ju áishmansha Niijjai pujumiayi. Warí, niisha Kariréanmayanchakait” tímiayi.

⁶⁰ Tutai Pítur chichaak “Ame támena núnaka nékatsjai” tímiayi. Nú chichamaik Pítur chicháa pujajĩk' atash shiniukmiayi.

⁶¹ Tura nuĩnkia Uunt Jesus Pítrun apajas íismiayi. Túra “atah shiniatsain ame menaintiu natsantrurtatme” Uunt Jesus timia nuna enentáimpramiayi.

⁶² Nuyá Pítur jiinki ti úutmiayi.

*Jesusan wishikrarmiayi
(Mateu 26.67-68; Márkus 14.65)*

⁶³ Áishman Jesusan wáiniarmiania nu ti wishikiainiak awattiarmiayi.

⁶⁴ Jiin epetkar yapiniam awattiar chicharainiak “Nekamata, ya awatama” tiarmiayi.

⁶⁵ Tura katsekainiak ti untsurí chikichnasha nánkamas tiarmiayi.

*Unt Iruntainiam Jesusan ejeniarmiania nu
(Mateu 26.59-66; Márkus 14.55-64; Juan 18.19-24)*

⁶⁶ Tsawarmatai, Israer-shuara úuntrisha, Israer-patri úuntrisha, Israer-shuara jintinniurisha iruntrar ni iruntairiin ejeniarmiayi. Nui chicharainiak

⁶⁷ “Paant titiá. ¿Yus anaikiamu Kristu tutaia núkaitiam?” tiarmiayi.

Tutai Jesus tímiayi “Wi “ee” tákuisha, “nekasaiti” tíchattarme.

⁶⁸ Tura Wi aníamsha áirkashtatrume, túrasha akup-tukchattarme.

⁶⁹ Tura wárik Wisha Aents Ajasuitjiana nu, ashí nankaamaku ajasan, Yusa untsuurini pujustatjai” tímiayi.

⁷⁰ Tutai niisha tiarmiayi “¿Nuinkia amesha Yusa Uchirinkaitiam?”

Tutai Jesus tímiayi “Ee, Wíitjai, átum Winia túrutrum núnisnak.”

⁷¹ Tutai niisha tiarmiayi “Warí, ¿iisha chíkich ujatkat tusar atsumajik? Imia ninki chichaamu antukchajik” tiarmiayi.

23

*Piratuí Jesusan júkiarmiania nu
(Mateu 27.1-2, 11-14; Márkus 15.1-5; Juan 18.28-38)*

1 Nuyá ashí Uunt iruntrarmia nu wajakciar Rúmanmaya akupin Piratuí Jesusan júkiarmiayi.

2 Nuj jeawar, Piratun chicharainiak “Ju áishman íi shuaran awajimtikiar enentáimtikiainia nu nekaamji. Rúmanmaya uunt akupin Sésaran kuit akiktinian suritramaji. Tura nu arant Nin̄ki, akupin Kristu tutaintjai, tawai” tiarmiayi.

3 Tutai Piratu Jesusan chicharuk “¿Ame Israer-shuara akupniur̄inkáitiam?” tímiayi.

Tutai Jesus tímiayi “Ee, núitjai, ame támena núnisnak.”

4 Nuyá Israer-patri úuntr̄incha tura aents nuj iruntrarmia nunasha Piratu chicharainiak “Ju áishman tunaan túran penké wáinkichuitjai, tajai” tímiayi.

5 Túrasha niisha nú kakantar chicharainiak “Antsu nekas ashí Jutía nun̄kanmaya aentsun ni unuiniana nujai akajenawai. Kariréa nun̄kanmaya nan̄kaamas ímiajaj̄isha tayi” tímiayi.

6 Piratusha nuna antuk “Nu áishman ¿Kariréanmayan̄káit?” tímiayi.

7 “Ee” tuiniakui, Erutisan akuptukarmiayi. Erutiska Kariréanmaya aentsun akupniuyayi. Túmaitiat nu tsawantin Jerusarénum ishichik tsawant pujusmiayi.

8 Erutiska Jesusan íistaj tusa ti wakerimiayi. Jesusa túramur̄in áujmatman ti antukmiayi. Tuma asa, “Wi íimiaj aents tujintiamun túrashtimpiash” tusa Jesusan wáiniak warasmiayi.

9 Jesusan ti nukap aniasmiayi; túramsha penké áimkiachmiayi.

10 Nuisha Israer-patri úuntrisha, tura Israer-shuara jintinniurisha yajauchiiti tusar charaatum awajiarmiayi.

11 Tura Erutissha ni suntarijijai Jesusan yajauch enentáimtuiniak Nin wishikiainiak ti penker pushin, akupniu entsatairiya ánniun, áentsrarmiyai. Nuyasha Erutis ataksha Piratuín akupkamiyai.

12 Túram nu tsawant Piratu Erutisjai nawamnaikiarmiyai. Kame yáunchuka nemasnaikiau ármiayi.

Jesusan “mantamnati” tiarmiania nu

(Mateu 27.15-26; Márkus 15.6-15; Juan 18.39-19.16)

13 Nuyá Israer-patri úuntrin aentsu úuntrijai tura penké aentsjai Piratu ikiaanak tímiayi

14 “Ju áishman aentsu awajimtikiui tusarum itiantinrume. Túrasa átum ímprumnin anintrusan yajauch átum tárumna nuna penké nekarachjai.

15 Erutissha núnisan yajauchin nekaachai. Warí, jui awainkichmaka. Nuikia páantchakait ju áishman jakamnia tunaanka túrichuiti” tímiayi.

16-17 Túraitiat tuke túrutai asamtai, jísat jeakui sepunmaya chikichík áishmankan Piratu ankant akupkatin ámiayi. Tuma asamtai, nii chichaak “juna asutían awematjai” tímiayi.

18 Tura aencha iruntrar ti unsumainiak “Atsá; jucha. Ju nakitiaji. Antsu Parapás akupkata” tiarmiyai.

19 Nu Parapássha akupniun nakitiak mesetan najana asa tura mankartin asa sepunam enkeamuyayi.

20 Piratuka Jesusan akupkattsa wakerak ataksha aentsun áujsarmiayi.

21 Túrasha nú arant untsumainiak “Atsá. Krúsnum mantamnati” tiarmiayi.

22 Tura ataksha Piratu chicharainiak “¿Urukamtai. Warí tunaan túrait? Jakamnia tunaan túrachiashtusan, aniasan penké nekarachjai. Asutián akupkatjai” tímiayi.

23 Tura niisha kakaram untsumainiak “Jesus mantamnati” tiarmiayi. Kame aencha tura Patri úuntrisha ti untsumaina ásarmatai ni wakeramurí tsankatnakarmiayi.

24 Nii wakeriarmia nuna Piratu “túrattajai” tímiayi.

25 Tuma asa Parapásan, mesetan najanin tura mañkartin amia nuna akupkamiayi. Tura Jesusnaka ni wakeramun túrawarti tusa íktusarmiayi.

*Jesusan krúsnum ajintrurarmiania nu
(Mateu 27.32-44; Márkus 15.21-32; Juan 19.17-27)*

26 Jesusan jukitiasa pujuiniaí Serini nuñkanmayá Semuñ ni pépruriyá Jerusarénum yama jeamiayi. Nin achikiar, Jesusa krusrí ayantkar “ni ukurí wetá” tiarmiayi.

27 Untsurí aents Jesusan nemariarmiayi. Tura untsurí nuwasha ti kuntuts enentáimiainiak úutkiar tura wa-wa ajakiar wearmiayi.

28 Túmainiakui Jesus nin iis, “Jerusarénumia nuwatiram Winia enentáimtursarum úuttiirap. Antsu atumniak tura atumí uchirí enentáimtusrum úuttiarum.

29 Warí, ti iturchat tsawant jeawartatui. Tuma asamtai “Uchirtichu ainia nu, ajaprukchana

nu tura amuntsachu ainia nu, chíkich aentsjai nankaamas pé_uker pujuiniawai” tiartatui.

³⁰ Nu tsawantaj aents chicharainiak “Náint in nekentmak yuturmaartai” tiartatui.

³¹ Warí, numi sameka áinis yajauch aya ná_unkamna a_unsha ju itiurchat átsuk. Tura numi kukaru ainkiamtai itiurak nú yajauch túrunachat¹.” Tu timiayi Jesus.

³² Tura Jesusjai krúsnum maatai tusar jímiar yajauch áishman_ukan júkiarmiayi.

³³ Karawír nain tutainium jeawar Jesusan krúsnum ajintrurarmiayi. Tura Jesusa untsuurin_i chikichík yajauch áishman_ukan tura ni menaarin_i chíkich yajauch áishman_ukan núnisa_u krúsnum ajintrurarmiayi.

³⁴ Tura Jesus krúsnum ajintraku pujuram, chichaak “Apawá, tsan_ukurarta. Nii áitkiainia nuna nékainiatsui” tímiayi.

Tura suntar pujuarmiania nu, yaki Jesusa pushir_i jukit tusar nakurusarmiayi.

³⁵ Péprunmaya aents ii wajatiarmiayi. Tura uunt armia nusha Nin wishikiainiak “Chikichnaka uwemtikniuiti. Wats, yamáí nekas Yusa anaikiamur_i Kristu tútain_ukiun_uka imia Ni_uki uwémpratí” tiarmiayi.

³⁶ Suntarsha Nin wishikrarmiayi. Tariar churuínian aartai tusar awajiarmiayi.

³⁷ Tura chicharainiak “Amesha nekas Israershua uunt akupniur_uinkiumka amek uwemprata” tiarmiayi.

³⁸ Tura muuknumaani, Kriaku chichamjai, Rúmanmaya apach chichamja_uisha tura Israer

chichamjajsha ju áarar anujkamu ámiayi: *JÚITI ISRAER-SHUARA UUNTA KUPIN*

³⁹ Chikichík yajauch áishman̄ nui ajintruamu amia nu kátsekeak chicharuk “Amesha nekas Yusa anaikiamurintkiumka amek uwemprata tura incha uwentikramprata” tímiayi.

⁴⁰ Tura chíkich ni tsaniakmarin kakantar chicharuk “¿Amesha Niijjai métek asutniátasa pujayatam, Yus ashamatsmek? tímiayi.

⁴¹ Iikia yajauch asar wáitsatnuiitji; ii tunaari akikmakur wáitijai. Antsu ju áishman̄ka yajauchin túrichuiti” tímiayi.

⁴² Nuyá Jesusan chicharuk “Amesha akupin ajasam winiasha enentáimtursata” tímiayi.

⁴³ Tutai Jesus chicharuk “Nekas tájame, jakar shiir pujutainium yamá tsawant Wijjai pujus-tatme” tímiayi.

Jesusa jakamuri

(Mateu 27.45-56; Márkus 15.33-41; Juan 19.28-30)

⁴⁴ Tutupin aj ashí nunkanam ti kirit ajasmiai. Tura menaintiú ura nan̄kaamasu ain, nantu nun̄kaach ajassha tuke kirit ámiayi.

⁴⁵ Tsawái nantusha mushatmarmiai. Tura Jerusarénum Yusa Uunt Jeencha tarach ajamu aa jímiapetek nakaakamiai.

⁴⁶ Nuyá Jesus untsujuk “Apawá, winia wakantrun Amiin ikiuajai” tímiayi. Nuna tinia jakamiai.

⁴⁷ Suntara kapitiantri nu túrunamun wáiniak, Yusa náarin shiir awajeak “Jusha imiá nekas péñker áishman̄kuyi” tímiayi.

48 Tura untsurí aents pujuarmia nu, nu túrunamun wáinkiar ti kuntuts enentáimiainiak ni netsepen paat awatiar waketkiarmiayi.

49 Tura Jesusa amikrisha tura nuwa Kariréanmaya Nin nemariarmia nusha íkian wajasar ii wajarmiayi.

Jesusan iwiarsarmiania nu

(Mateu 27.57-61; Márkus 15.42-47; Juan 19.38-42)

50 Naka enentáimin péñker áishman ámiayi ni naari Jusé. Arimatéa pepru Jutía núñkanam ana nuyauyayi. Israer-shuara Uunt Iruntairin páchitkiauyayi.

51 Yus ju nuñkanam akupin ajasat tusa Jusé nakas pujumiayi. Tuma asa Uunt Iruntainium Jesusan túrawarmia nuna nakitmiayi.

52 Tuma asamtai Piratui we Jesusa ayashin seamiayi.

53 Piratu “ayu” takui, Jesusa ayashin krúsnumia jusa tarachjai penuar kaya táurmanum iwiarsamiayi. Nu táurmanum chíkich iwiarsachmauyayi.

54 Iwiaratin tsawantai, ayampratin tsawant tsawastatuk ajasmatai túrunamiayi.

55 Tura nuwa Kariréanmaya jukiniutak Jesusan nemarsarmia nusha iwiarsamunam weriar; Jesusa ayashi itiur ikiusmait nuna iisarmiayi.

56 Iisar ikiuak ni jeen waketkiarmiayi. Tura Jesusa ayashi mejeenin tusar kunkuinian iwiararmiayi. Tura ayampratin tsawantai, Israer-shuar akupkamun umikiar ayamprarmiayi.

24

Jesus nantakmiania nu

(Mateu 28.1-10; Márkus 16.1-8; Juan 20.1-10)

¹ Tumintin káshik kunkuinian iwiaramun júkiar nu nuwá Jesus iwiarsamunam weriarmiayi. Tura chíkich nuwásha atampriarmiayi.

² Tura iwiarsamu kaya atutkamu urani aan wáinkiarmiayi.

³ Tura wayawar uunt Jesusa ayashin wáinkiacharmiayi.

⁴ Wáinkiachu ásar ashamkarmiayi. Tura “itiurkatjik” tiarmiayi. Tumaj jimiará áishmankan pushin wincharpatniun entsaru nin ayaamach wajainian wáinkiarmiayi.

⁵ Nuna wáinkiar ti sapijmiainiak tsuntsumawarmiayi. Túmakui nu áishman chicharainiak “¿Iwiaakusha urukamtai jakaanumsha earum? tiarmiayi.

⁶ Jui pujatsui. Antsu nantakni. Nékatsumek. Niisha Kariréanam tuke pujus

⁷ “Wi, Aents Ajasuitjiana nu, yajauch aentsnum surunkattajai. Túran krúsnum mantamnattajai. Tura menaintiú tsawantaj nantaktiatjajai” turamchamkarum” tímiayi.

⁸ Nuna takui Jesus timian enentáimprarmiayi.

⁹ Tura iwiarsamunmayá waketki taar, Jesusa unuiniamurin auntse armia nuna tura chikich-nasha ashí nu túrunamun ujakarmiayi.

¹⁰ Jesusa unuiniamurin ujakarmia nu ju áiniawai: Maktaranmayá Marí, Juánasha, Jakupu nukurí Marisha, tura chíkich nuwajajai.

11 Tura Jesusa unuiniamurisha nuwa tuíniakuisha nekasaiti tu enentáimtsuk “wáuruk tuíniawai” tiarmiayi.

12 Túrasha Pítrusha jiinki Jesus iwiarsamunam tsékenki werimiayi. Jeá, init iis, aya tárachik tepenan wáinkiamiayi. Tura túrunamia nuna ti enentáimiar ni jeen waketkimiayi.

*Emaús wetai jintianmaani túrunamia nu
(Márkus 16.12-13)*

13 Nu tsawantaik Jesusa nemarniuri jímiar Emaús péprunam wéarmiayi. Emaúska Jerusarénumiá auntse kirumitru jeá pujawai.

14 Túrunamia nuna chichaki wearmiayi.

15 “Itiurkit” tu aujmatki weenaí imia Jesus taa nuí páchiniak niijiai wearmiayi.

16 Tura wáinkiat nekaashtin asamtai yait nekaacharmiayi.

17 We-wénakua Jesus chicharainiak “Jintiasha ¿warí áujmatkirum wéarum? ¿Urukamtai kúntuts enentáimprum?” tímiayi.

18 Chikichik, Kreupas náartin chicharuk “Jerusarénum túruna nuna ashí nékainiawai. ¿Ámeke amekék túrunamia nu nékachu páchitkiam?” tímiayi.

19 Tutai Jesus tímiayi “¿Warí urukait?”

Tutai tiarmiayi “Entá, Nasarénumiá Jesusa túrunamuri taji. Niisha Yúsnan etserin asa Yusa kakarmarijiai chichasmiayi tura nuna kakarmarijiai takasmiayi. Núnaka ashí aents nékainiawai.

20 Tura ii Pátrirī uuntri tura ii pépruri uuntri “tunáa jakamnia túrayi” tusar “krúsnum mantam-nati” tiarmiayi.

21 Tura ii Israer-aentstin uwentikrampratin tu enentáimsamji. Tura ni maamusha menaintiú tsawant nan̄kaamasai.

22-23 Túrasha ii nuwā ni iwiarsamunam yamaí káshik weriar ni ayāshin wáinkiacharmai. Tura “Yusa suntari wáinkiaji tura “Jesus iwiaakuíti” túramji” tiarmai. Nuna tu ujatmakakrin ti enentáimpraji.

24 Nuyá íi shuar iwiarsamun weriar, nuwā tiarmia tímiatrusan̄ wáinkiarmai. Tura Jesusnaka wáinkiacharmai.” Tu ujakarmai Jesusan.

25 Nuyá Jesus nin chicharainiak “Enentáimchaitrume. Ashí Yúsnan etserin tiarmia nu wau enentáimtatsrume.

26 ¿Yusa anaikiamuri, Kristu tutai, shiir awajnat-suk ti wáitsashtinkiait?” tímiayi.

27 Tura nuyá Yus-Papinium Muisáis aarmia nuyá jukin ashí Yúsnan etserin ni túrunatniurin áararmia nuna jintintiatasa nan̄kamamiayi.

28 Ayu, nii wearmia nú peprunam jeawarmiayi. Tura Jesuska nūj nan̄kaamaki wétaj tau ajamiayi.

29 Tura niisha chicharainiak “Weep. Iijiai pu-justá. Warí, nantu akaikiyi, kirit ajatemsai” tiarmiayi.

Tutai Jesus niijiai pujustaj tusa wayamiayi.

30 Tura niijiai irunar misanam pujus, yurumkan achik, Yúsan yuminkias nincha puuk súsarmiayi.

31 Nu chichamaik, ni jii uranniuua núnikiarmatai Jesusan nekaawarmiayi. Tura Niisha nú chichamaik men̄kakamiayi.

32 Tura nu shuarsha mai tunai ajainiak “Jintia winis Niisha Yus-Papin jintinramuk nekas ii enentáin shiir enentáimtikramprachmakaj” tiarmiayi.

33 Nuyá, Emaúsnumia wárik jíinkiar Jerusarénum waketkiarmiayi. Nui Jesusa unuiniamurin auntse armia nuna tura chíkich shuar Jesusan nemariarmia nunasha iruntrar pujuinian wáinkiarmai.

34 Auntse armia nusha tiarmiayi “Uunt Jesus nekas nantakni. Semun Nin wáinkiaiti.”

35 Tutai niisha jintiá túrunamun ujakarmiayi. “Jesus yurumkan ajaamakui nu nekaamji” tiarmiayi.

Ni unuiniamurin Jesus wantintiu kmiania nu (Mateu 28.16-20; Márkus 16.14-18; Juan 20.19-23)

36 Nuna áujmatuk pujuiniaj Jesus aya aneachma ajapén wajas “Shiir enentáimsatarum” tímiayi.

37 Nuna antukar, ti sapijmiakar, wakanchashit, enentáimsarmiayi.

38 Tura Jesus chicharainiak “¿Urukamtai sapijmiakrum wakanchashit, tu enentáimsarum?”

39 Winia uwejrusha, nawersha írtustarum. Wíkiitjai. Takarsa írsatarum. Warí, wakancha ayashtinkiait, ukunchtinkiait” tímiayi.

40 Nuna tinia ni uwejéncha nawéncha iniaktusarmiayi.

41 Warainiyat sapijmiainia ásar, Niimpiashit tu enentáimtusarmiayi. Tuma asamtai, nin chicharainiak “¿yurumak takakrumek?” tímiayi.

42 Takui, namaknasha, míshkincha súsarmiayi.

⁴³ Tura Jesus nuna achik niisha íimiainiamunmanuyuamiayi.

⁴⁴ Tura nin tiarmiayi “Winia túrutawarma nuna, Wi atumjaji nuik pujusan tímiajrume. Nekas uminkiatniuyayi. Iis, wi túrunatniurun Muisáis aarmia nusha, Yúsnan etserin aarmia nusha, tura Sarmu papinium aarma ana nusha ashí uminkiatniuyayi” tímiayi.

⁴⁵ Nuyá Yus-Papinium aarman jintintiawarmiayi.

⁴⁶ Jintintiuk juna tímiayi: “Yusa anaikiamuri Kristu tutai jaka menaintiú tsawantaj jakamunmaya nantaktinia nu yáunchuk áarmauyayi. Tura Wi nú Krístuchukaitaj.

⁴⁷ Winia náarun pachisar, Jerusarénnumia nankama ashí nunkanam nu chicham etsernaktinia nu áarmauyayi. Shuar ni tunaari tsankurnarat tusar enentáin yapaj*í*átniuiti. Tura tu etserkatnua nusha yaunchu áarmauyayi.

⁴⁸ Tura wi túrunamu neka asarum etserkatniuitrume, tímiayi.

⁴⁹ Tura winia Apar, winia Wakantrun susartatjai, turammarumna nuna akuptuktatjarme. Tura nayaimpinmaya táatsain jui Jerusarén péprunam pujústárum. Taa ni kakarmarin suramsattarme.” Tu tímiayi.

*Jesus nayaimpiniam wakamiania nu
(Márkus 16.19-20)*

⁵⁰ Nuyá Jesus Jerusarén péprunmaya júkiar Petania péprunam ejeniarmiayi. Tura nui ni uweje takuí, “Yus yáinmakarti” tímiayi.

⁵¹ Nuna tu pujus, ni_{ij}ya kanakmiayi. Tura nayaimpiniam junakmiayi.

⁵² Ni unuiniamurisha Nin imiá shiir enentáimtusarmiayi. Tura nuyá ti warasar Jerusarénum waketkiarmiayi.

⁵³ Tura Yusa Uunt Jeen pujusar Yusa náarin shiir awajú pujuarmiayi. Áukete.

**Yus Papi: Shuarjai Yus Yamaram Chicham
Najanamu
New Testament in Shuar (EC:jiv:Shuar)**

copyright © 2012 Wycliffe Bible Translators, Inc.

Language: Shuar

Translation by: Wycliffe Bible Translators, Inc.

Shuar [jiv], Ecuador

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Shuar

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses,

please contact the respective copyright owners.

2014-04-30

PDF generated using Haiola and XeLaTeX on 1 Oct 2024 from source files
dated 29 Jan 2022

fb10d1f0-e2d5-5d8e-8a74-10846708c857